

VENANCE FORTUNAT

CARMINA (6984 vers)

LIBER PRIMVS

AD VITALEM EPISCOPUM

F1_1 v.1 Antistes domini, meritis in saecula vivens,
 2 gaudia qui Christi de grege pastor habes,
 3 cum te Vitalem voluit vocitare vetustas,
 4 noverat aeternum te meruisse diem.
 5 Dignus apostolica praefulgens mente sacerdos
 6 qui sacer Andreae tam pia templa locas.
 7 Quam bene pro meritis Domini consedit in aula
 8 per quem digna Deo est aedificata domus.
 9 Sumpsisti a Domino culmen cui culmina condis,
 10 qui tibi digna dedit reddis honore vicem.
 11 Emicat aula potens solido perfecta metallo,
 12 quo sine nocte manet continuata dies.
 13 Invitat locus ipse Deum sub luce perenni,
 14 gressibus ut placidis intret amando lares.
 15 Qui loca das populis Dominum quo semper adorent,
 16 ut capiant veniam te facis esse viam.
 17 Gratia, mens, animus, bonitas, dilectio plebis
 18 et gradus et pietas te dedit esse patrem.
 19 Prosperitas se vestra probat quae gaudia supplens
 20 intulit egregios ad tua vota viros.
 21 Dux nitet hinc armis, praefectus legibus illinc,
 22 venerunt per quos crescere festa solent.
 23 Ne tibi desit honor, populum Deus auxit opimum,
 24 qui vidit sensum hoc voluisse tuum.
 25 Mysterium fidei complevit vota petenti.
 26 Felix cui Dominus quae cupis ipsa vehit !
 27 Plurima divino celebres sollemnia dono
 28 atque Dei florens templa locando colas.

VERSUS DE TEMPLO DOMNI ANDREAE QUOD AEDIFICAUIT VITALIS EPISCOPUS

F1_2 v.1 Quisquis ad haec sancti concurris limina templi,
 2 si venias supplex, hic prece sumis opem.
 3 Quam sacer antistes Vitalis condidit arcem,
 4 culmine quae celso est tempore ducta brevi.
 5 Fundavit, struxit, dotavit, deinde dicavit
 6 et meruit templi solvere vota sui.
 7 Quo veneranda pii requiescunt viscera Petri
 8 qui meruit solus clave ligare polos.
 9 Paulus apostolica simul hac retinetur in aula,
 10 seductor quondam qui modo doctor ovat.
 11 Hanc sacer Andreas propriam sibi vindicat arcem
 12 et cum fratre pio participata regit.
 13 Haec sua tecta replet Laurentius igne sereno,
 14 cui pia flamma dedit luce perenne diem.
 15 Vitali domus ista placet qui vivus harenis
 16 defossus meruit perdere mortis iter.

17 Sunt loca Martini qui texit veste Tonantem :
 18 ne magis algeret, se spoliare dedit.
 19 Ecce Vigili arx est quem rustica turba peremit :
 20 unde mori voluit, mors magis ipsa fugit.
 21 Incolit haec pariter Marturius atque Sisennus,
 22 quos genus atque fides et tenet una salus.
 23 Sanctus Alexander felixque Cicilia pollent,
 24 quos meritis omnes una corona manet.
 25 Haec bonus antistes, Vitale urgente, Johannes
 26 condidit egregio viscera sancta loco.
 27 O nimium felix, aeternum in lumen iture,
 28 cujus vita suo proficit ista Deo !

DE BASILICA DOMNI STEPHANI

F1_3 v.1 Gloria celsa pios Domini circumdat amicos
 2 quorum diffuso vivit in orbe decus.
 3 Pertulit hic martyr pro Christo orientis in axe :
 4 ecce sub occasu templa beatus habet.
 5 Fundatus virtute Dei, de morte triumphans
 6 excepit lapides cui petra Christus erat.
 7 Gens Judaea ferox, Stephanum quem perdere credis,
 8 etsi carne, tamen nescit honore mori.
 9 Ille tenet palmam meritis, tu crimine poenam.
 10 Possidet ille polos, tu magis ima petis.
 11 Haec sacra Palladius levitae templa locavit
 12 unde sibi fiat non peritura domus.

DE BASILICA SANCTI MARTINI

F1_4 v.1 Emicat aula decens venerando in culmine ducta,
 2 nomine Martini sanctificata Deo.
 3 Cui vitae merito fiducia tanta coruscat,
 4 ut populis tribuat quod pia vota rogant.
 5 Extulit hanc Faustus, devoto corde sacerdos,
 6 reddidit et Domino prospera dona suo.

IN CELLULA SANCTI MARTINI UBI PAUPEREM UESTIUIT.

F1_5 v.1 Qui celerare paras, iter huc deflecte, viator :
 2 hic locus orantem cautius ire docet.
 3 Exul enim terris, caeli incola, saepe solebat
 4 clausus Martinus hinc aperire polos.
 5 Aede sub hac habitans, heremi secreta tenebat,
 6 per medios populos anachoreta potens.
 7 Hic se nudato tunica vestivit egenum :
 8 dum tegit argentem, plus calet ipse fide.
 9 Tum vili tunica vestitur et ipse sacerdos
 10 processitque inopi tegmine summus honor.
 11 Qui tamen altaris sacra dum mysteria tractat,
 12 signando calicem, signa beata dedit.
 13 Namque viri sacro de vertice flamma refulsit
 14 ignis et innocui surgit ad astra globus
 15 ac brevibus manicis, fieret ne injuria dextrae,
 16 texerunt gemmae qua caro nuda fuit :
 17 brachia nobilium lapidum fulgore coruscant
 18 inque loco tunicae pulchra zmaragdus erat.
 19 Quam bene mercatur qui dum vestivit egenum,
 20 tegmine pro tunicae brachia gemma tegit !
 21 Tu quoque qui caelis habitas, Martine precator,
 22 pro Fortunato fer pia verba Deo.

EXPLICIT. AD GREGORIUM

23 Imperiis parere tuis, pie care sacerdos
24 quantum posse valet, plus mihi velle placet.

DE BASILICA SANCTI MARTINI

F1_6 v.1 Qui cupit aeterna sociari in sede beatis,
2 hos sibi participes per pia vota facit
3 nec patitur differre diu quod oportet agendo,
4 cum bona quae dederit haec sua lucra putet.
5 Condidit ergo arvis delubra Leontius alma,
6 talibus officiis intret ut ipse polos.
7 Martini meritis et nomine fulta coruscant,
8 quem certum est terris signa dedisse poli.
9 Qui leprae maculas medicata per oscula purgans
10 pacis ab amplexu morbida bella tulit.
11 Haec tamen ingenio sunt aedificata perito,
12 quo nihil egregius gloria laudis eget.
13 Additur ad specimen locus ipse quod eminet arvis
14 elatoque jugo colle tumente patet.
15 Altius educto sub se tenet omnia dorso
16 et quacumque petit, deliciosa videt.
17 A longe adveniens oculo vicinus habetur,
18 jungitur aspectu dissociante loco.
19 Quo fessus rapitur visu invitante viator :
20 si pede defecerit, lumine tractus adit.
21 Quae Placidina sacris ornavit culmina velis
22 certantesque simul hic facit, illa colit.

IN HONOREM BASILICAE SANCTI MARTINI QUAM AEDIFICAVERUNT BASILIUS ET BAUDEGUNDIS

F1_7 v.1 Discite, mortales, terris nihil esse quod obstat,
2 cum sacra templa Dei flumine fixa manent.
3 Pulchra per angustos ut surgeret aula meatus,
4 etsi mons vetuit, praebuit unda locum.
5 Ut famularetur domui vaga lympha supernae,
6 cursibus antiquas ars nova subdit aquas.
7 Cum Baudegunde quo mente Basilius una
8 hoc renovans priscum reddit et auget opus.
9 Sic, Martine, tuus honor amplius ubique meretur
10 ut loca nulla negent, quo tibi festa sonent.
11 Talibus officiis pacatus, opime sacerdos,
12 quorum vota vides, redde benigne vicem.

DE BASILICA SANCTI VINCENTI ULTRA GARONNAM

F1_8 v.1 Tempore vita brevis meritis fit longior almīs
2 angustosque dies tendit honore fides.
3 Post finem sine fine manet mens dedita Christo :
4 linquens turbam hominum stat sociata Deo.
5 Hac ope suffultus Vincentius extat in aevum,
6 gloria martyrii cujus opima viret,
7 vertice succiso rapuit qui ex morte triumphum
8 et nova de terris proles ad astra volat.
9 Credidit unde necem, sancto dedit hostis honorem
10 percussorque magis morte perenne jacet.
11 Vicerat ille miser, hunc si jugulare nequisset.
12 Nam abstulit unde caput, contulit inde polum.
13 Hujus amore novo pia vota Leontius explens,
14 quo sacra membra jacent, stagna tecta dedit.
15 Et licet eniteat meritis venerabile templum,

16 attamen ornatum praebuit iste suum.
 17 Praemia succedant operanti longa salutis,
 18 hujus ut obsequiis culmina sancta micent.

ITEM DE BASILICA SANCTI VINCENTI VERNEMETIS

F1_9 v.1 Cultoris Domini toto sonus exiit orbe
 2 nec locus est ubi se gloria celsa neget,
 3 sed cujus meritum scimus percurrere mundum,
 4 hujus ubique viri surgere templa decet.
 5 Ecce beata nitent Vincenti culmina summi,
 6 munere martyrii qui colit astra poli,
 7 promptus amore pio quae papa Leontius olim
 8 condidit eximio consolidata loco.
 9 Nomine Vernemetis voluit vocitare vetustas,
 10 quod quasi fanum ingens gallica lingua refert.
 11 Auspicii praemissa fides erat arce futura,
 12 ut modo celsa domus staret honore Dei.
 13 Hic etiam sanctus, Domini suffultus amore,
 14 virtutis summae signa tremenda dedit.
 15 Nam cum templa Dei praesul de more dicavit,
 16 martyris adventu daemonis ira fugit.
 17 Redditur incolomis quidam de peste maligna,
 18 cui vidisse pii templa medella fuit.
 19 Emicat aula potens divino plena sereno,
 20 ut merito placeat hic habitare Deo.
 21 Nunc specie suadente loci ac virtutis honore,
 22 evocat hic populos hinc decus, inde salus.
 23 Qui plebem accendit venerandae conditor arcis,
 24 talibus officiis praemia justa metet.

DE DOMNO NAZARIO

F1_10 v.1 Culmina conspicui radiant veneranda Nazari
 2 cujus membra solum, spiritus astra tenet
 3 semine terrigeno terrenis usibus exsors,
 4 immortale bonum, pulvere natus homo,
 5 nil carnale volens, sed Christi praemia poscens,
 6 sanguine de proprio victima digna Deo.
 7 Haec tibi templa sacer devota Leontius offert
 8 majoremque suam hinc cupit esse domum.
 9 Hic prius angusto fabricata est machina gyro,
 10 quo neque tunc poterat plebs veneranda capi
 11 dejectamque solo rursus fundavit ab imo
 12 et dedit haec quae nunc amplificata placent.

DE BASILICA DOMNI DIONISII

F1_11 v.1 Qui cupis egregii structorem noscere templi,
 2 tam pia non patiar vota latere tibi.
 3 Longius hinc olim sacra cum delubra fuissent
 4 et plebs ob spatium saepe timeret iter,
 5 exiguum dederat hic praesul Amelius arcem,
 6 christicolam populum nec capiente loco.
 7 Quo vitae claudente diem dehinc prole graduque
 8 venit ad heredem hoc opus atque locus
 9 fundavitque piam hanc papa Leontius aulam,
 10 obtulit et Domino splendida dona suo.
 11 Quam venerandus habet propriam Dionisius aedem,
 12 nomine sub cujus sanctificata nitet.
 13 Qui fervente fide Christi solidatus amore,

14 vertice subposito colla secanda dedit.
 15 Membrorum contemptor erat cupiendo coronam,
 16 vile putans quicquid ferret amore Dei.
 17 Ut moritura caro donum immortale pararet,
 18 vulnera dilexit, sed caritura nece.
 19 Hostili occurrens gladio se misit Olympo :
 20 unde mori voluit, vota salutis habet.
 21 Nec angusta prius subtraxit fana sacerdos,
 22 haec nisi perficeret quae modo culta placent,
 23 adsidue in prisco peragens cerimonia templo,
 24 donec rite sequens consolidasset opus.

DE BASILICA SANCTI BIBIANI

F1_12 v.1 Digna sacerdotis Bibiani templa coruscant,
 2 quo si justa petis, dat pia vota fides.
 3 Quae praesul fundavit ovans Eusebius olim,
 4 ne tamen expleret raptus ab orbe fuit.
 5 Cui mox Emerius successit in arce sacerdos
 6 sed coeptum ut strueret, ferre recusat onus.
 7 Qui precibus commisit opus tibi, papa Leonti,
 8 cujus ad hoc votum jugiter instat amor.
 9 Ultro tale decus tibi se servavit agendum
 10 nec nisi tu fueras qui loca sacra dares.
 11 O meritum justis mansurum in luce perenni,
 12 per quem se cupiunt templa verenda coli !
 13 Sacra sepulchra tegunt Bibiani argentea tecta,
 14 unianimis tecum quae Placidina dedit.
 15 Quo super effusum rutilans intermicat aurum
 16 et spargunt radios pura metalla suos.
 17 Ingenio perfecta novo tabulata coruscant
 18 artificemque putas hic animasse feras.
 19 Sed cui vos animo donaria tanta dedistis,
 20 hic agat ut vobis stet diuturna salus.
 21 Nec dubitent qui digna ferunt sibi magna rependi,
 22 dum quoque pro parvis reddat opima Deus.

DE BASILICA SANCTI EUTROPIS

F1_13 v.1 Quantus amor Domini maneat tibi, papa Leonti,
 2 quem sibi jam sancti templa novare monent !
 3 Eutropitis enim venerandi antistitis aula
 4 conruerat senio dilacerata suo,
 5 nudatosque trabes paries vacuatus habebat,
 6 pondere non tecti, sed male pressus aquis.
 7 Nocte sopore levi cuidam veniente ministro
 8 instauratorem te docet esse suum.
 9 Pro mercede tui meruit magis ille moneri.
 10 O felix de quo fit pia cura Deo !
 11 Nunc meliore via viruit renovata vetustas
 12 et lassae fabricae flos redivivus adit.
 13 Aetas accessit, sed haec juvenescit honore,
 14 unde senes fieret, junior inde redit.
 15 Hic scalptae camerae decus interrasile pendit :
 16 quos pictura solet, ligna dedere jocos.
 17 Sumpsit imagineas paries simulando figuras :
 18 quae neque tecta prius, haec modo picta nitent.
 19 Urbis Santonicae primus fuit iste sacerdos,
 20 et tibi qui reparas jure priora dedit.
 21 Cum sua templa tenet sanctus habitando quiete,

22 instauratori reddit amore vicem.

DE CALICE LEONTI EPISCOPI

F1_14 v.1 Summus in arce Dei pia dona Leontius offert
 2 votis juncta sacris et Placidina simul.
 3 Felices quorum labor est altaribus actus,
 4 tempore qui parvo non peritura ferunt.

DE LEONTIO EPISCOPO

F1_15 v.1 Inter quos genuit radians Aquitanicus axis,
 2 egregiis meritis culmina prima tenes.
 3 Civibus ex Gallis supereminet alta potestas :
 4 tu potior reliquis et tibi nemo prior.
 5 Praecedis multos nulli minor atque secundus
 6 nec superest aliquid quod dare possit honor.
 7 Qui, cum se primo vestivit flore juvenus,
 8 parvus eras annis et gravitate senes.
 9 Versus ad hispanas acies cum rege sereno,
 10 militiae crevit palma secunda tuae.
 11 Cujus primitiae tanto placuere relatu,
 12 ut meritis esset debitus iste gradus,
 13 nec poterant subito tibi culmina celsa parari
 14 haec, nisi digna tuum promeruisset opus.
 15 Nobilitate potens praecellis, papa Leonti,
 16 clarus ab antiquis, si numerentur avi.
 17 Nam genus et proavi vel quicquid in ordine dicam,
 18 per proceres celsos currit origo vetus.
 19 Tempora diffugiunt et stat tamen aula parentum
 20 nec patitur lapsum te reparante domus.
 21 Nobilitas longos non inclinavit in annos,
 22 cui magis ascensum proles opima dedit.
 23 Inclita progenies ornavit luce priores :
 24 heredis radio splendet origo patrum.
 25 De radice sua vestita est flore vetustas
 26 quam merito vestrae laudis obumbrat honor.
 27 Quamvis non aliquis potior modo possit haberi,
 28 tu tibi praecedis amplificando patres.
 29 Emicat altus apex generosa stemmata pandens,
 30 cujus apud reges unica palma patet.
 31 Ecclesiae nunc jura regis, venerande sacerdos :
 32 altera nobilitas additur inde tibi.
 33 Pontificalis apex quamvis sit celsus in orbe,
 34 postquam te meruit, crevit adeptus honor.
 35 Aula Dei et pastor vicibus sibi praemia reddunt :
 36 illi tu ornatum, spem dedit illa tibi.
 37 Munere divino pariter floretis utrique :
 38 tu mercede places, illa decore nitet.
 39 Tertius a decimo huic urbi antistes haberis,
 40 sed primus meritis enumerandus eris.
 41 Templa vetusta Dei revocasti in culmine prisco
 42 postque suum lapsum nunc meliora placent.
 43 Flore juventutis senio fugiente coruscant
 44 et tibi laeta favent, quo renovante vident.
 45 Ut tu plus ageres, incendia tecta cremarunt
 46 et nunc laude tua pulchrius illa micant
 47 >nullaque flammicremae senserunt damna ruinae
 48 quae modo post ignes lumine plena nitent.
 49 Credo quod ex sese voluissent ipsa cremari

50 ut labor ille tuus haec meliora daret.
 51 Post cineres consumpta suos tenuesque favillas
 52 sic solet et Phoenix se renovare senes.
 53 Instaurata etiam sacri est baptismatis aula,
 54 quo maculas veteres fons lavat unus aquis.
 55 Ecce beata sacrae fundasti templa Mariae,
 56 nox ubi victa fugit semper habendo diem.
 57 Lumine plena micans imitata est aula Mariam :
 58 illa utero lucem clausit et ista diem.
 59 Nec solum hic sed ubique micant tua templa, sacerdos.
 60 Inter quae plaudens Santonus illa docet.
 61 Qui loca das populis ubi Christum jugiter orent,
 62 unde salus veniat te facis esse viam
 63 Ecclesiaeque domus crescente cacumine pollet
 64 et probat esse tuum quod modo culta placet.
 65 Fecisti ut libeat cunctos huc currere cives
 66 et domus una vocet quicquid in urbe manet.
 67 Ornasti patriam cui dona perennia praestas,
 68 tu quoque dicendus burdegalense decus.
 69 Quantum inter reliquas caput haec superextulit urbes,
 70 tantum pontifices vincis honore gradus.
 71 Inferiora velut sunt flumina cuncta Garonnae,
 72 non aliter vobis subjacet omnis apex.
 73 Rhenus ab Alpe means neque tantis spumat habenis,
 74 fortior hadriacas nec Padus intrat aquas ;
 75 Danuvius par est, quia longius egerit undas :
 76 haec ego transcendi, judico nota mihi.
 77 Muneribusque piis dotasti altaria Christi,
 78 cum tua vasa ferunt viscera sancta Dei.
 79 Nam cruor et corpus, Domini libamina summi,
 80 rite ministerio, te tribuente, venit.
 81 O felix cujus ditat pia templa facultas,
 82 cui res ista magis non peritura manet !
 83 Non erugo teret mordaci dente talentum
 84 nec contra haec fures arma dolosa movent
 85 et data res vivit, facit et bene vivere dantem :
 86 cum moritur terris, ducitur inde polis.
 87 Haec possessor habet quicquid transmiserit ante,
 88 sola tenet secum quae prius ire facit.
 89 Haec tibi templa dabunt et vasa sacrata, sacerdos,
 90 et quicquid reliquum nec numerare queo.
 91 Ecclesiae culmen per tempora longa gubernes
 92 et mercede pia fructus ubique mices.
 93 Cogor amore etiam Placidinae pauca referre,
 94 quae tibi tunc conjux est modo cara soror.
 95 Lumen ab Arcadio veniens genitore refulget,
 96 quo manet augustum germen, Avite, tuum.
 97 Imperii fastus toto qui rexit in orbe,
 98 cujus adhuc pollens jura senatus habet.
 99 Humani generis si culmina prima requiras,
 100 semine caesareo nil superesse potest.
 101 Sed genus ipsa suum sensu moderamine vicit
 102 cujus ab eloquio dulcia mella fluunt,
 103 cara, serena, decens, sollers, pia, mitis, opima,
 104 quae bona cuncta gerit quicquid honore placet.
 105 Moribus, ingenio, meritorum luce coruscans
 106 ornavit sexum mens pretiosa suum.
 107 Plurima cur referam quantis sit praedita rebus

108 quae potuit votis nupta placere tuis ?
 109 Augeat haec vobis vitam cui templa dedistis
 110 culminibusque suis culmina vestra tegat.

VERSUS VEL HYMNUS DE LEONTIO EPISCOPO

F1_16 v.1 Agnoscat omne saeculum
 2 antistitem Leontium,
 3 burdegalense praemium,
 4 dono superno redditum.
 5 Bilinguis ore callido
 6 crimen fovebat invidum,
 7 ferens acerbum nuntium
 8 hunc jam sepulchro conditum.
 9 Celare se non pertulit
 10 qui triste funus edidit :
 11 etsi nocere desiit,
 12 insana vota prodidit.
 13 Deceptus arte noxia
 14 cassata deflet crimina,
 15 dum quae putabat tristia
 16 conversa sunt in gaudia.
 17 Exempla saeva protulit
 18 calcanda cuncto tempore,
 19 ut jam sibi conscriberet
 20 decreta vivo antistite.
 21 Fucata res haec contigit
 22 vitanda casto pectore,
 23 superstite ut praesumeret
 24 post fata quod vix debuit.
 25 Gravatus sacerdos ordinem
 26 qui episcopatum sic petit.
 27 Praecepta qui complectitur
 28 fugit honoris ambitum.
 29 Hoc si cui sit debitum,
 30 coactus ascendat gradum,
 31 non se petente callide,
 32 sed dante Christi munere.
 33 Ineptus est quis ipse se
 34 praeferre vult ecclesiae.
 35 Nam rem sacratam sumere
 36 electio divina sit !
 37 Carus sacerdos ordinem
 38 Hilarius non ambiit,
 39 Martinus illud effugit,
 40 Gregorius vix sustulit.
 41 Leges refutant ambitum,
 42 Invasor omnis pellitur :
 43 quod respuunt praetoria
 44 vitet nefas ecclesia.
 45 Maligna erant certamina
 46 de sede non tamen sua.
 47 Quae nec pati desiderat
 48 non inferat mens improba.
 49 Nec longiore tempore
 50 versantur in hoc murmure :
 51 dum cogitant succedere,
 52 redit sacerdos qui fuit.
 53 Orante plebe protenus,

54 dum nemo credit, redditur.
 55 Quae confluunt post tristia
 56 majora sunt haec gaudia.
 57 Plausu favebat civitas
 58 cui redit felicitas.
 59 Orbata quem defleverat
 60 patrem recepit anxia,
 61 quem vix putabat redditum,
 62 praevanta voto prospero.
 63 Res mira quando cernitur,
 64 solet stupere visio.
 65 Recolligit rector gregem
 66 errore captum semitae.
 67 Pastoris arce cognita,
 68 gavisia sunt ovilia.
 69 Sumpsit gradum quo tempore,
 70 regressus est eo die.
 71 Quis non superno munere
 72 hoc contigisse praedicet ?
 73 Tantum nec ante praemium
 74 plebi fuit, cum factus est,
 75 laetata quantum tunc fuit
 76 quando recepit praesulem.
 77 Venite, cives, plaudite
 78 et vota votis addite.
 79 Quo facta sunt miracula
 80 servant eum caelestia.
 81 Christus sereno lumine
 82 circumvolet quem reddidit,
 83 ut trina crescat gratia :
 84 mercede, vita, gloria.
 85 Ymnum canendo concrepet
 86 quisquis Deo non invidet.
 87 Laus ejus est qui praesulem
 88 de mortis ore retrahit.
 89 Zelante fido pectore,
 90 tam vera dici non pudet.
 91 Haec parva nobilissimo
 92 papae damus Leontio.

AD PLACIDINAM

F1_17 v.1 Munera parva nimis, pia, suscipe, quaeso, libenter
 2 quae magis ipsa decens munus in orbe micas.
 3 Fluctibus e mediis ut haec daret insula vobis,
 4 oceanus tumidas murmure pressit aquas.
 5 Quae loca dum volui properans agnoscere ponti,
 6 a borea veniens reppulit unda furens.
 7 Prosperitas ut vestra tamen se plena probaret,
 8 obtulit in terris quod peteretur aquis.

DE BISSONNO, VILLA BURDEGALENSI

F1_18 v.1 Est locus, aestifero quamvis sit tempore fervor,
 2 quo viret assiduo flore refectus ager.
 3 Respirant croceis depicta coloribus arva,
 4 flagrat odoriferis blandior herba comis.
 5 Incola Bissonnum vocat hunc de nomine prisco,
 6 milia septem urbs hinc burdegalensis abest.
 7 Qua possessor amans praetoria grata locavit,

8 partibus atque tribus porticus aequa subit.
 9 Straverat ipsa solo senio rapiente vetustas.
 10 Perdiderat vultum forma decora suum.
 11 Haec meliore via revocat labor ille Leonti,
 12 quo praesente domos nulla ruina premit.
 13 Nunc quoque prosperius velut aula sepulta resurgit
 14 et favet auctori vivificata suo.
 15 Reddidit interea prisco nova balnea cultu
 16 quo recreant fessos blanda lavacra viros.
 17 Hic referunt nutrisse lupos deserta tenentes.
 18 Intulit hic homines, expulit unde feras.

DE VEREGINIS, VILLA BURDEGALENSI

F1_19 v.1 Inter opima ferax qua volvitur unda Garonnae,
 2 Vereginis ripis vernat amoenus ager.
 3 Hic brevis ascensus leni subit aggere clivum
 4 carpit et obliqua mole viator iter.
 5 Altior a planis arvis minor eminent altis
 6 nec humilis nimium necve superbit apex.
 7 Colle sedet medio domus aedificata decenter
 8 cujus utrumque latus hinc jacet inde tumet.
 9 Machina celsa casae triplici suspenditur arcu
 10 quo pelagi pictas currere credis aquas.
 11 Exilit unda latens vivo generata metallo
 12 dulcis et inriguo fonte perennis aquae.
 13 Quo super accumbens celebrat convivium pastor
 14 inclusoque lacu, pisce natante, bibit.
 15 Nunc renovanda venit papae mercede Leonti
 16 quem dominum longo tempore culta cupit.

DE PRAEMIACO, VILLA BURDEGALENSI

F1_20 v.1 Quamvis instet iter retraharque volumine curae,
 2 ad te pauca ferens carmine flecto viam.
 3 Captus amore tui numquam memoranda tacebo,
 4 te neque praetereo praetereundo locum.
 5 Cui quae digna loquar ? Si syllaba quarta recedat,
 6 Praemiacum pollens, praemia nomen habes.
 7 Deliciis obsessus ager, viridantibus arvis,
 8 et naturalis gratia ruris inest.
 9 Condita quo domus est, planus tumor exit in altum
 10 nec satis elato vertice regnat apex.
 11 Qua superincumbens locus est devexus in amnem.
 12 Florea gemmato gramine prata virent.
 13 Leniter adpulsus quotiens insibilat eurus,
 14 flexa supinatis fluctuat herba comis.
 15 Hinc alia de parte seges flavescit aristis
 16 pinguis et altricem palmas opacat humum.
 17 Piscibus innumeris non deficit unda Garonnae
 18 et si desit agris fruges, abundat aquis.
 19 Sed te quaerebant haec munera tanta, Leonti :
 20 solus defueras qui bona plena dares.
 21 Nam quod pulchra domus, quod grata lavacra nitescunt,
 22 consolidatorem te cecinere suum.
 23 Ut tamen adquirant adhuc fabricanda decorem,
 24 temporibus longis haec tua dona regas.

DE EGIRCIO FLUMINE

F1_21 v.1 Laus tibi forte minor fuerat, generose Garonna,

2 si non exiguas alter haberet aquas.
3 Lubricat hic quoniam tenuato Egircius haustu,
4 praefert divitias paupere fonte tuas.
5 Denique dissimilem si conparet ullus utrumque,
6 hic ubi fit rivus, tu, puto, Nilus eris.
7 Te famulans intrat, sed hunc tua regna refrenant :
8 gallicus Eufrates tu fluis, iste latet.
9 Nam quantum oceanum tumidis tu cursibus auges,
10 iste tuas tantum crescere praestat aquas.
11 Torrida praesertim cum terris incubat aestas
12 ac, sitiante solo, tristis anhelat ager,
13 cum Titan radiis ferventibus exarat arva
14 et calor ignifero vomere findit humum,
15 languidus arentes fugiens vix explicat undas
16 et cum pisce suo palpitat ipse simul.
17 Flumine subducto, vacuatas lambit harenas,
18 sedibus in propriis exul oberrat aquis.
19 In limo migrante lacu consumitur amnis
20 terraque fit sterilis quo fuit unda rapax.
21 Deficiunt usto solacia cuncta rigoris,
22 nomine cum proprio tristis et aeger eget.
23 Forte viator iter gradiens non invenit haustus.
24 Unde alios recreet qui sitit ipse sibi ?
25 Se cupit infundi fluvius, si porrigis undas,
26 si tamen est fluvius quem madefactat homo !
27 Gurgitis impressas labens rota signat harenas
28 atque resudantes orbita sistit aquas.
29 Si venias equitando viam sub tempore cancri,
30 vix tamen insidens ungula mergit equi.
31 Vidimus exiguum de limo surgere piscem
32 qui, retinente luto, naufragus errat humo.
33 Nec fluvius nec campus adest nec terra nec unda.
34 Piscibus inhabilem nullus arare potest.
35 Sola palude natans querulos dat rana susurros,
36 piscibus exclusis, advena regnat aquis.
37 At si forte fluat tenuis de nubibus imber,
38 vix pluit in terris, jam tumet iste minax.
39 Ingentes animos parva de nube resumit :
40 fit subito pelagus qui fuit ante lacus.
41 Turbidus incedens undis eget ipse lavari
42 semper inaequalis qui nihil aut satis est.
43 Non ripis contentus agit compendia cursus,
44 quod de monte bibit per sata plena vomit.
45 Vertice torrenti rapitur quasi more tyranni
46 indignatus iter munera vastat agri.
47 Discurrit seges in fluvium, stat piscis in arvo :
48 ordine perverso, messe natante jacet.
49 Quae fuerant ovibus donantur pascua ranis,
50 prata tenent pisces et trahit unda pecus.
51 Obtinet expulsus stabulum campestre silurus,
52 plus capitur terris quam modo piscis aquis.
53 Sarcula quos foderent agros male retia miscent,
54 figitur hic hamus quo stetit ante palus.
55 Sors una est piscis, siccent aut flumina crescant :
56 nunc residet limo, nunc jacet exul agro.
57 Sed cur triste diu loquimur de gurgite parvo ?
58 Uritur et verbis nec recreatur aquis.
59 Sufficiat flagrare sibi. Cur addo vapores

60 atque bis aestivum crescere tempus ago ?
 61 Unica sed tandem damus haec solacia laudis
 62 quod tribuit pisces evacuatus aquis.

LIBER SECVNDVS

DE CRUCE DOMINI

F2_1 v.1 Crux benedicta nitet Dominus qua carne pependit
 2 atque cruore suo vulnera nostra lavat,
 3 mitis amore pio pro nobis victima factus
 4 traxit ab ore lupi qua sacer agnus oves,
 5 transfixis palmis ubi mundum a clade redemit
 6 atque suo clausit funere mortis iter.
 7 Hic manus illa fuit clavis confixa cruentis
 8 quae eripuit Paulum crimine, morte Petrum.
 9 Fertilitate potens, o dulce et nobile lignum,
 10 quando tuis ramis tam nova poma geris.
 11 Cujus odore novo defuncta cadavera surgunt
 12 et redeunt vitae qui caruere diem.
 13 Nullum uret aestus sub frondibus arboris hujus
 14 luna nec in noctem sol neque meridie.
 15 Tu plantata micas secus est ubi cursus aquarum
 16 spargis et ornatas flore recente comas.
 17 Appensa est vitis inter tua brachia de qua
 18 dulcia sanguineo vina rubore fluunt.

IN HONORE SANCTAE CRUCIS

F2_2 v.1 Pange, lingua, gloriosi proelium certaminis
 2 et super crucis tropeo dic triumphum nobilem,
 3 qualiter redemptor orbis immolatus vicerit
 4 de parentis protoplasti fraude factor condolens,
 5 quando pomi noxialis morte morsu corrui,
 6 ipse lignum tunc notavit, damna ligni ut solveret.
 7 Hoc opus nostrae salutis ordo depoposcerat
 8 multiformis perditoris arte ut artem falleret
 9 et medellam ferret inde, hostis unde laeserat.
 10 Quando venit ergo sacri plenitudo temporis
 11 missus est ab arce patris natus orbis conditor
 12 atque ventre virginali carnefactus prodiit.
 13 Vagit infans inter arta conditus praesepia,
 14 membra pannis involuta virgo mater adligat
 15 et pedes manusque crura stricta pingit fascia.
 16 Lustra sex qui jam peracta tempus implens corporis,
 17 se volente natus ad hoc, passioni deditus
 18 agnus in crucis levatur immolandus stipite.
 19 Hic acetum fel harundo sputa clavi lancea.
 20 Mite corpus perforatur, sanguis unda profluit,
 21 terra pontus astra mundus quo lavantur flumine.
 22 Crux fidelis, inter omnes arbor una nobilis,
 23 nulla talem silva profert flore fronde germinem,
 24 dulce lignum dulce clavo dulce pondus sustinens.
 25 Flecte ramos, arbor alta, tensa laxa viscera
 26 et rigor lentescat ille quem dedit nativitas,
 27 ut superni membra regis mite tendas stipite.
 28 Sola digna tu fuisti ferre pretium saeculi
 29 atque portum praeparare nauta mundo naufrago

30 quem sacer cruor perunxit fusus agni corpore.

ITEM UERSUS IN HONORE SANCTAE CRUCIS UEL ORATORII DOMUS ECCLESIAE APUD TORONOS

F2_3 v.1 Virtus celsa crucis totum recte occupat orbem,
 2 haec quoniam mundi perdita cuncta refert
 3 quodque ferus serpens infecit felle veneni
 4 Christi sanguis in hac dulce liquore lavat,
 5 quaeque lupi fuerant raptoris praeda ferocis
 6 in cruce restituit virginis agnus ovis.
 7 Tensus in his ramis, cum plantis brachia pandens,
 8 ecclesiam stabilit pendulus ipse cruce,
 9 hoc pius in ligno reparans deperdita pridem,
 10 quod vetiti ligni poma tulere boni.
 11 Addita quin etiam virtutum palma coruscat
 12 dona quod obsequiis crux parat ipsa suis.
 13 Denique sancta cruci haec templa Gregorius offert.
 14 Dum pallas cuperet signa gerendo crucis,
 15 dona repente dedit divina potentia Christus,
 16 mox fuit et voti causa secuta pii.
 17 Pallia nam meruit, sunt quae cruce textile pulchra
 18 obsequiisque suis crux habet alma cruces,
 19 serica quae niveis sunt agnava blattea telis,
 20 et textis crucibus magnificatur opus.
 21 Sic cito pontifici dedit haec devota voluntas
 22 Atque dicata cruci conscia vela placent.
 23 Unde salutifero signo tibi, clare sacerdos,
 24 hoc cui conplacuit reddere magna valet.

ITEM DE SANCTAE CRUCIS SIGNACULO

F2_4 v.1 Dius apex carne effigians genetalia limi.
 2 Vitali terrae conpingit sanguine gluten.
 3 Luciferax auras animantes affluit illic.
 4 Conditur enixans Adam factoris ad instar.
 5 Exiluit protoplasma solo, res nobilis usu.
 6 Dives in arbitrio radianti lumine. Dehinc
 7 ex membris Adae vas fit tum virginis Evvae.
 8 Carne creata viri dehinc copulatur eidem.
 9 Ut paradyssiaco bene laetaretur in horto.
 10 Sed de sede pia pepulit temerabile guttur.
 11 Serpentis suasi pomi suco atra propinans.
 12 Insatiatrici morti fames accidit illinc.
 13 Gavisurus ob hoc caeli fluis arce locator.
 14 Nasci pro nonis miseraris et ulcere clavi.
 15 In cruce configi. Tali malagmate inunctis
 16 una salus nobis ligno agni sanguine venit.
 17 Jucunda species : in te pia bracchia Cristi
 18 affixa steterunt et palma beabilis, in hac
 19 cara caro poenas inmites sustulit haustu.
 20 Arbor suavis agri, tecum nova vita paratur.
 21 Electa ut visu, sic e crucis ordine pulchra
 22 lumen spes scutum gereris livoris ab ictu.
 23 Immortale decus nece justi laeta parasti.
 24 Una omnem vitam sic, crux, tua causa rigavit.
 25 Imbre cruenta pio. Velis das navita portum.
 26 Tristia summerso mundasti vulnera clavo.
 27 Arbor dulcis agri, rorans e cortice nectar.
 28 Ramis de cujus vitalia crismate fragrant.
 29 Excellens cultu. Diva ortu, fulgida fructu.

30 Deliciosa cibo et per poma suavis in umbra.
 31 En regis magni gemmantem et nobile signum.
 32 Murus et arma viris, virtus, lux ara precatu.
 33 Pande benigna viam, vivax et fertile lumen.
 34 Tum memor adfer opem nobis e germine David
 35 in cruce rex fixus iudex cum praeerit orbi.
 In lateribus
 36 Dulce decus signi, via caeli, vita redempti.
 37 In cruce mors Christi curavit mortua mundi.
 Crux ipsa
 38 Crux pia, devotas Agnen tege cum Radegunde.
 39 Tu Fortunatum fragilem, crux sancta, tuere.
 40 Vera spes nobis ligno, agni sanguine, clavo.
 41 Arbor suavis agri, tecum nova vita paratur.

idem

F2_5 v.1 Extorquet hoc sorte Dei veniabile signum
 2 rusticulas laudes viventi reddere flatu.
 3 In me qui regit ire lutum plasmabile numen.
 4 Portio viventum, curatio fausta medellae.
 5 Exclusor culpae, trinitas effusa, creator.
 6 Cujus honor lumen jus gloria regna coaeve.
 7 Sic pater et genitus sic sanctus spiritus unus.
 In lateribus
 8 Eripe credentes, fidei decus, arma salutis.
 9 Munere, Criste, tuo removetur causa reatus.
 Crux ipsa
 10 Dulce mihi lignum, pie, majus odore rosetis.
 11 Dumosi colles lignum generastis honoris.
 12 Ditant templa Dei crux et velamen adornas.
 13 Ex fidei merito magnum, pie, reddis Abraham.

HYMNUS IN HONORE SANCTAE CRUCIS

F2_6 v.1 Vexilla regis prodeunt,
 2 fulgit crucis mysterium,
 3 quo carne carnis conditor
 4 suspensus est patibulo.
 5 Confixa clavis viscera
 6 tendens manus, vestigia,
 7 redemptionis gratia
 8 hic inmolata est hostia.
 9 Quo vulneratus insuper
 10 mucrone diro lanceae,
 11 ut nos lavaret crimine,
 12 manavit unda et sanguine.
 13 Inpleta sunt quae concinit
 14 David fideli carmine
 15 dicendo nationibus :
 16 regnavit a ligno Deus.
 17 Arbor decora et fulgida,
 18 ornata regis purpura,
 19 electa digno stipite
 20 tam sancta membra tangere.
 21 Beata cujus brachiis
 22 pretium pependit saeculi.
 23 Statera facta est corporis,
 24 praedam tulitque Tartari.
 25 O crux ave, spes unica,

26 hoc passionis tempore,
 27 auge piis justitiam
 28 reisque dona veniam.
 29 Fundis aroma cortice,
 30 vincis sapore nectare,
 31 jucunda fructu fertili
 32 plaudis triumpho nobili.
 33 Salve ara, salve victima
 34 de passionis gloria,
 35 qua Vita mortem pertulit
 36 et morte vitam reddidit.

DE DOMNO SATURNINO

F2_7 v.1 Janua celsa poli, terra pulsante, patescit
 2 et recipit natos quos generavit humus.
 3 Admiranda haec est occasio facta salutis
 4 ut de morte sua praemia lucis emant.
 5 Saturninus enim cupiens se nectere Christo
 6 carnali in habitu noluit esse diu,
 7 vincula corporei dissolvere carceris optans,
 8 plenius ut Domino se sociaret homo.
 9 Tempore maturo cum jam spes esset adulta,
 10 sumpserunt pretium vota beata suum.
 11 Dumque sacerdotio frueretur in urbe Tolosa
 12 et populis Christum panderet esse deum,
 13 ostendens verbis, addens miracula tactis,
 14 ut quod sermo daret consequeretur opus,
 15 gentiles animas rapiens de fauce tyranni
 16 subdebat regi qui dedit arma sibi.
 17 Sed vitiata malis et plebs infecta venenis
 18 curari effugiens, aegra jacere volens,
 19 comprehendit male sana virum, ad capitolia duxit
 20 atque suo medico vulnera plura dedit.
 21 Pro pietate dolum, pro melle venena rependens
 22 contra tutorem noxia bella movet.
 23 Subligat indomiti sanctum ad vestigia tauri
 24 et stimulat, fieret ne fuga tarda feri.
 25 Pessima mens hominum, diri nova bestia monstri,
 26 nec tauri indomiti sufficit ira tibi ?
 27 Naturae rabidae feritatem adjungere nosti,
 28 quod per se nescit te stimulante furit.
 29 Turba cruenta nocens, hujus te vulnere perdis :
 30 etsi non illi, parcere disce tibi.
 31 Hinc ferus inpatiens mox curva per avia raptus
 32 passim membra pii fudit in urbe viri.
 33 Tum mulier collegit ovans et condidit artus,
 34 una sed famula participante sibi.
 35 Haec fuit insignis rapiendae causa coronae,
 36 gloria martyrii sic celebrata nitel.
 37 Ante sepulchra pii dantur modo dona salutis
 38 et corpus lacerum corpora multa fovet.
 39 Dic ubi, mors inimica, jaces ? Ubi victa recumbis,
 40 quando vides sancti funere vota dari ?
 41 Quem male credebis obitu finire salutem,
 42 dat vitam multis et tenet ipse suam.
 43 Huc captiva cubas qui te regnare putabas ;
 44 invadendo peris teque furendo necas.
 45 Te tua poena premit, tua te fera vincula torquent,

46 quos dare vis gemitus, ipsa ferendo gemis.
 47 Martyr ovans caelos retinet, tu livida tristis,
 48 mors inimica tibi, Tartara nigra colis.
 49 Florigera nunc sede manet sine fine beatus
 50 inter odoratos ture calente choros.
 51 Non aliquas metuit placato iudice causas,
 52 praemia sed miles victor habenda petit.
 53 Digna triumphantem quae restat palma sequetur,
 54 pro te, Christe, mori est gloria vita quies.

DE LAUNEBODE QUI AEDIFICAUIT TEMPLUM SANCTI SATURNINI

F2_8 v.1 Laudibus humanis reliquorum corda resultent,
 2 at mihi de justis commemorare vacet.
 3 Nam pietatis opus, victores texere libris
 4 admonet ingenium res ratione duplex.
 5 Una quod est habilem de magnis magna fateri ;
 6 nam bona qui reticet criminis auctor erit.
 7 Altera causa monet quoniam succensus amore
 8 et meliora cupit qui sua facta legit.
 9 Saturninus enim martyr venerabilis orbi
 10 nec latet egregii palma beata viri.
 11 Qui cum romana properasset ab urbe Tolosam
 12 et pia Christicoli semina ferret agri,
 13 tunc vesana cohors Domini comprehendit amicum
 14 instituitque pii membra terenda trahi.
 15 Implicitus tauri pede posteriore pependit,
 16 tractus in oblicum dilaceratus obit.
 17 Hac ope de terris animam transmisit Olympo :
 18 o felix cujus funere mors moritur !
 19 Sed locus ille quidem quo sanctus vincula sumpsit
 20 nullius templi fultus honore fuit.
 21 Launebodis enim post saecula longa, ducatum
 22 dum gerit, instruxit culmina sancta loci.
 23 Quod nullus veniens romana gente fabrivit,
 24 hoc vir barbarica prole peregit opus
 25 conjuge cum propria Berethrude clara decore
 26 pectore quae blando clarior ipsa nitet.
 27 Cui genus egregium fulget de stirpe potentum,
 28 addidit ornatum vir venerando deum.
 29 Quae manibus propriis alimonia digna ministrat,
 30 pauperibus tribuens se satiari cupit.
 31 Indefessa spem Christi per templa requirit,
 32 jugiter excurrans ad pietatis opus.
 33 Nudos veste tegit, sitiienti pocula profert,
 34 se magis aeterno femina fonte replet.
 35 Proficit hoc etiam quidquid gerit illa marito
 36 anxia pro cuius vota salute facit.
 37 Dux meritis in gente sua qui pollet opimis,
 38 celsus ubique micans nobilitatis ope.
 39 Sed quamvis altum teneat de stirpe cacumen
 40 moribus ipse suos amplificavit avos.
 41 Ergo pari voto maneant in saecula juncti
 42 et micet ambobus consolidatus amor.

AD CLERUM PARISIACUM

F2_9 v.1 Coetus honorifici decus et gradus ordinis ampli,
 2 quos colo corde fide religione patres,
 3 jamdudum obliti desueto carmine plectri

4 cogitis antiquam me renovare lyram.
5 En stupidis digitis stimulatatis tangere cordas,
6 cum mihi non solito currat in arte manus.
7 Scabrida nunc resonat mea lingua rubigine verba
8 exit et incompto raucus ab ore fragor.
9 Vix dabit in veteri ferrugine cotis acumen
10 aut fumo infecto splendet in aere color.
11 Sed quia dulcedo pulsans quasi malleus instat
12 et velut incudo cura relisa terit
13 pectoris atque mei succenditis igne caminum
14 unde ministratur cordis in arce vapor,
15 obsequor hinc, quia me veluti fornace recocto
16 artis ad officium vester adegit amor.
17 Celsa parisiaci clerus reverentia pollens,
18 ecclesiae genium, gloria, munus, honor,
19 carmine davitico divina poemata pangens,
20 cursibus assiduis dulce revolvit opus.
21 Inde sacerdotes, leviticus hinc micat ordo ;
22 illos canities, hos stola pulchra tegit,
23 illis pallor inest, rubor his in vultibus errat
24 et candunt rutilis lilia mixta rosis.
25 Illi jam senio, sed et hi bene vestibus albert,
26 ut placeat summo picta corona Deo.
27 In medio Germanus adest antistes honore
28 qui regit hinc juvenes, subrigit inde senes.
29 Levitae praeaeunt, sequitur gravis ordo ducatum :
30 hos gradiendo movet, hos moderando trahit.
31 Ipse tamen sensim incedit velut alter Aaron,
32 non de veste nitens, sed pietate placens.
33 Non lapides, coccus, cidar, aurum, purpura, byssus
34 exornant humeros, sed micat alma fides.
35 Iste satis melior veteri quam lege sacerdos,
36 hic quia vera colit quod prius umbra fuit.
37 Magna futura putans, praesentia cuncta refellens,
38 antea carne carens quam caro fine ruens ;
39 sollicitus quemquam ne devoret ira luporum,
40 colligit ad caulas pastor optimus oves.
41 Assiduis monitis ad pascua salsa vocatus
42 grex vocem agnoscens currit amore sequax.
43 Miles ad arma celer, signum mox tinnit in aures,
44 erigit excusso membra sopore toro.
45 Advolat ante alios ; mysteria sacra requirens,
46 undique quisque suo templa petendo loco.
47 Flagranti studio populum domus inrigat omnem
48 certatimque monent quis prior ire valet.
49 Pervigiles noctes ad prima crepuscula jungens,
50 construit angelicos turba verenda choros.
51 Gressibus exertis in opus venerabile constans,
52 vim factura polo, cantibus arma movet.
53 Stamina psalterii lyrico modulamine texens,
54 versibus orditum carmen amore trahit.
55 Hinc puer exiguis attemperat organa cannis,
56 inde senis largam ructat ab ore tubam :
57 cymbalicae voces calamis miscentur acutis
58 disparibusque tropis fistula dulce sonat.
59 Tympana rauca senum puerilis tibia mulcet
60 atque hominum reparant verba canora lyram.
61 Leniter iste trahit modulus, rapit alacer ille,

62 sexus et aetatis sic variatur opus.
 63 Triticeas fruges fervens terit area Christi,
 64 horrea quandoquidem constructura Dei,
 65 voce Creatoris reminiscens esse beatos
 66 quos Dominus vigiles, dum redit ipse, videt.
 67 In quorum meritis, animo, virtute fideque
 68 tegmine corporeo lumina quanta latent !
 69 Pontificis monitis clerus, plebs psallit et infans,
 70 unde labore brevi fruge replendus erit.
 71 Sub duce Germano felix exercitus hic est.
 72 Moyses, tende manus et tua castra juvas.

DE ECCLESIA PARISIACA

F2_10 v.1 Si salomoniaci memoretur machina templi,
 2 arte licet par sit, pulchrior ista fide.
 3 Nam quaecumque illic veteris velamine legis
 4 clausa fuere prius, hic reserata patent.
 5 Floruit illa quidem vario intertexta metallo,
 6 clarius haec Christi sanguine tincta nitet.
 7 Illam aurum, lapides ornarunt, cedrina ligna,
 8 huic venerabilior de cruce fulget honor.
 9 Constitit illa vetus ruituro structa talento,
 10 haec pretio mundi stat solidata domus.
 11 Splendida marmoreis attolitur aula columnis
 12 et quia pura manet, gratia major inest.
 13 Prima capit radios vitreis oculata fenestris
 14 artificisque manu clausit in arce diem.
 15 Cursibus Aurorae vaga lux laquearia complet
 16 atque suis radiis et sine sole micat.
 17 Haec pius egregio rex Childebertus amore
 18 dona suo populo non moritura dedit.
 19 Totus in affectu divini cultus adhaerens
 20 ecclesiae juges amplificavit opes :
 21 Melchisedech noster, merito rex atque sacerdos
 22 conplevit laicus religionis opus.
 23 Publica jura regens ac celsa palatia servans :
 24 unica pontificum gloria norma fuit.
 25 Hinc abiens illic meritorum vivit honore.
 26 Hic quoque gestorum laude perennis erit.

DE BAPTISTERIO MAGANTIAE

F2_11 v.1 Ardua sacrati baptismatis aula coruscat
 2 quo delicta Adae Christus in amne lavat.
 3 Hic pastore Deo puris grex mergitur undis,
 4 ne maculata diu vellera gestet ovis.
 5 Traxit origo necem de semine, sed pater orbis
 6 purgavit medicis crimina mortis aquis.
 7 Hanc tamen antistes Sidonius extulit arcem,
 8 qui Domini cultum templa novando fovet.
 9 Struxit Berthoarae voto conplente sacerdos,
 10 quae decus ecclesiae cordis amore placet.
 11 Catholicae fidei splendor, pietate coruscans,
 12 templorum cultrix, prodiga pauperibus,
 13 seminat unde metat fruges, spargendo recondens :
 14 terrenis opibus non moritura parat.
 15 Filia digna patri, te, Theudeberte, reformans,
 16 rexisti patriam qui pietate patris
 17 et comitante fide revocasti ex hoste triumphos,

18 sed capti pretio mox rediere tuo.
 19 Ecclesiae fultor, laus regum, pastor egentum,
 20 cura sacerdotum, promptus ad omne bonum
 21 cujus dulce jugum nullus gemuisse fatetur,
 22 vivis adhuc meritis rex in amore tuis.

DE BASILICA SANCTI GEORGI

F2_12 v.1 Martyris egregii pollens micat aula Georgi
 2 cujus in hunc mundum spargitur altus honor.
 3 Carcere, caede, fame, vinclis, site, frigore, flammis
 4 confessus Christum duxit ad astra caput.
 5 Qui virtute potens orientis in axe sepultus
 6 ecce sub occiduo cardine praebet opem.
 7 Ergo memento preces et reddere vota, viator :
 8 obtinet hic meritis quod petit alma fides.
 9 Condidit antistes Sidonius ista decenter
 10 proficiant animae quae nova templa suae.

DE ORATORIO TRASARICI

F2_13 v.1 Lucida perspicui nituerunt limina templi
 2 quo capit haud dubiam spem veneranda fides.
 3 Haec est aula Petri caelos qui clave catenat
 4 substitit et pelagus quo gradiente lapis.
 5 Sedibus his Paulus habitat, tuba gentibus una,
 6 et qui praedo prius, hic modo praeco manet.
 7 Martini domus est Christum qui vestit egentem,
 8 regem tiro tegens et homo jure Deum.
 9 Ecce sacerdotis sacri micat aula Remedi
 10 qui tenebras mundi liquit et astra tenet.
 11 Cultor opime Dei templum, Trasarice, locasti.
 12 Has cui persolvit reddit amator opes.

DE SANCTIS AGAUNENSIBUS

F2_14 v.1 Turbine sub mundi cum persequabantur iniqui
 2 Christicolasque daret saeva procella neci,
 3 frigore depulso, succendens corda peregit
 4 rupibus in gelidis fervida bella fides.
 5 Quo, pie Maurici, ductor legionis opimae
 6 traxisti fortis subdere colla viros.
 7 Quos positis gladiis armasti dogmate Pauli
 8 nomine pro Christi dulcius esse mori.
 9 Pectore belligero poterant qui vincere ferro
 10 invitant jugulis vulnera cara suis.
 11 Hortantes se clade sua sic ire sub astra
 12 alter in alterius caede natavit heros.
 13 Adjuvit rapidas Rhodani fons sanguinis undas
 14 tinxit et alpinas ira cruenta nives.
 15 Tali fine polos felix exercitus intrans
 16 junctus apostolicis plaudit honore choris.
 17 Cingitur angelico virtus trabeata senatu :
 18 mors fuit unde prius lux fovet inde viros.
 19 Ecce, triumphantum ductor fortissime, tecum
 20 quattuor hic procerum pignora sancta jacent.
 21 Sub luteo tumulo latitat caeleste talentum
 22 divitiasque Dei vilis arena tegit,
 23 qui faciunt sacrum paradisi crescere censum
 24 heredes Domini luce perenne dati.
 25 Sidereo chorus iste throno cum carne locandus,

26 cum veniet iudex, arbiter orbis erit.
 27 Sic pia turba simul, festinans cernere Christum,
 28 ut caelos peteret, de nece fecit iter.
 29 Fortunatus enim per fulgida dona Tonantis,
 30 ne tenebris crucier, quaeso feratis opem.

DE SANCTO HILARIO

F2_15 v.1 Si Hilarium quaeris qui sit cognoscere, lector,
 2 Allobroges referunt Pictavios genitum.
 3 Cum populum regeret divina mente sacerdos,
 4 servabat legis foedera sollicitus.
 5 Inprobis ut vidit plebes quod scinderet error,
 6 Graecorum virus protulit in medium,
 7 vipereo promunt semper qui ex corde venena,
 8 filius ut dicant qui est creatura Dei,
 9 Quis magis auxilium praestat sapientia mundi
 10 de ingenito genitum quae negat esse Deum.
 11 Quam male complexus, cupiens calcare prophetas,
 12 Arrius infelix cum retinet crepuit.
 13 Egregius doctor, veterum monumenta secutus,
 14 quem Stephanus vidit conprobat esse Deum.
 15 Victus amore Dei, contempto principe mundi,
 16 intemerata fides pertulit exilium.
 17 In patre qui potens Deus est cognoscere Natum
 18 divinis tantum vocibus insinuat.
 19 Perpetuum lumen Christum Dominumque Deumque
 20 bis senis populos edocet esse libris.

DE SANCTO MEDARDO

F2_16 v.1 Inter Christicolae quos actio vexit in astris
 2 pars tibi pro meritis magna, Medarde, patet,
 3 qui sic vixisti terrenis hospes in oris
 4 ut caelos patriam redderes esse tuam.
 5 Exilium tibi mundus erat caenosa caventi
 6 et modo te gaudet cive manente polus.
 7 Exutus tenebris, vestitus tegmine lucis
 8 post obitum frueris liberiore die.
 9 De tellure satus factus possessor Olympi
 10 et matrem linquens cum Patre laeta tenes.
 11 Humani victor vitii super astra triumphas
 12 atque cremans carnem das animae requiem.
 13 Te inter mundanos vepres gradiente fatemur
 14 calcatis spinis promeruisse rosas.
 15 Flore refectus ager suaves tibi tundit odores,
 16 balsama, tura replent quae paradisi habet.
 17 Cauta per angustum figens vestigia callem,
 18 sic dedit arta tibi semita lucis iter.
 19 Lata voluptatum via quae submergit Averno,
 20 dulcia carnis alens, mortis amara parat.
 21 Hoc numquam sacros flexisti tramite gressus
 22 nec potuere tuos prava tenere pedes.
 23 Durum iter ad laudes, gravior via ducit in altum ;
 24 quo labor est potior, gloria major erit.
 25 Quae prius incipiam sacri miracula facti,
 26 cum, quicquid facias, omnia prima micent ?
 27 Dum fuit ad superos humano in corpore vita,
 28 ex oculis fugiens lux tibi cordis erat.
 29 Si caecus venit, rapuit palpando salutem,

30 in mediis tenebris fulsit aperta dies.
 31 Qui voluit furti causa penetrare latenter
 32 te religante sedet, te reserante fugit.
 33 Fur sine perfectu voto deceptus inani
 34 omnia restituens crimina fraudis habet.
 35 Nam semel ut molles carpserunt palmitis uvas,
 36 non valere gradus inde referre toris
 37 nec potuit raptor pedibus subducere praedam,
 38 raptori abduxit sed sua praeda pedes.
 39 Ergo suis laqueis coepit miser esse ligatus :
 40 venerat ut caperet, captus at ipse fuit.
 41 Nec tetigit mustum, sed iniqua mente rotatur,
 42 antea quam biberet, ebria turba jacet.
 43 Incepit servare magis quam ferre racemos
 44 et datus est custos qui cupit esse rapax,
 45 donec, sancte, tuis verbis jussisses abire,
 46 ut furtum inpleret, doctus ab hoste redit.
 47 Quae manet haec animi pietas, sanctissime praesul,
 48 laedentem auxilio qui facis ire tuo ?
 49 Tintinum rapit alter inops, magis improbus ille,
 50 qui jumentorum colla tenere solet
 51 absconditque sinu, feno praecludit hiatum
 52 et tenet ipse manu, ne manifestet opus.
 53 Te veniente, sacer, causas patefecit opertas
 54 tinnitu incipiens jam quasi furta loqui.
 55 Nil valet abscondi, nil claudi nilve teneri,
 56 facundo strepitu prodidit omne malum.
 57 Pandebat propriam veluti sub iudice causam,
 58 nil de fure timens liberiore sono.
 59 Indicat, accusat, convincit, damnat, acerbat,
 60 te praesente tamen non licet esse reum.
 61 Absolvit furem solitae pietatis amore,
 62 addens et monitus, cautus ut intret iter,
 63 praecipiens querulam secum portare rapinam,
 64 ne vacua tristis spe remearet inops.
 65 Hinc tamen ut potero, cum raptus ab orbe fuisses,
 66 quae dederis populis signa verenda loquar.
 DE CAECO INLUMINATO
 67 Cum pia composito veherentur membra feretro,
 68 substratus meruit caecus habere diem.
 69 Anxius ille sacra lumen suscepit ab umbra
 70 et tua mors illi lucis origo fuit.
 71 Dumque sepulchra darent, oculi rediere sepulti
 72 et sopor ille tuus hunc vigilare facit.
 73 Cum fugis a mundo, datur illi lumine mundus,
 74 te linquente die hunc fugiunt tenebrae.
 75 Antiqui vultus lucem stupuere modernam
 76 et veteri fabricae prima tenestra venit.
 DE ENERGUMENO CONPEDITO SANATO ET SOLUTO
 77 Compedibus validis alter manicisque ligatus
 78 mox tetigit templum, ferrea vincla cadunt.
 79 Tam grave fragmentum - dolor est vel cernere poenam -
 80 pondera tot miseros sustinuisse pedes !
 81 Si conexa forent, elephantum solvere possent
 82 nec poterat rigidos ipse movere gradus.
 83 Non minus est illi quae subvertente procella
 84 litoribus libycis anchora fracta jacet.
 85 Poena quidem gravior cecidit crescente triumpho,

86 vincere rem saevam gloria major erat.
 87 Non habuit tot vincla pati miser ille ligatus,
 88 sed tua quo virtus plus mereretur opus.
 89 Cum solidarentur non sic strepuere catenae
 90 ceu tinniverunt, cum crepuere ferae.
 91 Quae fuit illa prius nimis male vincta catenis,
 92 jam tibi qui solvis libera dextra favet.
 93 Lignea vincla gerens alter confugit ad aulam,
 94 quae simili merito scissa repente cadunt.
 95 Nec mora. Vix tetigit sacrati limina templi,
 96 fit tonitrus caelis arma ferendo tibi.
 97 Grandia divisi ceciderunt pondera ligni
 98 et qui gessit onus conruit ipse simul.
 99 Expavit subito de libertate recepta
 100 atque magis timuit quando solutus erat.
 101 Quae ratio fuerit, cecidit cur pronus in arvis ?
 102 Gaudia magna quidem saepe timere solent.
 103 Dum stupet unde salus laceris est reddita plantis,
 104 admirante animo membra soluta fluunt.
 DE MULIERE DEBILI SANATA
 105 Inde vetus mulier, pariter nascente periclo,
 106 vulnere naturae mortua membra tulit.
 107 Inclusos digitos morbo numerante tenebat
 108 nec poterat ducto pollice fila dare.
 109 Secum nata quidem, sed non sua dextra pependit,
 110 corpore juncta suo res aliena fuit.
 111 Tempore sed tardo est, cum jam spes fracta jaceret,
 112 ante tuos tumulos vivificata manus.
 113 Sic inopinatum commendat gratia votum,
 114 desperata salus dulcior esse solet.
 115 Mobilis ergo venit digitis torpentibus umor
 116 et dispensatus fluxit in ungue vigor.
 117 Arida nervorum sese junctura tetendit
 118 agnovitque suum vena soluta locum.
 119 Apta ministeriis incepit palma moveri,
 120 servitium discens libera dextra fuit.
 121 Nec tantum profugas pietas tua reddidit artus
 122 reddidit et victum pensa trahente manu.
 DE PUELLA SIMILI INFIRMITATE SANATA
 123 Eripuisti aliam simili de peste puellam
 124 membraque restituens plus animae tribuis.
 125 Desponsata viro mortali lege jacebat,
 126 nunc thalamis Christi virgo dicata micat.
 127 Sponsa quidem radiat cum virginitate modesta,
 128 spe meliore fruens, nupta tenenda polis.
 129 Nec fructus uteri sterilis deperdit honesti,
 130 flore pudicitiae mater habenda placet.
 131 Adquirat cunctos natum quae non habet unum
 132 progeniemque sibi gignit amore Dei.
 item de puella simili infirmitate sanata
 133 Inde pari morbo deflenda infantia parvae
 134 in lucem veniens membra necata trahit.
 135 Mors et origo simul misero processit ab alvo,
 136 extinctam generans mater anghela manum.
 137 Commendata tuo rediit medicata sepulchro,
 138 quod de matre perit, de tumulo recipit.
 DE ALTERO CAECO INLUMINATO
 139 Dum jacet alter inops, visu caligine clauso,

140 caecus nec misero lumine lumen erat.
 141 Longa nocte oculos quarto jam mense premebat
 142 in lucem obscurus, vivus imago necis.
 143 Vocibus hunc medicis monuisti tempore somni
 144 tenderet ut velox ad tua templa gradum.
 145 Mox veniente die sed non sibi forfice pressa
 146 enituit Christi vertice tonsus ovis.
 147 Detrahit hic crines nitidos ut haberet ocellos
 148 et mercante coma munera lucis emat.
 149 Qui titubante gradu tractus pervenit ad aulam.
 150 Per biduum recubans ante sepulchra fuit.
 151 Tertia lux rediens nocturnas solverat umbras
 152 et caeco occurrit sic revocata dies.
 153 Undique limatae cecidere a fronte tenebrae.
 154 Sanguinis unda rigat, luminis atra lavat.
 155 Sicca lucerna novo flagrante refulsit olivo
 156 obtinuitque suum lux peregrina locum.
 DE MUTIS ETIAM AB EO SANATIS
 157 Quid referam mutis qui verbo verba dedisti ?
 158 Quod gravat eiciens, quod juvat omne locas.
 159 Cuncta nec enumero, tua me praeconia vincunt.
 160 Etsi non potui, velle fuisse vide.
 161 En tua templa colit nimio Sigibercthus amore,
 162 insistens operi promptus amore tui.
 163 Culmina custodi qui templum in culmine duxit,
 164 protege pro meritis qui tibi tecta dedit.
 165 Haec, pie, pauca ferens ego Fortunatus amore
 166 auxilium posco, da mihi vota, precor.

LIBER TERTIVS

AD EUFRONIUM EPISCOPUM

F3_1 [Oratio soluta]

AD EUNDEM

F3_2 [oratio soluta]

AD EUNDEM

F3_3 v.1 Quamvis pigra mihi jaceat sine fomite lingua
 2 nec valeam dignis reddere digna viris,
 3 attamen, alme pater, Christi venerande sacerdos
 4 Eufroni, cupio solvere parva tibi.
 5 Debeo multa quidem, sed suscipe pauca libenter :
 6 sit veniale precor quod tuus edit amor.
 7 Ecclesiae lampas sub te radiante coruscat,
 8 lumine pontificis fulget ubique tides.
 9 Gratia praecellens sincero in pectore vernat,
 10 quo nullus dolus est Israhelita vir es.
 11 Immaculata tibi feliciter actio currit,
 12 ut penetres caelos, haec via pandit iter.
 13 Dulcia conloquii sine fuco dicta refundis,
 14 non sic mella mihi quam tua verba placent.
 15 Quicquid habet sensus, hoc lingua serena relaxat,
 16 pectore sub vestro fraus loca nulla tenet.
 17 Qui sine felle manes in simplicitate columbae,
 18 nec serpens in te dira venena fovet.

19 Advena si veniat, patriam tu reddis amatam
 20 et per te proprias hic habet exul opes.
 21 Si quis iniqua gemit, tristis hinc nemo recedit,
 22 sed lacrimas removens laetificare facis.
 23 Martinus meritis hac vos in sede locavit.
 24 Dignus eras heres, qui sua jussa colis.
 25 Ille tenet caelum largo dans omnia voto,
 26 junctus eris Christo hunc imitando virum.
 27 Non perit hic vestrum qui grex ad ovile recurrit,
 28 candida nec spinis vellera perdit ovis.
 29 Non lupus ore rapit praedam pastore vigente,
 30 sed fugit exclusus non lacerando greges.
 31 Haec tibi lux maneat longos, venerande, per annos
 32 atque futura dies lucidiora ferat.

AD FELICEM EPISCOPUM NAMNETICUM

F3_4 v.1 Si veniant linguae pariter graeca atque latina,
 2 pro meritis nequeunt solvere cuncta tuis.
 3 Laudibus obsessus, votis venerandus haberis,
 4 Felix. Qui sensus luce perennis eris.

ITEM AD FELICEM EPISCOPUM EX NOMINE SUO

F3_5 v.1 Fida salus patriae, Felix spe, nomine, corde,
 2 ordo sacerdotum quo radiante micat,
 3 restituis terris quod publica jura petebant,
 4 temporibus nostris gaudia prisca ferens.
 5 Vox procerum, lumen generis, defensio plebis,
 6 naufragium prohibes hic ubi portus ades.
 7 Actor apostolicus qui jura britannica vincens,
 8 tutus in adversis, spe crucis arma fugas.
 9 Vive, decus patriae, fidei lux, auctor honoris,
 10 splendor pontificum, noster et orbis amor.

ITEM AD FELICEM EPISCOPUM DE DEDICATIONE ECCLESIAE SUAE

F3_6 v.1 Cum Salomon coleret generosi encaenia templi,
 2 Israhel electos fecit adesse viros.
 3 Levitas, proceres, pueros, juvenesque senesque
 4 undique certatim regia pompa trahit.
 5 Mactantur vituli, tauri jugulantur ad aras
 6 et populi in votis gaudia caedis erant.
 7 Nunc vero adsurgit ritu placitura beato,
 8 tempore decurso, justior ara Deo.
 9 Prospera quae populis Felix modo festa ministrans
 10 exsuperat rebus gesta priora novis.
 11 Convocat egregios sacra ad sollemnia patres
 12 quo stat vera salus et fugit umbra vetus :
 13 docti clave Petri caelos aperire petenti
 14 ac monitis Pauli noscere clausa poli.
 15 Ne lupus intret oves neu morbus inulceret agnos
 16 hinc sunt custodes, inde medella gregis.
 17 Quorum vox refluens populo de fonte salutis,
 18 ut bibat aure fidem, porrigit ore salem.
 19 Inter quos medios Martini sede sacerdos
 20 Eufronius fulget metropolitana sacer,
 21 plaudens in sancta fratrum coeunte corona
 22 et sua membra videns fortior exstat apex.
 23 Laetius inde caput, quia sunt sua viscera secum,
 24 ecclesiae juncto corpore crescit honor.

25 Domitianus, item Victorius, ambo columnae,
 26 spes in utrisque manens pro regionis ope.
 27 Domnulus hinc fulget meritis, Romacharius inde
 28 jure sacerdotii cultor uterque Dei.
 29 En spectata diu, data nunc memoranda per aevum,
 30 votis plena piis fulget in urbe dies
 31 in qua promeruit sua gaudia cernere pastor
 32 officioque sacro reddere vota Deo.
 33 Tempore qui longo adventu pendebat in isto
 34 despiciens aliud - hoc erat omnis amor -
 35 omnia tuta timens suspecto in tramite vitae,
 36 ne prius iret iter quam daret ista Deo.
 37 Saepius occultans suspiria lassa trahebat,
 38 cederet ut Dominus hoc properare decus.
 39 Anxius incerto curarum fasce laborans
 40 dum votum spectat, pondera tempus erant.
 41 Sed jam festus adest, solvatur sarcina curae,
 42 laetitiae cumulus triste repellat onus.
 43 Prospera dans populis et gaudia larga per urbem
 44 Felix felici cum grege pastor age.
 45 Hinc te pontifices circumdant, inde ministri,
 46 cingit te totum hinc honor, inde favor.
 47 Clericus ecce choris resonat, plebs inde coraulis :
 48 quisque tuum votum qua valet arte canit.
 49 Tarda fuere tibi quia fit mora semper amanti,
 50 res sublimis enim tarda, sed ampla venit.
 51 Nunc Domini laudes inter tua classica canta
 52 et Trinitatis opem machina trina sonet.
 53 Adde medullata in templis holocausta sacerdos
 54 quo diuturna mices hostia pura Deo.

IN HONORE EORUM QUORUM IBI RELIQUIAE CONTINENTUR ID EST PETRI ET PAULI NAMNITAS

F3_7 v.1 Siderei montes, speciosa cacumina Sion,
 2 a Libano gemini flore comante cedri,
 3 caelorum portae, lati duo lumina mundi,
 4 ore tonat Paulus, fulgorat arce Petrus.
 5 Inter apostolicas radianti luce coronas
 6 doctior hic monitu, celsior ille gradu.
 7 Per hunc corda hominum reserantur et astra per illum,
 8 quos docet iste stilo, suscipit ille polo.
 9 Pandit iter caeli hic dogmate, clavibus alter,
 10 est via cui Paulus, janua fida Petrus.
 11 Hic petra firma manens, ille architectus habetur,
 12 surgit in his templum quo placet ara Deo.
 13 Uno fonte pares medicata fluenta rigantes
 14 restingunt avidam dulce liquore sitim.
 15 Fortia bella gerens quisquis cupit astra tenere,
 16 rex dedit hos proceres militis esse duces.
 17 Gallia, plaude libens, mittit tibi Roma salutem,
 18 fulgor apostolicus visitat Allobrogas.
 19 A facie hostili duo propugnacula praesunt
 20 quos fidei turres urbs caput orbis habet.
 21 Hi radiant oculi pretioso in corpore Christi
 22 lumine qui proprio cetera membra regunt.
 23 Munere Felicis caeli cape, Gallia, fruges
 24 pontificisque tui vota beata cole
 25 cujus castus amor dedit hanc in honore superno
 26 ecclesiae nuptae dote perenne domum.

27 Vertice sublimi patet aulae forma triformis
 28 nomine apostolico sanctificata Deo.
 29 Quantum inter sanctos meritum supereminet illis,
 30 celsius haec tantum culmina culmen habent.
 31 In medium turritus apex super ardua tendit
 32 quadratumque levans crista rotundat opus.
 33 Altius, ut stupeas, arce ascendente per arcus
 34 instar montis agens aedis acumen habet.
 35 Illic expositos fucis animantibus artus
 36 vivere picturas arte reflante putas.
 37 Sol vagus ut dederit per stagnea tecta colorem,
 38 lactea lux resilit, cum rubor inde ferit.
 39 Ire redire vides radio crispante figuras
 40 atque lacunar agit quod maris unda solet.
 41 Fulgorem astrorum meditantur tecta metallo
 42 et splendore suo culmina sidus habent.
 43 Luna coronato quotiens radiaverit ortu,
 44 alter ab aede sacra surgit ad astra jubar.
 45 Si nocte inspiciat hanc praetereundo viator,
 46 et terram stellas credit habere suas.
 47 Tota rapit radios patulis oculata fenestris
 48 et quod mireris hic foris intus habes.
 49 Tempore quo redeunt tenebrae, mihi dicere fas sit,
 50 mundus habet noctem, detinet aula diem.
 51 Dextera pars templi meritis praefulget Hilari,
 52 compare Martino consociante gradum.
 53 Gallia sic proprios dum fudit ubique patronos
 54 quos hic terra tegit, lumina mundus habet.
 55 Altera Ferreoli pars est qui vulnere ferri
 56 munere martyrii gemma superba nitet.
 57 Obtulit haec Felix, ut sit magis ipse sacerdos,
 58 Christe, tuum templum qui tibi templa dedit.

ITEM AD EUNDEM IN LAUDE

F3_8 v.1 Inluxit festiva dies, me gaudia cogunt
 2 ut quod plebs poterat solus amore loquar.
 3 Ultima quamvis sit regio Armoricus in orbe,
 4 Felicis merito cernitur esse prior.
 5 Miserunt similes Oriens et Gallia sortes,
 6 illa micat radiis solis et ista tuis.
 7 Nam splendore novo sua munera quisque ministrat :
 8 tu fers Oceano lumen et ille rubro.
 9 Denique si sensus clara pro lampade fulget,
 10 ingenium vestrum luminis instar habet.
 11 Maxima progenies titulis ornata vetustis
 12 cujus et a proavis gloria celsa tonat.
 13 Nam quicumque potens Aquitanica rura subegit,
 14 extitit ille tuo sanguine luciparens.
 15 Germinis antiqui venerabile culmen in orbe,
 16 laudibus in cujus militat omne decus,
 17 flos generis, tutor patriae, correctio plebis,
 18 eloquii flumen, fons salis, unda loquax,
 19 semita doctrinae, jus causae, terminus irae,
 20 cujus in ingenium hic nova Roma venit.
 21 Illic quod poterat per plures illa docere
 22 te contenta suo Gallia cive placet.
 23 Ornamenta geris gemino fulgentia dono
 24 et te concelebrant hinc opus, inde genus.

25 Sed qui terrena de nobilitate nitebas
 26 ecclesiam nunc spe nobiliore regis.
 27 Cujus ad ornatum, bone cultor, jugiter instans,
 28 ut jam multa Deo splendida dona dares,
 29 nupsisti ecclesiae, felicia vota jugasti,
 30 hanc qui matronam dote potente reple.

31 Cujus in amplexu ducis sine crimine vitam
 32 altera nec mulier corde recepta fuit.
 33 Hanc oculis, animo retines et corde pudico,
 34 unde tibi nupsit, castior inde manet.
 35 Illa tibi prolem peperit, sed corpore virgo,
 36 et populum gremio fudit amata tuo.
 37 Ecce tuos natos divina ex conjugate sumptos
 38 et modo te gaudent quos patris umbra tegit.
 39 Proque salute gregis pastor per conpetata curris
 40 exclusoque lupo tuta tenetur ovis.
 41 Insidiatores removes vigil arte Britannos,
 42 nullius arma valent quod tua lingua tacit.
 43 Tu quoque jejunis cibus es, tu panis egenti,
 44 quae sibi quisque cupit hic sua vota videt.
 45 Divitias proprias in pauperis ore recondis,
 46 largas mendici ventre reponis opes.
 47 Tempore quo veniet Christus, tunc omnia vobis
 48 iudicis in facie sacculus iste refert.
 49 Sit tibi fixa salus numerosos ampla per annos
 50 perpetuo Felix nomine, mente, fide.

AD FELICEM EPISCOPUM DE PASCHA

F3_9 v.1 Tempora florifero rutilant distincta sereno
 2 et majore poli lumine porta patet.
 3 Altius ignivomum solem caeli orbita ducit
 4 qui vagus Oceanas exit et intrat aquas.
 5 Armatis radiis elementa liquentia lustrans
 6 adhuc nocte brevi tendit in orbe diem.
 7 Splendida sincerum producunt aethera vultum
 8 laetitiamque suam sidera clara probant.
 9 Terra favens vario fundit munuscula fetu,
 10 cum bene vernaes reddidit annus opes.
 11 Mollia purpureum pingunt violaria campum,
 12 prata virent herbis et micat herba comis.
 13 Paulatim subeunt stellantia lumina florum
 14 arridentque oculis gramina tincta suis.
 15 Semine deposito lactans seges exilit arvis,
 16 spondens agricolae vincere posse famem.
 17 Caudice desecto lacrimat sua gaudia palmes,
 18 unde merum tribuat dat modo vitis aquam.
 19 Cortice de matris tenera lanugine surgens
 20 praeparat ad partum turgida gemma sinum.
 21 Tempore sub hiemis foliorum crine revulso.
 22 Jam reparat viridans frondea tecta nemus.
 23 Myrta, salix, abies, corylus, siler, ulmus, acernus
 24 plaudit quaeque suis arbor amoena comis.
 25 Constructura favos apis hinc alvearia linquens
 26 floribus instrepitans poplite mella rapit.
 27 Ad cantus revocatur aves quae carmine clauso
 28 pigrior hiberno frigore muta fuit.
 29 Hinc filomela suis adtemperat organa cannis
 30 fitque repercusso dulcior aura melo.

31 Ecce nascentis testatur gratia mundi
32 omnia cum Domino dona redisse suo.
33 Namque triumphanti post tristia Tartara Christo
34 undique fronde nemus, gramina flore favent.
35 Legibus inferni oppressis super astra meantem
36 laudant rite Deum lux, polus, arva, fretum.
37 Qui crucifixus erat Deus ecce per omnia regnat
38 dantque creatori cuncta creata precem.
39 Salve, festa dies, toto venerabilis aevo
40 qua Deus infernum vicit et astra tenet,
41 nobilitas anni, mensum decus, arma dierum,
42 horarum splendor, scripula, puncta fovens.
43 Hinc tibi silva comis plaudit, hinc campus aristis,
44 hinc grates tacito palmitis vitis agit.
45 Si tibi nunc avium resonant virgulta susurro,
46 has inter minimus passer amore cano.
47 Christe, salus rerum, bone conditor atque redemptor,
48 unica progenies ex deitate patris,
49 inrecitabiliter manans de corde parentis,
50 verbum subsistens et penetrare potens,
51 aequalis, concors, socius, cum patre coaevus,
52 quo sumpsit mundus principe principium,
53 aethera suspendis, sola congeris, aequora fundis
54 quaeque locis habitant quo moderante vigent.
55 Qui genus humanum cernens mersisse profundo,
56 ut hominem eriperes es quoque factus homo.
57 Nec voluisti etenim tantum te corpore nasci,
58 sed caro quae nasci pertulit atque mori.
59 Funeris exequias pateris, vitae auctor et orbis,
60 intras mortis iter dando salutis opem.
61 Tristia cesserunt infernae vincula legis
62 expavitque chaos luminis ore premi.
63 Depereunt tenebrae Christi fulgore fugatae
64 et tetrae noctis pallia crassa cadunt.
65 Pollicitam sed redde fidem, precor, alma potestas,
66 tertia lux rediit, surge, sepulte meus !
67 Non decet ut humili tumulo tua membra tegantur
68 neu pretium mundi vilia saxa premant.
69 Indignum est cujus clauduntur cuncta pugillo
70 ut tegat inclusum rupe vetante lapis.
71 Linthea tolle, precor, sudaria linque sepulchro
72 tu satis es nobis et sine te nihil est.
73 Solve catenatas inferni carceris umbras
74 et revoca sursum quicquid ad ima ruit.
75 Redde tuam faciem, videant ut saecula lumen,
76 redde diem qui nos te moriente fugit.
77 Sed plane implesti remeans, pie victor, ad orbem,
78 Tartara pressa jacent nec sua jura tenent.
79 Inferus insaturabiliter cava guttura pandens
80 qui rapuit semper fit tua praeda, Deus.
81 Eripis innumerum populum de carcere mortis
82 et sequitur liber quo suus auctor adit.
83 Evomit absorptam trepide fera belua plebem
84 et de fauce lupi subtrahit agnus oves.
85 Hinc tumulum repetens, post Tartara carne resumpta,
86 belliger ad caelos ampla trophea refert.
87 Quos habuit poenale chaos jam reddidit in te
88 et quos mors peteret, hos nova vita tenet.

89 Rex sacer, ecce tui radiat pars magna triumphi,
 90 cum puras animas sancta lavacra beant.
 91 Candidus egreditur nitidis exercitus undis
 92 atque vetus vitium purgat in amne novo.
 93 Fulgentes animas vestis quoque candida signat
 94 et grege de niveo gaudia pastor habel.
 95 Additur hac Felix consors mercede sacerdos
 96 qui dare vult Domino dupla talenta suo.
 97 Ad meliora trahens gentili errore vagantes,
 98 bestia ne raperet, munit ovile Dei.
 99 Quos prius Eva nocens infecerat, hos modo reddit
 100 ecclesiae pastos ubere, lacte, sinu,
 101 mitibus alloquiis agrestia corda colendo,
 102 munere Felicis de vepre nata seges.
 103 Aspera gens, saxo vivens quasi more ferino,
 104 te medicante, sacer, belua reddit ovem.
 105 Centeno reditu tecum mansura per aevum
 106 messis abundantis horrea fruge replens.
 107 Inmaculata tuis plebs haec vegetetur in ulnis
 108 atque Deo purum pignus ad astra feras.
 109 Una corona tibi de te tribuatur ab alto,
 110 altera de populo vernet adepta tuo.

DE DOMNO FELICE NAMNETICO CUM FLUVIUM ALIBI DETORQUERET
 F3_10 v.1 Cedant antiqui quicquid meminere poetae :
 2 vincuntur rebus facta vetusta novis.
 3 Includi fluvios si tunc spectasset Homerus,
 4 inde suum potius dulce replisset opus :
 5 cuncti Felicem legerent modo, nullus Achillem
 6 nomine sub cuius cresceret artis honor,
 7 qui probus ingenio mutans meliore rotatu
 8 currere prisca facis flumina lege nova.
 9 Aggere composito removens in gurgite lapsum
 10 quo natura negat cogis habere viam.
 11 Erigis hic vallem subdens ad concava montem
 12 et vice conversa haec tumet, ille jacet.
 13 Altera in alterius migravit imagine forma :
 14 mons in valle sedet, vallis ad alta subit.
 15 Quo fuit unda fugax, crevit pigro obice terra
 16 et quo prora prius, huc modo plaustra meant.
 17 Collibus adversis flexas superinvehis undas
 18 et fluvium docilem monte vetante trahis.
 19 Qua rapidus flueret, veniens celer amnis obhaesit
 20 et subito nato colle retorsit iter.
 21 Quae prius in praiceps veluti sine fruge rigabant,
 22 ad victum plebis nunc famulantur aquae.
 23 Altera de fluvio metitur seges orta virorum,
 24 cum per te populo parturit unda cibum.
 25 Qualiter incertos hominum scis flectere motus
 26 qui rapidos fontes ad tua frena regis ?
 27 Stet sine labe tibi, Felix, pia vita per aevum,
 28 cuius ad imperium transtulit unda locum.

DE NICETIO EPISCOPO TREVERENSI
 F3_11 v.1 Splendor, apex fidei, venerabile mente Niceti,
 2 totius orbis amor pontificumque caput,
 3 summus apostolico praecellens pastor ovili
 4 auxisti meritis quicquid honoris habes.

5 Divino insistens operi terrena relinquis :
 6 cui moritur mundus, non moriture manes.
 7 Vita brevis cunctis, sed non brevis illa beatis :
 8 cum bona non pereant, jure perennis eris.
 9 Dum tibi restrictus maneas et largus egenis,
 10 quod facis in minimis te dare crede Deo.
 11 Captivus quicumque redit sua limina cernens
 12 ille lares patrios, tu capis inde polos.
 13 Hic habet exul opem, jejunans invenit escas
 14 qui venit esuriens hinc satiatus abit.
 15 Tristibus inponis curas purgando querellas
 16 et sanat cunctos una medella viros.
 17 Pauperis hinc lacrimas desiccas gaudia praestans :
 18 qui prius ingemuit vota salutis habet.
 19 Te pascente greges numquam lupus abripit agnos,
 20 sunt bene securi quos tua caula tegit.
 21 Templata vetusta Dei revocasti in culmine prisco
 22 et floret senior te reparante domus.
 23 Hic populis longos tribuas pia vota per annos
 24 et maneas pastor, ne lacerentur oves.

F3_12 v.1 ITEM DE CASTELLO EIUSDEM SUPER MOSELLA
 2 Mons in praecipiti suspensa mole tumescit
 3 et levat excelsum saxea ripa caput.
 4 Rupibus expositis intonsa cacumina tollit
 5 tutus et elato vertice regnat apex.
 6 Proficiunt colli quae vallibus arva recedunt,
 7 undique terra minor vergit et iste subit.
 8 Quem Mosella tumens, Rodanus quoque parvulus ambit
 9 certanturque suo pascere pisce locum.
 10 Diripiunt dulces alibi vaga flumina fruges.
 11 Haec tibi parturiunt, Mediolane, dapes.
 12 Quantum crescit aquis, pisces vicinibus offert ;
 13 exhibet hinc epulas unde rapina venit.
 14 Cernit frugiferos congaudens incola sulcos,
 15 vota ferens segeti fertilitate gravi.
 16 Agricolae pascunt oculos de messe futura,
 17 ante metit visu quam ferat annus opem.
 18 Ridet amoenus ager tectus viridantibus herbis,
 19 oblectant animos mollia prata vagos.
 20 Hoc vir apostolicus Nicetius ergo peragrans
 21 condidit optatum pastor ovile gregi.
 22 Turribus incinxit ter denis undique collem.
 23 Praebuit hic fabricam quo nemus ante fuit.
 24 Vertice de summo demittunt brachia murum,
 25 dum Mosella suis terminus extet aquis.
 26 Aula tamen nituit constructa cacumine rupis
 27 et monti inposito mons erit ipsa domus.
 28 Conplacuit latum muro concludere campum
 29 et prope castellum haec casa sola facit.
 30 Ardua marmoreis suspenditur aula columnis
 31 qua super aestivas cernit in amne rates.
 32 Ordinibus ternis extensaue machina crevit
 33 ut, postquam ascendas, jugera tecta putes.
 34 Turris ab adverso quae constitit obvia clivo :
 35 sanctorum locus est, arma tenenda viris.
 36 Ulic est etiam gemino ballista volatu
 37 quae post se mortem linquit et ipsa fugit.

37 Ducitur in rigidis sinuosa canalibus unda
 38 ex qua fert populo hic mola rapta cibum.
 39 Blandifluas stupidis induxit collibus uvas :
 40 vinea culta viret quo fuit ante frutex.
 41 Insita pomorum passim plantaria surgunt
 42 et pascunt vario flores odore locum.
 43 Haec tibi proficiunt quicquid laudamus in illis
 44 qui bona tot tribuis, pastor opime gregis.

AD VILICUM EPISCOPUM METTINSEM

F3_13 v.1 Gurgite caeruleo pelagus Mosella relaxat
 2 et movet ingentes molliter amnis aquas.
 3 Lambit odoriferas vernanti gramine ripas
 4 et lavat herbarum leniter unda comas.
 5 Hinc dextra de parte fluit qui Salia fertur,
 6 flumine sed fluctus pauperiore trahit.
 7 Hic ubi perspicuis Mosellam cursibus intrat,
 8 alterius vires implet et ipse perit.
 9 Hoc Mettis fundata loco speciosa, coruscans
 10 piscibus obsessum gaudet utrumque latas.
 11 Deliciosus ager ridet vernantibus arvis :
 12 hinc sata culta vides, cernis at inde rosas.
 13 Prospicis umbroso vestitos palmitum colles,
 14 certatur varia fertilitate locus.
 15 Urbs munita nimis quam cingit murus et amnis,
 16 pontificis merito stas valitura magis.
 17 Vilicus, aetheriis qui sic bene militat armis,
 18 stratus humi genibus te levat ille suis.
 19 Unde humilis terris te proicis, alme sacerdos,
 20 orando hinc patriae ducis ad astra caput.
 21 Fletibus adsiduis adquiris gaudia plebi :
 22 pastoris lacrimis laetificantur oves.
 23 Ictibus invalidis quamvis minuetur iniquus,
 24 tu quibus es murus, vulnera nulla timent
 25 et licet incluso lupo insidietur ovili,
 26 te custode gregis, nil ibi praedo nocet.
 27 Oblectas populos vultu sine nube sereno
 28 cunctorumque animos gratia blanda fovet.
 29 Si poscat novus hospes opem tu porrigis escas
 30 invenit et proprios ad tua tecta lares.
 31 Dum satias querulum, magis obliviscitur illas
 32 quas habet in patriis finibus exul opes.
 33 Qui sua damna refert, gemitus subducis ab ore,
 34 gaudia restituens tristia cuncta fugas.
 35 Protegis hinc nudos, illinc tu pascis egentes.
 36 Nil tibi reddit inops, reddit amore Deus.
 37 Horrea praemittis, melius tua condita servans :
 38 quas sic diffundis dat paradisi opes.
 39 Culmina templorum renovasti, Vilice cultor :
 40 cum veniet Dominus, stat labor ecce tuus.
 41 Commisum video non suffodisse talentum,
 42 sed magis aptatum multiplicatur opus.
 43 Longius extensos peragas tam digna per annos
 44 et maneat semper nomen, opime, tuum.
 ITEM AD EUNDEM
 45 Pastor opime gregis, cunctis tua pabula prosunt.
 46 Qui satias animas, quam bene membra foves !
 47 Sic avidos reddis convivas nectare lactis,

48 ut scutella levet quod cocleare solet.
 ITEM AD EUNDEM
 49 Currit ovis repetens a te sua pascua, pastor.
 50 Qui cibus esse soles. Da mihi panis opem.
 DE PICTURA UITIS IN MENSA EIUS DICTUM
 51 Vitibus intextis ales sub palmite vernat
 52 et leviter pictas carpit ab ore dapes.
 53 Multiplices epulas meruit conviva tenere :
 54 aspicit hinc uvas, inde falerna bibit.
 DE PISCIBUS IN MENSA EIUS
 55 Retia vestra, pater, oneroso pisce redundant :
 56 apparet Petri vos meruisse vices.

DE PONTIFICE CARENTINO COLONIAE
 F3_14 v.1 Carentine, decus fidei, Deitatis amice,
 2 nomine de proprio care, perennis amor,
 3 pontificem pollens Agripina Colonia praefert,
 4 frugiferis agris digne colone Dei.
 5 Si videas aliquos quacumque ex gente creatos,
 6 quamvis ignotos mox facis esse tuos.
 7 Quos semel affectu adstringis pietate paterna
 8 ulterius numquam dissociare potes,
 9 nec subito veniens veluti fugitiva recedit,
 10 sed concessa cito gratia fixa manet.
 11 Verba Dei complens sicut te diligis ipsum,
 12 a te ita diligitur proximus omnis homo.
 13 Vocis apostolicae sectator dignus haberis
 14 quae caros animos praeposuit fidei.
 15 Tranquillus, placidus, mitis, sine nube serenus,
 16 cui rabies mundi nil dominare potest.
 17 Pectora cunctorum reficis dulcedine verbi,
 18 laetificas vultu tristia corda tuo.
 19 Pauperibus cibus es, sed et esurientibus esca,
 20 rite pater populi dando salutis opem.
 21 Aurea templa novas pretioso fulta decore :
 22 tu nites unde Dei fulget honore domus.
 23 Majoris numeri quo templa capacia constant,
 24 alter in excelso pendulus ordo datur.
 25 Sollicitat pia cura gregis te, pastor opime,
 26 nil lupus ab stabulis quo vigilante rapit.
 27 Tempora longaevo teneas felicia tractu
 28 et per te Domini multiplicentur oves.

DE IGIDIO EPISCOPO REMORUM
 F3_15 v.1 Actibus egregiis venerabile culmen, Igidi,
 2 ex cuius meritis crevit honore gradus,
 3 subtrahor ingenio, compellor amore parato
 4 laudibus in vestris prodere pauca favens.
 5 Namque reus videor tantis existere causis,
 6 si solus taceam quicquid ubique sonat.
 7 Sed quamvis nequeam digno sermone fateri,
 8 da veniam voto me voluisse loqui.
 9 Exiit in mundo gestorum fama tuorum
 10 et meritis propriis sidus in orbe micat.
 11 Clarior effulget quam Lucifer ore sereno :
 12 ille suis radiis, tu pietate nites.
 13 Nil lupus insidiis cauto subducit ovili,
 14 te pastore sacro pervigilante gregem.

15 Facundo eloquio caelestia dogmata fundis,
 16 ecclesiae crevit te monitore domus.
 17 Pontificis studio correctio plebis haberis ;
 18 ne tenebrae noceant, semita lucis ades.
 19 Cunctorum recreas animos dulcedine verbi,
 20 qui satias epulis, pascis et ore greges.
 21 Praecepta implentur : non solo pane cibamur ;
 22 delicias capimus quas tua verba ferunt.
 23 Ut gaudet corpus cui mitior esca paratur,
 24 sic animae gaudent si tua lingua sonet.
 25 Heresis ira cadit, forti te milite Christi,
 26 adquiris regi qui dedit arma tibi,
 27 qui purgas spinis agros sermone colente,
 28 et mundata Deo surgit ubique seges.
 29 Qui venit huc exul, tristis, defessus, egenus,
 30 hic recipit patriam, te refovente, suam.
 31 Quae doluit tollis, gemitus in gaudia vertens,
 32 exilium removes. Reddis amore lares.
 33 Pauper habere cibum, meruit quoque nudus amictum,
 34 invenit hic semper quae bona quisque cupit.
 35 Consultum tribuis generaliter omnibus unum,
 36 qui populi pater es, tot pia rite regis.
 37 Haec tibi vita diu, Domino tribuente, supersit
 38 atque futura micet lucidiore die.

AD HILARIUM

F3_16 v.1 Lux sincera animi, semper mihi dulcis Hilari,
 2 quamvis absentem quem mea cura videt,
 3 cujus honestus amor tantum mea corda replevit,
 4 ut sine te numquam mente vacante loquar,
 5 versibus exiguis mandamus vota salutis :
 6 quae dedit affectus sint tibi cara, precor.

DE BERTECHRAMNO EPISCOPO, CUM ELEVARETUR IN CURRUM

F3_17 v.1 Curriculi genus est memorat quod Gallia redam.
 2 Molliter incedens orbita sulcat humum,
 3 exiliens duplici bijugo volat axe citato
 4 atque movet rapidas juncta quadriga rotas.
 5 Huc ego dum famulans comitatu jungor eodem
 6 et mea membra cito dum veherentur equo,
 7 pontificisque sacri Bertechramni actus honore,
 8 conprendente manu raptus in axe levor.
 9 Qualiter implumes fetus pia mater hirundo
 10 confovet et placide pinnula tensa tegit,
 11 sic bonitate potens, affectu dives opimo,
 12 in proprium pastor molle sedile locat.
 13 Nec solum amplectens pia mens, sed diligit omnes :
 14 unde magis populis unicus extat amor.

ITEM AD EUNDEM DE OPUSCULIS SUIS

F3_18 v.1 Ardua suscepi missis epigrammata chartis
 2 atque cothurnato verba rotata sofo.
 3 Percurrens tumido spumantia carmina versu,
 4 credidi in undoso me dare vela freto :
 5 plana procellosos ructavit pagina fluctus
 6 et velut Oceanas fonte refudit aquas.
 7 Vix modo tam nitido pomposa poemata cultu
 8 audit Trajano Roma verenda foro.

9 Quid si tale decus recitasses in aure senatus ?
 10 Stravissent plantis aurea fila tuis.
 11 Per loca, per populos, per compita cuncta videres
 12 currere versiculos plebe favente tuos.
 13 Sed tamen in vestro quaedam sermone notavi
 14 carmine de veteri furta novella loqui,
 15 ex quibus in paucis superaddita syllaba fregit
 16 et pede laesa suo musica cloda gemit.
 17 Nunc, venerande pater, prece, voto, voce saluto,
 18 commendans animum supplice corde meum.
 19 Sit tua vita diu, cujus modulante Camena
 20 cogimur optatis reddere verba jocis.

AD AGRICOLAM EPISCOPUM

F3_19 v.1 Praesul, honoris apex, generis fideique cacumen,
 2 cultor agri pollens, pastor opime gregis,
 3 cum mea terra manu meruit genitoris arari,
 4 reddatur nati vomere culta sui.
 5 Nam pater, affectu dulci memorabilis orbi,
 6 me vobiscum uno fovit amore duos.
 7 Corde parens, pastu nutrix, bonus ore magister,
 8 dilexit, coluit, rexit, honesta dedit.
 9 Ille pio studio sulcata novalia sevit :
 10 quod pater effudit hoc mihi semen ale.

AD FELICEM EPISCOPUM BITURIGUM SCRIPTUM IN TURREM EIUS

F3_20 v.1 Quam bene juncta decent, sacrati ut corporis agni
 2 margaritum ingens aurea dona ferant !
 3 Cedant chrysolitis Salomonia vasa metallis,
 4 ista placere magis ars facit atque fides.
 5 Quae data, Christe, tibi Felicis munera sic sint
 6 qualia tunc tribuit de grege pastor Abel
 7 et cujus tu corda vides, pietate coaeques
 8 Siraptae merito quae dedit aera duo.

DOMINO SANCTO PATRI AUITO PAPAE FORTUNATUS HUMILIS

F3_21 v.1 Officiis intente piis, pater urbis Avite,
 2 gloria pontiticum, noster et altus amor,
 3 per quem plebs, regio, peregrinus et hospes aluntur,
 4 in quo cuncta capit quae sibi quisque cupit.
 5 Ex opere inmeritus merui pia dona patroni,
 6 ne minimam pascens inmemor esses ovem.
 7 Qui trahis ore greges aeterna ad pabula Christi,
 8 qualiter hinc vivant est quoque cura tui.
 9 Semper et absentes praesens tua protegit ala :
 10 quo pede non curris, munere totus ades.
 11 Muneribus vestris laudem Agnes aut Radegundes
 12 multiplici orantes fomite vocis agunt.
 13 Ad caelos penetranda seras, pater alte, talenta
 14 quae centena suo tempore culta metas.
 15 Per dominum regemque bonum precor, aulice praesul,
 16 ut Fortunati sis memor, alme, tui.

AD EUNDEM

F3_22 v.1 Paruimus jussis, sacer ac venerande sacerdos
 2 et pater, imperiis, dulcis Avite, tuis.
 3 Garrulitate levi potius stridente cicuta
 4 quam placeat liquido nostra camena melo.

5 Sed tamen ut veniam tribuas, pietatis amator
 6 intende obsequium nec trutinato sophum.
 7 Munere pro magno modicus haec parvula solvo :
 8 pensetur votis est cui lingua rudis.

ITEM AD EUNDEM

9 Virtutum quid celsa fides mereatur honoris,
 10 summe sacerdotum, dulcis Avite, probas,
 11 qui nectens animos cunctorum in amore beato
 12 post te, care pater, pectora capta trahis.
 13 Sed tamen inter eos tua quos dulcedo replevit,
 14 promptus in affectu portio major agor.
 15 Lumen dulce meum, patriae vigor, altor egentum,
 16 spes peregrinorum, ductor honorque patrum,
 17 si mea vox jugi resonaret acumine carmen,
 18 laude minor loquerer, major amore, pater.
 19 Maxima sed nostri datur haec occasio voti
 20 vel memorare tuum nomen, opime, sacrum.
 21 Commendantur item vestrae pietatis amori
 22 Agnes voce humili cum Radegunde pari.
 23 Larga salutiferos vigeat tibi vita per annos :
 24 nam tua quae fuerit fit mea, care, salus.

DE DOMNO AGERICO EPISCOPO DE VEREDUNO

F3_23 v.1 Urbs Vereduna, brevi quamvis claudaris in orbe,
 2 pontificis meritis amplificata places.
 3 Major in angusto praefulget gratia gyro,
 4 Agerice, tuus quam magis auxit honor.
 5 Plurima magnarum fudisti semina laudum
 6 quae matura operis fertilitate metes.
 7 Tempore praesenti victum largiris egenis,
 8 unde futura dies centuplicabit opes.
 9 Dogmatis arcani reseras penetrabilia pastor,
 10 nec solum dapibus, pascis et ore greges.
 11 Templata vetusta novas pretiosius et nova condis :
 12 cultior est Domini, te famulante, domus.
 13 Egregios fontes sacri baptismatis explens,
 14 tam pia divino fonte repletus agis.
 15 Candida sincero radiat haec aula sereno
 16 et si sol fugiat, hic manet arte dies.
 17 Ad nova templa avidae concurrunt undique plebes
 18 et tribuis populis plus in amore Deum.
 19 Te solamen inops meruit, te nudus amictum
 20 et solus cunctis potus et esca manes.
 21 Felix qui meritis, aeternae lucis amator,
 22 tempore tam modico non moritura paras.
 23 *ITEM DE AGERICO EPISCOPO DE VEREDUNO*
 24 Phoebus ut elatum suspendit in aethera currum
 25 purus et igniferum spargit ubique jubar,
 26 effusus radiis totum sibi vindicat orbem,
 27 montes, plana replens, ima vel alta tenet.
 28 Sic, praesul, splendore animi cum sole coruscas :
 29 ille suis radiis fulget et ipse tuis.
 30 Agerice sacer, cujus sermone colente
 31 ecclesiae segetes fertilitate placent,
 32 terrenis sterilis rebus, fecunde supernis,
 33 humana spernens, dives iture polis,
 34 inlecebris mundi mundus, lasciva repellens,
 35 nil cui subripuit carnis amarus amor.

35 Lubrica culpa perit neque mors de crimine gaudet,
 36 cum tua delictis libera membra vides.
 37 In templis habitando piis sic purus haberis
 38 ut tua corda, pater, sint pia templa Dei.
 39 Eligit in tali Christus se vase recondi :
 40 quam sibi purgavit possidet ipse domum.
 41 Non dolus in labiis nec sunt fera nubila mentis :
 42 sinceris animis vernat in ore dies.
 43 Doctilocum flumen salienti fonte refundis
 44 et sensus steriles voce rigante foves.
 45 Ardua caelorum pandis mysteria terris
 46 per quem plus Dominum scit, timet, orat, amat.
 47 Dogmate divino, praesul facunde, triumphas,
 48 dans pastor monitis ne premat error oves.
 49 Deliciis reficis quas caelum arva unda ministrat,
 50 et satiat populos hinc cibus, inde fides.
 51 Sumit pauper opem, tristis spem, nudus amictum :
 52 omnia quicquid habes omnibus esse facis.
 53 Hic tibi longa salus maneat, licet inde tutura,
 54 atque diu, pastor, pro grege vota feras.

F3_24 v.1 AD VIRUM VENERABILEM ANFIONEM PRESBYTERUM
 2 Vir pietate calens, blanda dulcedine vernans,
 3 cujus in aspectu mens pretiosa micat,
 4 quem prius ut merui cognoscere lumine vultus,
 5 conspexi sensus lumen inesse tibi,
 6 Anfion mihi care pater, venerande sacerdos
 7 atque meo semper corde tenendus amor ;
 8 qui quemcumque novum videas facis esse propinquum,
 9 si genus ignores, fit tibi mente parens.
 10 Provocat alloquio cunctos jucunda voluntas
 11 cogis et unianimes jugiter esse tuos.
 12 Ingenio vivax, sensus moderamine firmus,
 13 pondere consilii fixus ubique manes,
 14 qui bene cauta regis maturae frena senectae,
 15 cui quem praestat honor scis moderare gradum.
 16 Promptus ad omne decus larga bonitate redundas
 17 cui se conjungit quisquis in urbe venit.
 18 Profluus humane frugem venientibus offers
 19 et tua fit populis omnibus una domus.
 20 Verbis quippe suis quem papa Leontius effert :
 21 iudicio tanti credimus ista viri.

F3_25 v.1 AD PATERNUM ABBATEM DE CODICE EMENDATO
 2 Paruimus tandem jussis, venerande sacerdos.
 3 Nominis officium jure, Paterne, regis,
 4 qui propriis meritis ornans altaria Christi
 5 tam prece quam voto das placitura Deo.
 6 Supplico, cede tamen, si quid me forte fefellit.
 7 Nam solet iste meas error habere manus.
 8 Obtineat supplex modo pagina missa salutis,
 9 haec quoque cum relegis me memorare velis.

F3_26 v.1 AD RUCCONEM DIACONUM, MODO PRESBYTERUM
 2 Altaris Domini pollens, bone Rucco, minister,
 3 hinc tibi festinus mando salutis opus.
 4 Nos maris Oceani tumidum circumfluit aequor,
 5 te quoque Parisius, care sodalis, habet.

5 Sequana te retinet, nos unda britannica cingit :
 6 divisos terris alligat unus amor.
 7 Non furor hic pelagi vultum mihi subtrahit illum
 8 nec boreas aufert nomen, amice, tuum.
 9 Pectore sub nostro tam saepe recurris amator,
 10 tempore sub hiemis quam solet unda maris.
 11 Ut quatitur pelagus quotiens proflaverit eurus
 12 stat neque sic animus te sine, care, meus.
 13 Blanda serenato tempestas pectore fervet
 14 atque ad te varia mobilitate trahit.
 15 Sed memor esto mei votumque repende petenti
 16 ut pariter paribus det sua dona Deus,
 17 humanam mentem Christi quo gratia ditet
 18 ac Domino nostro sensus et ora vacent.

AD ARCHIDIACONUM DE MELDIS

F3_27 v.1 Si mihi vel vestros licuisset cernere vultus,
 2 munere pro tanto plurima verba darem.
 3 Direxit nobis mustum tua cara voluntas
 4 et dulces animos dulcia dona probant.
 5 Quem non vidisti promptus satiare parasti,
 6 quid facias illi qui tibi notus adest ?
 7 Det tibi larga Deus qui curam mente fideli
 8 de grege pontificis, magne minister, habes.

AD IOHANNEM DIACONUM

F3_28 v.1 Pignus amicitiae semper memorabile nostrae
 2 versibus exiguis, care Johannis, habe
 3 ut, cum me rapiunt loca nunc incognita forsan
 4 non animo videar, dulcis, abesse tuo.
 5 Anthemium patrem per te, venerande, saluto
 6 cujus in affectu consolidatus agor.
 7 Hilarium pariter nobis in amore tenacem
 8 insero carminibus quem mea corda colunt.
 9 Perpetuo maneat meritis felicibus aevo.
 10 Haec quoque cum relegis me memorare velis.

AD ANTHIMIUM DIACONUM

F3_29 v.1 Suscipe versiculos, Anthimi, pignus amantis,
 2 quos tibi sincero pectore fudit amor.
 3 Cum tua blanditus retineret lumina somnus
 4 lassaque fecisset membra jacere toro,
 5 dum dubito, pecco nolens vexare quietum :
 6 sic mea culpa tui causa soporis erit.
 7 Discedo tacitus veluti fur, indice nullo
 8 nec dixi amplectens : frater amate, vale.
 9 Non licuit mandata animo committere caro
 10 nec tenuit verbis hora vel una tuis.
 11 Testificor Dominum mihi fortiter esse molestum
 12 quod sic abscedo nec tua dicta fero.
 13 Sed cui plura volens poteram tunc dicere praesens
 14 nunc faciat paucis pagina missa loqui.
 15 Haec tamen ante Deum carus te mihi munera praestes
 16 omnibus ut semper carus ubique mices.
 17 Nemo mihi vestem, denaria nemo ministret :
 18 quod dulcedo monet hoc mihi nemo neget.

AD SINDULFUM DIACONUM

F3_30 v.1 Frater amore Dei, digno memorabilis actu,
 2 pectore fixe meo frater amore Dei,
 3 carpe libenter iter quod ducit ad aetheris aulam,
 4 altius ut surgas carpe libenter iter.
 5 Fer patienter onus neque te pia sarcina lasset,
 6 unde manet requies, fer patienter onus.
 7 Subdere colla decet, quia sunt juga dulcia Christi,
 8 quo mereamur opem subdere colla decet.
 9 Qui sua rura colit solet horrea plena tenere
 10 nec jejunos erit qui sua rura colit.
 11 Per mare nauta volat quo multa pecunia crescat,
 12 mercibus ut placeat per mare nauta volat.
 13 Non timet ille necem rabie turbante procellae,
 14 ut lucretur opes non timet ille necem.
 15 Miles ad arma venit quaerens per vulnera palmam,
 16 ut redeat victor miles ad arma venit.
 17 Proelia sume libens mihi tu quoque, care sodalis,
 18 unde triumphus erit proelia sume libens.
 19 Quisquis amore venit nescit se ferre laborem,
 20 nemo labore jacet quisquis amore venit.
 21 Carmina parva ferens tibi debita reddo salutis,
 22 des meliora, precor, carmina parva ferens.

LIBER QVARTVS

EPITAPHIUM EUMERI EPISCOPI CIVITATIS NAMNETICAE

F4_1 v.1 Quamvis cuncta avido rapiantur ab orbe volatu,
 2 attamen extendit vita beata diem
 3 nec damnum de fine capit cui, gloria, vivis
 4 aeternumque locum missus ad astra tenet.
 5 Hoc igitur tumulo requiescit Eumerius almo
 6 per quem pontificum surgit opimus honor.
 7 Stemmata deducit fulgens ab origine culmen
 8 et meritis priscos crescere fecit avos.
 9 Emicuit populis geminum memorabile donum :
 10 inde gradu iudex, hinc pietate pater.
 11 Dulcis in eloquio, placidus moderamine sacro,
 12 in cuius sensu perdidit ira locum,
 13 alterius motus patienti pectore vicit.
 14 Ut levitas laesit, hoc gravitate tulit.
 15 Si quis ab externis properavit sedibus hospes
 16 mox apud hunc proprios sensit habere lares,
 17 hic habitare volens patriis rudis exul ab oris
 18 oblitus veterem hujus amore patrem.
 19 Gaudens arrisit, probat is se cernere flentem,
 20 alterius lacrimas mox facit esse suas.
 21 Partitus cum ventre vices, pietate magistra,
 22 unde tulit luctus, mox ibi vota dedit.
 23 Pauperibus dives censum transfudit egenis,
 24 ante bonus tribuit quam peteretur opem.
 25 Semina jactavit centeno pinguis fructu
 26 cui modo de reditu messis adulta placet.
 27 Unica cura fuit cunctos ut viseret aegros
 28 ipse quibus medicus vixit et ipse cibus.
 29 Extulit ecclesiae culmen, quod restitit unum

30 venit ad heredem qui cumularet opus.
 31 Felix ille abiit, Felicem in sede reliquit ;
 32 heredis meritis vivit in orbe pater.

EPITAPHIUM DOMNI GREGORI EPISCOPI CIVITATIS LINGONICAE

F4_2 v.1 Postquam sidereus disruptit tartara princeps,
 2 sub pedibus iusti, mors inimica, jaces.
 3 Hoc veneranda sacri testatur vita Gregori
 4 qui modo post tumulos intrat honore polos.
 5 Nobilis antiqua decurrens prole parentum,
 6 nobilior gestis nunc super astra manet.
 7 Arbiter ante ferox, dehinc pius ipse sacerdos,
 8 quos domuit iudex fovit amore patris.
 9 Triginta et geminos pie rexit ovile per annos
 10 et grege de Christi gaudia pastor habet.
 11 Si quaeras meritum, produnt miracula rerum
 12 per quem debilibus fertur amica salus.

EPITAPHIUM DOMNI TETRICI EPISCOPI CIVITATIS LINGONICAE

F4_3 v.1 Palma sacerdoti, venerando Tetrice cultu,
 2 te patriae sedes, nos peregrina tenent.
 3 Te custode pio numquam lupus abstulit agnum
 4 nec de fure timens pascua carpsit ovis.
 5 Sex qui lustra gerens et per tres insuper annos
 6 rexisti placido pastor amore gregem.
 7 Nam ut condirentur divino corda sapore,
 8 fudisti dulcem jugiter ore salem.
 9 Summus amor regum, populi decus, arma parentum,
 10 ecclesiae cultor, nobilitatis honor,
 11 esca inopum, tutor viduarum, cura minorum,
 12 omnibus officiis omnia, pastor, eras.
 13 Sed cui praebebat varie tua cura medellam
 14 funere rectoris plebs modo triste gemit.
 15 Hoc tamen, alme pater, speramus : dignus in astris
 16 qualis honore nites, hic pietate probes.

EPITAPHIUM DOMNI GALLI EPISCOPI CIVITATIS ARUERNAE

F4_4 v.1 Hostis inique, Adam paradiso fraude repellis :
 2 ecce Deus famulos praestat adire polos.
 3 Invide, sic tua mors homini meliora paravit :
 4 tu expellis terris, hic dat et astra suis.
 5 Testis et antistes Gallus probat ista beatus,
 6 nobilis in terris, dives eundo polis.
 7 Qui Christi auxilio fultus nec adultus in annis,
 8 se majora petens, odit amore lares.
 9 Effugit amplexus patrios matremque relinquit ;
 10 qui monachum regeret quaeritur abba parens.
 11 Illic tiro rudis generoso coepit ab aevo
 12 militiae Domini belliger arma pati.
 13 Quintiano demum sancto erudiante magistro
 14 pulchrius est auro corde probatus homo.
 15 Inde palatina regis translatus in aula,
 16 Theuderice, tuo vixit amore pio.
 17 Mox ubi destituens terras petit astra magister,
 18 cessit discipulo cura tuenda gregem.
 19 Pontificatus enim moderans ita rexit habenas
 20 pastor ut officiis, esset amore pater.
 21 Mansuetus patiens, bonus, aequus, amator amandus,

22 non erat offensae, sed locus hic veniae.
 23 Si qua supervenit, facta est injuria virtus :
 24 unde furor poterat, inde triumphus erat.
 25 Plebem voce fovens quasi natos ubere nutrix,
 26 dulcia condito cum sale mella rigans,
 27 hoc opus exercens praescivit dona futuri
 28 se pastore nihil posse perire gregi.
 29 Sic pater ecclesiam regit in quinquennia quinque,
 30 vix terdena tamen lustra superstes agens.
 31 Hinc meliore via sanctum ad caelestia vectum
 32 non premit urna rogi, sed tenet ulna Dei.

EPITAPHIUM RURICIORUM EPISCOPORUM CIVITATIS LIMOUECINAE

F4_5 v.1 Invida mors, rabido quamvis miniteris hiatu,
 2 non tamen in sanctis jura tenere vales.
 3 Nam postquam remeans domuit fera tartara Christus,
 4 justorum meritis sub pede victa jaces.
 5 Hic sacra pontificum toto radiantia mundo
 6 membra sepulchra tegunt, spiritus astra colit :
 7 Ruricii gemini flores quibus Aniciorum
 8 juncta parentali culmine Roma fuit.
 9 Pectore vena loquax, mundano culta sapore,
 10 venit ad aetherios lingua colenda libros.
 11 Actu, mente, gradu, spe, nomine, sanguine nexi
 12 exultant pariter hinc avus, inde nepus.
 13 Tempore quisque suo fundans pia templa patroni
 14 iste Augustini, condidit ille Petri.
 15 Hic probus, ille pius, hic serius, ille serenus,
 16 certantes pariter quis cui major erit.
 17 Plurima pauperibus tribuentes divite censu
 18 misere ad caelos quas sequerentur opes.
 19 Quos spargente manu redimentes crimina mundi
 20 inter apostolicos credimus esse choros.
 21 Felices qui sic de nobilitate fugaci
 22 mercati in caelis jura senatus habent.

EPITAPHIUM EXOCI EPISCOPI CIVITATIS LIMOUECINAE

F4_6 v.1 Quamvis pontificem premeret tremebunda senectus,
 2 attamen haec voluit plebs superesse patrem,
 3 aut si naturae mutari debita possint,
 4 pro pastore suo grex properasset iter.
 5 Sed quia non licuit, populum spes consulat illa
 6 quod hunc pro meritis vexit ad astra fides.
 7 Inmaculata Deo conservans membra pudore
 8 Exocius meruit jam sine fine diem
 9 pectore sub cujus regnans patientia victrix
 10 fluctibus in tantis anchora sensus erat.
 11 Felle carens, animo placidus, dulcedine pastus,
 12 nesciit offensis ira referre vices.
 13 Templorum cultor, recreans modulamine cives,
 14 vulneribus patriae fida medella fuit.
 15 Qui tria lustra gerens in pontificatus honore
 16 pergit ad antiquos plebe gemente patres.
 17 Non decet hunc igitur vacuis deflere querellis
 18 post tenebras mundi quem tenet aula poli.
 19 Miliciam peragens, capiens nova praemia regis,
 20 pro Fortunato supplice funde precem.
 21 Obtineas votis, haec qui tibi carmina misi,

22 ut merear claudi quandoque clave Petri.

F4_7 v.1 EPITAPHIUM CHALETRICI EPISCOPI CIVITATIS CARNOTENAE
 2 Inlacrimant oculi, quatiuntur viscera fletu
 3 nec tremuli digiti scribere dura valent,
 4 dum modo qui volui vivo, dabo verba sepulto,
 5 carmine vel dulci cogor amara loqui.
 6 Digne tuis meritis, Chalacterice sacerdos,
 7 tarde note mihi, quam cito, care, fugis !
 8 Tu patriam repetis, nos triste sub orbe relinquis,
 9 te tenet aula nitens, nos lacrimosa dies.
 10 Ecce sub hoc tumulto pietatis membra quiescunt
 11 dulcior et melli lingua sepulta jacet.
 12 Forma venusta decens, animus sine fine benignus,
 13 vox suavis, legem promeditata Dei,
 14 spes cleri, tutor viduarum, panis egentum,
 15 cura propinquorum, totus ad omne bonum,
 16 organa psalterii cecinit modulamine dulci
 17 et tetigit laudi plectra beata Dei
 18 cautare eloquii bene purgans vulnera morbi
 19 quo pascente fuit fida medella gregi.
 20 Sex qui lustra gerens, octo bonus insuper annos,
 21 ereptus terrae justus ad astra redis.
 22 Ad paradisiacas epulas te cive reducto
 23 unde gemit mundus gaudet honore polus.
 24 Et quia non dubito quanta est tibi gloria laudum
 25 nec debes fleri, talis amice Dei.
 26 Haec qui, sancte pater, pro magnis parva susurro,
 27 pro Fortunato, quaeso, precare tuo.

F4_8 v.1 EPITAPHIUM CRONOPI EPISCOPI CIVITATIS PETROCORICAE
 2 Si terrena, sacer, quondam tibi cura fuisset,
 3 carmine plus lacrimas quam modo verba darem.
 4 Sed quia tu mundus nec sunt tibi crimina mundi
 5 nos gaudere mones qui sine morte manes.
 6 Antistes pietate calens, venerande Cronopi,
 7 membra sepulchra tegunt, spiritus astra tenet.
 8 Ordo sacerdotum cui fluxit utroque parente
 9 venit ad heredem pontificalis apex.
 10 Hunc tibi jure gradum successio sancta paravit
 11 ut quasi jam merito debitus esset honor.
 12 Nobilis antiquo veniens de germine patrum,
 13 sed magis in Christo nobilior merito,
 14 sic vultu semper placidus ceu mente serenus,
 15 pectore sincero frons sine nube fuit.
 16 Cujus ab eloquio nectar per verba fluebat,
 17 vinceres ut dulces ore rigante favos.
 18 Nudorum tu vestis eras, algentis amictus :
 19 qui ad tua tecta fuit, tectus et ipse redit.
 20 Divitias omnes inopum sub ventre locasti
 21 unde tibi semper viva talenta manent.
 22 Esuriens epulum, sitiens te sumere potum
 23 cernere te meruit tristis et exul opem.
 24 Implesti propriis viduatam civibus urbem
 25 videruntque suos te redimente lares.
 26 Quam lupus ab stabulis tulerat frendente rapina,
 27 te pastore gregis reddita plaudit ovis.
 28 Templam exusta celer revocasti in culmine prisco,

28 hinc tua sed caelis stat sine labe domus.
 29 Ipse bis octono vixisti in corpore lustro :
 30 nunc tibi pro meritis est sine fine dies.

EPITAPHIUM LEONTI EPISCOPI ANTERIORIS CIVITATIS BURDEGALENSIS

F4_9 v.1 Ultima sors avido graviter properavit hiatu,
 2 pastorem rapiens qui fuit arma gregis.
 3 Hoc recubant tumulo venerandi membra Leonti
 4 quo stetit eximium pontificale caput.
 5 Quem plebs cuncta gemens confusa voce requirit,
 6 hinc puer, hinc juvenis deflet et inde senes.
 7 Defensoris opem hic omnis perdidit aetas
 8 et quantum coluit nunc lacrimando docet.
 9 Nemo valet siccis oculis memorare sepultum
 10 qui tamen in populo vivit amore pio.
 11 Egregius, nulli de nobilitate secundus,
 12 moribus excellens, culmine primus erat.
 13 Hic pietate nova cunctis minor esse volebat,
 14 sed magis his meritis et sibi major erat.
 15 Quo praesente viro meruit discordia pacem,
 16 expulsa rabie corda ligabat amor.
 17 Ecclesiae totum concessit in ordine census
 18 et tribuit Christo quod fuit ante suum.
 19 Ad quem pauper opem, pretium captivus habebat,
 20 hoc proprium reputans quod capiebat egens.
 21 Cujus de terris migravit ad astra facultas
 22 et plus iste Deo quam sibi vixit homo,
 23 cordis in amplexu retinens et pectore plebem,
 24 diceret ut populum se generasse patrem.
 25 Namque suos cives placida sic voce monebat
 26 confitereris ut hunc ad sua membra loqui.
 27 Ingenio vigilans, dives quoque dogmate Christi
 28 et meruit studio multiplicare gradum.
 29 Largior in donis absens sibi junxit amantes
 30 et quo non fuerat, munere notus erat.
 31 Principibus carus hujusque amor unicus urbis,
 32 festinans animis omnibus esse parens.
 33 Lustra decem pollens, septem quoque vixit in annos,
 34 mox urgente die raptus ab orbe fuit.
 35 Sed quis cuncta canat, cum tot bona solus habebat ?
 36 Nunc uno in tumulo plurima vota jacent.
 37 Haec tibi parva nimis, cum tu merearis opima,
 38 carmina Theudosius praebet amore tuus.

EPITAPHIUM LEONTI EPISCOPI SEQUENTIS CIVITATIS BURDEGALENSIS

F4_10 v.1 Omne bonum velox fugitivaque gaudia mundi,
 2 prosperitas hominum quam cito rapta volat !
 3 Malueram potius cui carmina ferre salutis,
 4 perverso voto flere sepulchra vocor.
 5 Hoc recubant tumulo venerandi membra Leonti
 6 quem sua pontificem fama sub astra levat.
 7 Nobilitas altum ducens ab origine nomen
 8 quale genus Romae forte senatus habet.
 9 Et quamvis celso flueret de sanguine patrum,
 10 hic propriis meritis crescere fecit avos.
 11 Regum summus amor, patriae caput arma parentum,
 12 tutor amicorum, plebis et urbis honor,
 13 templorum cultor, tacitus largitor egentum,

14 susceptor peregrum distribuendo cibum.
 15 Longius extremo si quis properasset ab orbe,
 16 advena mox vidit, hunc ait esse patrem.
 17 Ingenio vivax, animo probus, ore serenus,
 18 et mihi qualis erat pectore flente loquor.
 19 Hunc habuit clarum qualem modo Gallia nullum,
 20 nunc humili tumulo culmina celsa jacent.
 21 Placabat reges, recreans moderamine cives,
 22 gaudia tot populis, heu, tulit una dies.
 23 Lustra decem felix et quattuor insuper annos
 24 vixit et a nostro lumine raptus obit.
 25 Funeris officium, magni solamen amoris,
 26 dulcis adhuc cineri dat Placidina tibi.

EPITAPHIUM VICTORIANI ABBATIS DE MONASTERIO ASANE

F4_11 v.1 Quisquis ab occasu properas huc, quisquis ab ortu,
 2 munus in hoc tumulo quod venereris habes.
 3 Respice ditatum caelesti dote talentum
 4 cujus semper habet pectoris arca Deum.
 5 Religionis apex, vitae decus, arma salutis,
 6 eximius meritis Victorianus adest,
 7 dignum opus exercens qui fructificante labore
 8 cunctis non soli vixit in orbe sibi.
 9 Plurima per patriam monachorum examina fundens,
 10 floribus aeternis mellificavit apes.
 11 Lingua potens, pietas praesens, oratio jugis,
 12 sic fuit ut jam tum totus ad astra foret.
 13 Plura salutiferis tribuens oracula rebus,
 14 saepe dedit signis vita beata fidem.
 15 Bis senis rexit patrio moderamine lustris
 16 rite Deo placitas pastor opimus oves.
 17 Calle sequens recto sacra per vestigia Christum,
 18 nunc fruitur vultum quem cupiebat amor.

EPITAPHIUM HILARI PRESBYTERI

F4_12 v.1 Omnes una manet sors inreparabilis horae,
 2 cum venit extremus lege trahente dies.
 3 Sic furit ira necis neque nos fugit orbita mortis,
 4 pulvere facta caro non nisi pulvis erit.
 5 Haec tamen insignes animas spes non vacua pascit,
 6 quod qui digna gerit de nece nulla timet.
 7 Hoc jacet in tumulo venerandus Hilarius actu
 8 corpore qui terras et tenet astra fide.
 9 Vir bonus, egregia de nobilitate refulgens,
 10 inter honoratos germinis altus apex.
 11 Conubio junctus simili, sed conjuge rapta
 12 stans in amore Dei, non fuit alter amor.
 13 Utilis in propriis, doctus moderamine legis,
 14 cujus iudicium pondere libra fuit.
 15 Justitiam tribuens populis examine recto,
 16 vendita res pretio non fuit ulla suo.
 17 Funeris officio lacrimans Evantia caro
 18 contulit haec genero maesta sepulchra suo.

EPITAPHIUM SERVILIONIS PRESBYTERI

F4_13 v.1 Quamvis longa dies, brevis hic et inhospita lux est ;
 2 sola tamen nescit vita beata mori.
 3 Hoc igitur tumulo Servilio clausus habetur,

4 nobilis et merito nobiliore potens.
 5 Ipse palatinam rexit moderatius aulam
 6 commissaequae domus crescere fecit opes.
 7 Presbyter inde sacer mansit venerabilis urbi
 8 servitioque Dei libera vita fuit.
 9 Orfanus hic patrem, viduae solacia deflent,
 10 unde magis caelis gaudia vera tenet.
 11 Pontificem genitum vidit dehinc munere Christi,
 12 raptus ab orbe quidem laetus ad astra redit.

EPITAPHIUM DOMNI PRAESIDI

F4_14 v.1 Vita brevis hominum, sed non brevis illa piorum,
 2 dum migrante die prosperiora tenent.
 3 Qui meruere magis de carcere carnis euntes
 4 post tenebras mundi luce perenne frui.
 5 Ex quibus hic recubans meritis Praesidius almīs
 6 carne tenet tumulum, spiritus igne polum.
 7 Pectore de proprio Christi responsa rigando
 8 multorum extinxit fonte fluente sitim.
 9 Invitans instanter oves ad pasqua regis
 10 distribuit dulcem fratribus ore salem.
 11 Nam quotiens monachus peccati est vulnere fixus
 12 missus ad artificem, certa medella fuit.
 13 Ibat ad abbatem famulans sanctumque magistrum
 14 discipulus humilis, qui fuit ante tumens.
 15 Talibus officiis intentus amore tonantis
 16 inter et angelicos fulget honore choros.

EPITAPHIUM BOBOLENI DIACONI

F4_15 v.1 Innumeris hominum subjecta est vita periculis
 2 casibus et variis sors inimica premit.
 3 Nam recubando toro Bobolenus, honore diacon,
 4 dum fruitur somno, mors rapit atra virum.
 5 Hostis in insidiis securo caede securis
 6 percutiens cerebrum fecit obire dolo.
 7 Dic, tibi quid prodest scelus hoc peragendo, nefande ?
 8 Ille Deo vivit, tu moriture peris.
 9 Martyris ille decus meruit, tu damna latronis :
 10 hinc sibi palma placet, sed tibi poena manet.

EPITAPHIUM ATTICI

F4_16 v.1 Quamvis longa seni ducatur in ordine vita,
 2 cum venit extremum, nil valet esse diu.
 3 Sed quia nemo fugit nisi terram terra recondat,
 4 lege sub hac cunctos sors rapit una viros.
 5 Celsus in hoc humili tumulo jacet Atticus ille
 6 qui dabat eloquio dulcia mella suo,
 7 inpendens placidam suavi modulamine linguam
 8 pacificusque suus sermo medella fuit.
 9 Cujus abundantem venerata est Gallia sensum
 10 excoluitque senem semper honore patrem.
 11 Clarus ab antiquis, spes nobilitatis opimae,
 12 sufficiens propriis nulla rapina fuit.
 13 Dogmata corde tenens plenus velut arca libellos,
 14 quisquis quod voluit fonte fluente bibit.
 15 Consilio sapiens, animo pius, ore serenus,
 16 omnibus ut populis esset amore parens.
 17 Sic venerabilibus templis, sic fudit egenis

18 mitteret ut caelis quas sequeretur opes.

EPITAPHIUM ARCADI IUVENIS

F4_17 v.1 Omne bonum velox fugitivo tempore transit :
 2 quae placitura videt mors magis illa rapit.
 3 Hic puer Arcadius, veniens de prole senatus,
 4 festinante die raptus ab orbe jacet.
 5 Parvula cujus adhuc freno se vinxerat aetas
 6 ut teneris annis surgeret ipse senes.
 7 Eloquio torrens, specie radiante venustus,
 8 vincens artifices et puer arte rudis.
 9 Quo me, forma, rapis laudes memorare sepulti ?
 10 Singula si memores, plus lacrimanda mones.
 11 Sed quoniam nulla maculatus sorde recessit,
 12 nulli flendus erit quem paradisus habet.

EPITAPHIUM BASILI

F4_18 v.1 Inpedior lacrimis prorumpere nomen amantis
 2 vixque dolenda potest scribere verba manus.
 3 Conjugis affectu cogor dare pauca sepulto,
 4 si loquor adfligor, si nego durus ero.
 5 Qui cupis hoc tumulo cognoscere, lector, humatum,
 6 Basilium inlustrem maesta sepulchra tegunt
 7 cujus blanda pio recreabat lingua relatu
 8 et dabat eloquio verba benigna suo.
 9 Hinc doctrina rigans, illinc dulcedo redundans
 10 ornavit radio, lux geminata virum.
 11 Regis amor, carus populis, ita pectore dulcis
 12 ut fieret cunctis in bonitate parens,
 13 tranquillus, sapiens, jucundus, pacis amicus
 14 nullaque quo stabat semina litis erant.
 15 Hunc consultantem legati sorte frequenter
 16 misit ad Hispanos Gallica cura viros.
 17 SuffICIENTER habens numquam fuit arma rapinae,
 18 non propriis eguit, non aliena tulit.
 19 Ecclesias ditans, loca sancta decenter honorans,
 20 pauperibus tribuens dives ad astra subit.
 21 Annis bis denis cum Baudegunde jugali
 22 junxit in orbe duos unus amore torus.
 23 Qui tamen undecimo lustro cito raptus ab aevo
 24 post finem terrae regna superna petit.
 25 Non jam flendus eris humana sorte recedens,
 26 dum patriam caeli, dulcis amice, tenes.

EPITAPHIUM ARACHARI

F4_19 v.1 Partu terra suo fraudem non sustinet ullam,
 2 quae dedit haec recipit debita membra luto.
 3 Hic vergente suo situs est Aracharius aevo
 4 sex qui lustra gerens raptus ab orbe fuit.
 5 Ipse palatina refulsit clarus in aula
 6 et placito meruit regis amore coli.
 7 Omnia restituit mundo quae sumpsit ab ipso,
 8 sola tamen pro se quae bene gessit habet.

EPITAPHIUM BRUMACHI

F4_20 v.1 Quisquis in hoc tumulo cineres vis nosse sepulti,
 2 Brumachus quondam fulsit in orbe potens.
 3 Quem sensu, eloquio legati nomine functum,

4 dum remeat patriae, sors inimica tulit.
 5 Finibus Italiae raptus, sed Frigia conjux
 6 detulit huc cari funus amando viri.
 7 Ceum vivum coluit cui grata est umbra mariti,
 8 conjugibus castis ipsa favilla placet.
 9 Ipse quater denos permansit in orbe per annos,
 10 mox obit et magnum parva sepulchra tegunt.

EPITAPHIUM AVOLI

F4_21 v.1 Inriguis Avolum lacrimis ne flete sepultum
 2 qui propriis meritis gaudia lucis habet.
 3 Nam si pensentur morum pia gesta suorum,
 4 felix post tumulos possidet ille polos.
 5 Templa Dei coluit, latitans satiavit egentem,
 6 plenius illa metit quae sine teste dedit.
 7 Nobilitate potens, animo probus, ore serenus,
 8 plebis amore placens, fundere promptus opes,
 9 non usurae avidus ; licet esset munere largus,
 10 plus nihil expetiit quam numerando dedit.
 11 Nil mercedis egens, merces fuit una salutis,
 12 quod minus est pretio, proficit hoc merito.
 13 Luce perenne fruens felix cui mortua mors est,
 14 quem non poena premit vita superna manet.

EPITAPHIUM INNOCENTUM

F4_22 v.1 Hoc jacet in tumulo non flenda infantia fratrum
 2 quos tulit innocuos vita beata viros.
 3 Uno utero geniti simili sunt sorte sepulti
 4 et pariter natos lux tenet una duos.
 5 Lotus fonte sacro prius ille recessit in albis,
 6 iste gerens lustrum ducitur ante Deum.
 7 Nomine sed primus vocitatus rite Johannes,
 8 alter, Patricius, munere major erat
 9 de cujus merito se plurima signa dederunt.
 10 Felices animae quae pia vota colunt !
 11 Hic etiam felix genetrix requiescit eorum
 12 quae meruit partu lumina ferre suo.

EPITAPHIUM IULIANI

F4_23 v.1 Condita sunt tumulo Juliani membra sub isto
 2 cujus in aeternum vivere novit honor.
 3 Mercator quondam, conversus fine beato,
 4 raptus ab hoc mundo crimine liber homo.
 5 Collegit nimium, sed sparsit egentibus aurum,
 6 praemisit cunctas quas sequeretur opes.
 7 Sollicitus quemcumque novum prospexit in urbe,
 8 hunc meruit veniens exul habere patrem.
 9 Pascere se credens Christum sub paupere forma,
 10 ante omnes apud hunc sumpsit egenus opem.
 11 Nec solum refovens sed dona latendo ministrans
 12 amplius inde placet quod sine teste dedit.
 13 Felicem censum qui fratris migrat in alvo
 14 et vivos lapides aedificare potest !
 15 Extulit hunc tumulum genitoris honore Johannes
 16 qui modo divinis fungitur officiis.
 17 Qualiter hic vivo serviret amore parenti,
 18 cum nati pietas ipsa sepulchra colit !

EPITAPHIUM ORIENTI

F4_24 v.1 Non hic nostra diu est fugienti tempore vita
 2 quae sub fine brevi vix venit, inde redit.
 3 Ecce caduca volant praesentia saecula mundi,
 4 sola fides meriti nescit honore mori.
 5 Clauditur hic pollens Orientius ille sepultus
 6 cui palatina prius mansit aperta domus.
 7 Consiliis habilis regalique intimus aulae
 8 obtinuit celsum dignus in arce locum.
 9 Vir sapiens, justus, moderatus, honestus, amatus
 10 hoc rapuit mundo quod bene gessit homo,
 11 sexaginta annis vix implens tempora lucis,
 12 conjuge Nicasia qua tumultante cubat.
 13 Cujus castus amor colit ipsa sepulchra mariti
 14 nec placitura homini se dedit esse Dei.

EPITAPHIUM THEUDECHILDAE REGINAE

F4_25 v.1 Quamvis aetatis senio jam flecteret annos
 2 multorumque tamen spes cito rapta fuit.
 3 Si precibus possint naturae debita flecti,
 4 plebs ageret lacrimis hanc superesse sibi.
 5 Gaudia quanta inopum tumulto sunt clausa sub isto
 6 votaue quot populis abstulit una dies !
 7 Inclita nobilitas genitali luce coruscans,
 8 hic properante die Theudechilde jacet.
 9 Cui frater, genitor, conjux, avus atque priores
 10 culmine succiduo regius ordo fuit.
 11 Orfanus, exul, egens, viduae nudaeque jacentes
 12 matrem, escam, tegmen hic sepelisse dolent.
 13 Unica res placuit cumulo mercedis opimae,
 14 antea cuncta dedit quam peteretur opem,
 15 occultans sua dona suis neu forte vetarent,
 16 sed quae clausa dedit, iudice teste docet,
 17 templorum Domini cultrix, pia munera praebens,
 18 hoc proprium reputans quicquid habebat inops.
 19 Una mori sors est et terrae reddere terram :
 20 felix cui meritis stat sine fine dies !
 21 Actibus his instans, aeterna in luce relata,
 22 ter quino lustro vixit in orbe decus.

EPITAPHIUM VILITHUTAE

F4_26 v.1 Omne bonum velox fugitivaque gaudia mundi,
 2 monstrantur terris et cito lapsa ruunt.
 3 Ut dolor adquirat vires, cum perdit amantem,
 4 ante placere facit, durius inde premit.
 5 Heu lacrimae rerum, heu sors inimica virorum,
 6 cur placitura facis quae dolitura rapis ?
 7 Vilithute decens, Dagaulfi cara jugalis,
 8 conjugis amplexu dissociata jacet.
 9 Corpore juncta toro, plus pectore nexa marito,
 10 lucis in occasu vincula rupit amor.
 11 Tempora cui poterant adhuc in flore manere,
 12 principium vitae finis acerbus habet.
 13 Sanguine nobilium generata Parisius urbe,
 14 Romana studio, barbara prole fuit.
 15 Ingenium mitem torva de gente trahebat,
 16 vincere naturam gloria major erat.
 17 Numquam maesta manens, vultu nova gaudia portans,

18 nubila fronte fugans corde serena fuit.
19 Fudit ab ore jubar species redimita decore
20 protulit et radios forma venusta suos.
21 Stirpe sua reliquas superavit pulchra puellas
22 et rosea facie lactea colla tulit.
23 Splendida conspectu meliori pectore fulsit,
24 digna micans animo nec pietate minor.
25 Cui quamvis nullus hac in regione propinquus,
26 obsequio facta est omnibus una parens,
27 divinis intenta bonis, alimenta ministrans,
28 qua mercede magis se satiasse videt.
29 Haec data post obitum faciunt quoque vivere functam,
30 forma perit hominum, nam benefacta manent.
31 Corpora pulvis erunt et mens pia floret in aevo,
32 omnia praetereunt praeter amare Deum.
33 Orfana tunc aviae studiis adolevit opimae
34 inque loco natae neptis adulta fuit.
35 Tertius a decimo ut hanc primum acceperat annus,
36 traditur optato consociata viro
37 nobilitas in gente sua cui celsa refulsit
38 atque suis meritis additur alter honor.
39 Dulcis, ovans, alacris, studiis ornata juvenus,
40 quod natura nequit littera prompta dedit.
41 Tres meruere tamen juncti superesse per annos
42 conjugioque suo corde ligante frui.
43 Ambo pares animo, voto, spe, moribus, actu
44 certantesque sibi mente, decore, fide.
45 Tempore jam certo est enixa puerpera prolem,
46 damno feta suo quae pariendo perit.
47 Abripuit teneram subito mors invida formam,
48 annos quippe duos, lustra gerendo tria.
49 Sic animam generans anima spoliatur et ipsa
50 spem peperit luci luce negante sibi.
51 Exemplum sed triste dedit fetura parenti,
52 unde redire solet, deficit inde genus.
53 Tertius esse pater cupiens, heu, solus habetur,
54 crescere quo numerus debuit, ecce cadit.
55 Nam partus cum matre perit, nascendo sepultus,
56 nil vitale trahens, natus in ore necis.
57 Plus fuerant soli, si tunc sine prole fuissent,
58 addita posteritas abstulit id quod erat.
59 Infaustis votis genitus de funere matris
60 et genetrix nato mortis origo fuit.
61 Alter in alterius letali sorte pependit
62 inque vicem sibi mox ambo dedere necem.
63 Sed sensit graviora dolens pater atque maritus
64 qui gemit uno obitu se sepelisse duos.
65 Pro vixdum genito lacrimas jam solvit humato,
66 vidit quod fleret, non quod haberet amor.
67 Tristitiae cumulum tribuit cui rapta jugalis,
68 dans longas lacrimas tempore nupta brevi.
69 Consultum tamen illud habet de conjuge conjux,
70 huic quia mercedis non vacuatur opus.
71 Nam quod ad ornatum potuit muliebri videri,
72 ecclesiis prompte pauperibusque dedit.
73 Hic nulla ex illis rebus peritura reliquit,
74 ut modo praemissas dives haberet opes.
75 Quam bene distribuens sine se sua noluit esse !

76 Nam quae larga dedit, haec modo plena metit.
 77 Condidit ergo sibi quicquid porrexit egenti
 78 et quos sumpsit inops hos habet illa cibos.
 79 Felices quos nulla gravant de morte secunda
 80 nec faciunt poenis subdita membra feris !
 81 Dulcibus inlecebris qui non sibi condit amarum
 82 nec per carnem animam vult sepelire suam,
 83 sed casta pietate manens sine crimine vitae,
 84 illius in luce hac praemia lucis emit.
 85 Tempore quam parvo lacrimas aut colligit amplas
 86 aut, cui vita nitet, gaudia longa capit !
 87 Hac de morte levis dolor est. Nam durius illud,
 88 hic quem viventem Tartara nigra tenent.
 89 Infelix quisquis maculosis actibus usus
 90 ante redemptorem se laqueasse videt,
 91 nubibus invectus cum venerit arbiter orbis
 92 et tuba terribilis commovet arma polis !
 93 His venit Helias, illis in curribus Enoch,
 94 anteviendo suos hinc Petrus, hinc Stephanus.
 95 Flore puellarum rosea stipante corona
 96 inter virgineos prima Maria choros :
 97 hinc mater, hinc sponsa Agnes, Tecla dulcis, Agathe
 98 et quaecumque Deo virginitate placet.
 99 Tunc ibi quis terror caeli adsistente senatu !
 100 Quid dicturae animae iudicis in facie ?
 101 Mox aut poena manet miseros aut palma beatos,
 102 quisque suae vitae semina jacta metit.
 103 Sunt dicturi alii : "Cade, mons, et comprime corpus",
 104 sed jussi colles ferre sepulchra negant.
 105 Cogentur minimi quadrantem solvere nummi ;
 106 nemo pedem removet quo sua culpa trahit.
 107 Spe vacui paleae similes mittentur in ignes,
 108 pascendis flammis fit caro nostra cibus.
 109 Vivunt ad poenas aeterno ardente camino ;
 110 ut cruciet gravius, mors mala non moritur.
 111 Ne fessi recreent animas longo igne crematas,
 112 porrigit, heu, nullas flammiger amnis aquas.
 113 Parte alia, meritis felicibus alta tenentes,
 114 fulgebunt justis sol velut arce poli.
 115 Digni lumen habent, damnati incendia deflent,
 116 illos splendor alit, hos vapor igne coquit.
 117 Res est una quidem, duplici sed finditur actu,
 118 nam cremat indignos quo probat igne pios.
 119 Aeterna radiant paradisi in luce beati
 120 cum facie Christi regna tenendo sui.
 121 Gratia quanta manet vultus qui aspexerit illos,
 122 quantus honor hominum posse videre Deum !
 123 Si nimis erigitur fragilem qui cemit amicum,
 124 qualiter exultet qui videt ora Dei !
 125 Lilia, narcissus, violae, rosa, nardus, amomus,
 126 quicquid odorifero germine mittit Arabs
 127 iudicis in vultu, florentia lumina, vernant.
 128 Sed super haec Domini suavior efflat odor.
 129 Nam quantum obsceno melior lux aurea plumbo,
 130 quantum tura Deo cedit et omnis odor ;
 131 quantum nocte dies distat, sol lampade lunae,
 132 factori cedunt sic sua facta suo.
 133 Cum vero justis tanto splendore fruuntur,

134 congaudent nimium se caruisse mori.
 135 De tenebris migrasse favent in luce perenni
 136 et magis ad bona tot tardius isse dolent.
 137 Tu quoque ne lacrimis uras pia fata jugalis
 138 cui modo creduntur huc meliora dari.
 139 Nam si deplores meritis quae vivit opimis,
 140 conjugis ipse bonis invidiosus eris,
 141 praesertim quam sensu, animo, tibi corpore junctam
 142 cum Christo semper corde fuisse refers.
 143 Post Domini vultus ad te si jussa rediret,
 144 fleret in hunc mundum se revocare gradum.
 145 Carius illa diem retinet quem perdere nescit
 146 quam hunc quem timuit fine sequente sibi.
 147 Nec grave funus agas cunctis natura quod offert,
 148 quod cum principibus participatur inops.
 149 Nullum paupertas, non eripit ampla facultas,
 150 hoc commune simul dives, egenus habet.
 151 Nam puer atque senes, niger albus, turpis honestus,
 152 debilis et fortis, mitis et asper obit.
 153 Huc sapiens stolidus, huc et probus improbus, omnis
 154 plenior exiguus, parvus et altus adit.
 155 Tardius aut citius currit sors ista per omnes,
 156 dissimili merito mors trahit una viros.
 157 Non decet ergo graves pro conjuge fundere fletus
 158 de cujus meritis te dubitare negas.
 159 Felices nimium hic qui sine crimine praesunt,
 160 qui melius discunt vivere post obitum.

EPITAPHIUM EUFRASIAE

F4_27 v.1 Si pietatis opus numquam morietur in aevo,
 2 vivis pro merito, femina sancta, tuo,
 3 inclita sidereo radians, Eufrasia, regno,
 4 nec mihi flenda manes, cum tibi laeta places.
 5 Terraе terra redit, sed spiritus astra recepit,
 6 pars jacet haec tumulo, pars tenet illa polum.
 7 Corpore deposito, leviori vecta volatu,
 8 stas melior caelo quam prius esses humo.
 9 Carnis iniqua domans, de te tibi facta triumphans,
 10 ad patriae sedes civis opima redis.
 11 Ardua nobilitas proavorum luce coruscans
 12 plus tamen es meritis glorificanda tuis.
 13 Vir cui Namatius - datus inde, Vienna, sacerdos,
 14 conjuge defuncto consociata Deo.
 15 Exulibus, viduis, captivis omnia fundens,
 16 paupertate pia dives ad astra subis.
 17 Aeternum mercata diem sub tempore parvo
 18 misisti ad caelos quas sequereris opes.
 19 Sed rogo per regem paradisi gaudia dantem,
 20 pro Fortunato supplice funde precem.
 21 Obtineas votis haec qui tibi carmina misi
 22 ut merear claudi quandoque clave Petri.

EPITAPHIUM EUSEBIAE

F4_28 v.1 Scribere per lacrimas si possint dura parentes,
 2 hic pro pictura littera fletus erat.
 3 Sed quia lumen aquis non signat nomen amantis,
 4 tracta manus sequitur qua jubet ire dolor.
 5 Nobilis Eusebiae furibundi sorte sepulchri

6 hic, obscure lapis, fulgida membra tegis.
 7 Cujus in ingenio seu formae corpore pulchro
 8 arte Minerva fuit, victa decore Venus.
 9 Docta tenens calamos, apices quoque figere filo,
 10 quod tibi charta valet hoc sibi tela fuit.
 11 Dulcis in Eusebii jam desponsata cubile,
 12 vivere sed tenerae vix duo lustra licet.
 13 Ut stupeas juvenem, sensum superabat anilem,
 14 se quoque vincebat non habitura diu.
 15 Conteriturque socer cui nata generque recedit :
 16 haec letalis obit, ille superstes abit.
 17 Sit tamen auxilium, quia non es mortua Christo,
 18 vives post tumulum virgo recepta Deo.

LIBER QVINTVS

AD MARTINUM EPISCOPUM GALLICIAE

F5_1

[oratio soluta]

v.1 Martini meritis cum nomine nobilis heres,
 2 pro Fortunato, quaeso, precare Deum.

ITEM AD EUNDEM

F5_2

v.1 Lumen apostolicum cum spargeret una Triades
 2 exciperetque novum mundus honore diem
 3 ut tenebras animae lux sementiva fugaret
 4 et claram hauriret mens oculata fidem,
 5 redditur avulsis spinis urbs Romula princeps,
 6 principis egregii vomere culta Petri.
 7 Paulus ad Illyricos Scythicas penetrando pruinas
 8 dogmate ferventi frigora solvit humi.
 9 Mattheus Aethiopus adtemperat ore vapores
 10 vivaque in exusto flumina fudit agro.
 11 Bellica Persidis Thomae subjecta vigori
 12 fortior efficitur victa tiara Deo.
 13 Lurida perspicuo datur India Bartholomeo.
 14 Andreae monitis extat Achaia seges.
 15 Ne morer adcelerans, Martini Gallia prisca
 16 excellente fide luminis arma capit.
 17 Martino servata novo, Gallicia, plaude :
 18 sortis apostolicae vir tuus iste fuit.
 19 Qui virtute Petrum praebet tibi, dogmate Paulum,
 20 hinc Jacobi tribuens, inde Johannis opem.
 21 Pannoniae, ut perhibent, veniens e parte Quiritis
 22 est magis effectus Gallisueba salus.
 23 In sulcum sterilem vitae plantaria sevit
 24 quo matura seges fertilitate placet.
 25 Heliae meritis alter redit imber aristis,
 26 munera roris habens, ne premat arva sitis.
 27 Neu jaceant stupidis arentia jugera sulcis,
 28 influit inrigue fonte perennis aquae.
 29 In ramis heresis fidei pia germina fixit
 30 quodque oleaster erat pinguis oliva viret.
 31 Quae stetit exilis viduatis frondibus arbor
 32 jam paritura cibum floret honore novo.
 33 Inponenda focis sine spe ficulnea tristis
 34 praeparat ad fructum stercore culta sinum.

35 Palmitis uva tumens, avium laceranda rapinis,
 36 hoc custode bono non perit una lacu.
 37 Rebus apostolicis direxit vinitor antes,
 38 arva ligone movens, falce flagella premens.
 39 Ex agro Domini labruscam excidit inertem
 40 atque racemus adest quo fuit ante frutex.
 41 De satione Dei zezania vulsit amara
 42 surgit et aequalis laetificata seges.
 43 Martino servata novo, Gallicia, plaude :
 44 sortis apostolicae vir tuus iste fuit.
 45 Pastoris studio circum sua septa recurrens,
 46 ne lupus intret oves, servat amore greges.
 47 Subportante manu trahit ipse ad pabula Christi
 48 montibus instabilem ne voret error ovem.
 49 Cujus vox refluens plebi de fonte salubri
 50 ut bibat aure fidem, porrigit ore salem.
 51 Hosti damna quidem, Domino pia vota paravit
 52 et commissa sibi dupla talenta refert,
 53 vocem evangelicam exspectans operarius almus,
 54 ut sibi dicatur : servule perge bone,
 55 quando fidelis enim mihi supra pauca fuisti,
 56 supra multa nimis constituendus eris.
 57 Ecce tui Domini modo gaudia laetior intra
 58 proque labore brevi magna parata tibi.
 59 Auditurus eris vocem, Martine, beatam,
 60 sed Fortunati sis memor ipse tui.
 61 Quaeso, precare, pater, videam tua gaudia tecum :
 62 sic placeas regi poste patente Petri.
 63 Cum Radegunde humili supplex, pie, postulat Agnes
 64 ut commendatae sint tibi, sancte pater,
 65 et crescente choro per carmina sancta sororum
 66 conplaceant Domino, te duce mite, suo,
 67 atque adscita sibi servetur ab urbe Genesi
 68 regula Caesarii praesulis alma pii,
 69 qui fuit antistes Arelas de sorte Lerini
 70 et mansit monachus pontificale decus.
 71 Sedulitate patris proprias tuearis alumnas
 72 ut tibi proficiat hae bona si qua gerant.
 73 Unde inlustre caput cingas diademate pulchro
 74 et grates dignas pro grege pastor agas.

F5_3 v.1 AD CIUES TURONICOS DE GREGORIO EPISCOPO
 2 Plaudite, felices populi, nova vota tenentes,
 3 praesulis adventu reddite vota Deo.
 4 Hoc puer exsertus celebret, hoc curva senectus,
 5 hoc commune bonum praedicet omnis homo.
 6 Spes gregis ecce venit, plebis pater, urbis amator :
 7 munere pastoris laetificentur oves.
 8 Sollicitis oculis quem prospera vota petebant
 9 venisse aspiciant, gaudia festa colant.
 10 Jura sacerdoti merito reverenter adeptus
 11 nomine Gregorius, pastor in urbe gregis.
 12 Martino proprium mittit Julianus alumnum
 13 et fratri praebet quod sibi dulce fuit.
 14 Quem patris Egidii Domino manus alma sacravit
 15 ut populum recreet, quem Radegundes amet.
 16 Huic Sigiberthus ovans favet et Brunichildis honori :
 17 iudicio regis nobile culmen adest.

17 Quo pascente greges per pascua sancta regantur
 18 et paradisiaco germine dona metant,
 19 immaculata pii qui servet ovilia Christi
 20 ne pateant rabidis dilaceranda lupis.
 21 Pervigili cura stabulum sine labe gubernet
 22 commissumque gregem nulla rapina gravet.
 23 Muniat inclusos pretiosi velleris agnos
 24 atque soporantes protegat ipse vigil.
 25 Florea divino pinguescat vinea cultu
 26 et matura suo sit speciosa botro,
 27 fructibus aeternis ut compleat horrea caeli,
 28 unde animae vivo fonte fluenta bibant,
 29 ne sitis excruciet, digito quam Lazarus udo
 30 ignem ut leniret, tunc petebatur opem.
 31 Sed magis in gremio Abrahae vernante locandas
 32 pastor oves placido ducat ad astra sinu,
 33 ut bene commisso sese duplicante talento
 34 introeat Domini gaudia vera sui.
 35 Laetus agat sub clave Petri, per dogmata Pauli
 36 inter sidereos luce micante choros,
 37 fortis Athanasius qua clarus Hilarius adstant,
 38 dives Martinus suavis et Ambrosius,
 39 Gregorius radiat, sacer Augustinus inundat,
 40 Basilius rutilat Caesariusque micat.
 41 Quorum gesta sequens et dicta fideliter implens
 42 perpetuae vitae participatus ovet
 43 atque coronatus digna mercede laborum
 44 obtineat miles regis in arce locum.

F5_4 v.1 ITEM UERSUS IN NATALICIUM GREGORII EPISCOPII
 2 Martini meritis per tempora longa, Gregori,
 3 Turonicum foveas pastor in urbe gregem.
 4 Conciliis sacris sis norma et vita piorum
 5 exemproque tuo crescat adeptus honor.
 6 Lumen apostolicum populis tua lingua ministret
 et caeli donum te radiante micet.

F5_5 v.1 ITEM AD EUNDEM DE IUDAEIS CONVERSIS PER AUITUM EPISCOPUM ARVERNUM
 2 In venerabilibus famulis operator opime,
 3 condecet ut semper laus tua, Christe, sonet,
 4 inspirans animum, votum effectumque ministrans
 et sine quo nullum praevallet esse bonum,
 5 lumine perspicuo fecundans pectora vatuum,
 6 ut populis generent viscera sancta fidem,
 7 supra candelabrum positi, quorum ore corusco
 8 dogmatis igne micans luceat alma domus
 9 et velut est oculus capitis qui dirigit artus,
 10 sic pia pastoris cura gubernet oves.
 11 Pectora pontificum ditans virtute superna,
 12 tu Deus omnipotens, summe, perennis apex,
 13 Spiritus alme, sacri labiis infusus Aviti,
 14 per famulum loqueris, crescat ut ordo gregis.
 15 Qui non contentus numero quem accepit ab illo
 16 vilicus hic Domini dupla talenta refert.
 17 Plebs arverna etenim, bifido discissa tumultu,
 18 urbe manens una non erat una fide.
 19 Christicolis judaeus odor resilibat amarus
 20 obstabatque piis impia turba sacris,

21 extollens cervix Domini juga ferre recusans ;
 22 sic tumidis animis turgēt inane cutis.
 23 Quos in amore Dei monitabat saepe sacerdos,
 24 ut de conversis iret ad astra seges.
 25 Sed caligosi recubans velaminis umbra
 26 pectora taetra premens cernere clara vetat.
 27 Venerat ergo dies Dominus qua est redditus astris
 28 ac homo sidereum pendulus ivit iter.
 29 Plebs armante fide judaica templa revellit
 30 et campus patuit quo synagoga fuit.
 31 Tempore quo Christi repedavit ad alta potestas,
 32 ille quod ascendit, res inimica ruit.
 33 Hic tamen antistes Moysei lege rebelles
 34 alloquitur blande quos dabat ira truces :
 35 "Quid facis, o judaea cohors nec docta vetustas ?
 36 Ut vitam renoves, credere disce senes.
 37 Lactea canities sapiat majora juventae ;
 38 sensum pone gravem quo puerile fuit.
 39 Non pudeat meliora sequi vel tarda veteranus,
 40 corpore deficiens crescat honore senes.
 41 Est Deus, alta fides, unus trinus et trinus unus :
 42 personis propriis stat tribus unus apex.
 43 Nam pater et genitus, quoque sanctus spiritus idem ;
 44 sic tribus est unum jus, opus, ordo, thronus.
 45 Legifer hoc reboat, patriarcha hoc credit Abraham :
 46 hinc pater est nobis, est quia nostra fides.
 47 Tres videt aequales, unum veneratus adorat,
 48 unum voce rogat, tres quoque pelve lavat.
 49 Sic patruo similis Loth suscipit hospes euntes ;
 50 quos cibant in Sodomis, hi rapuere Segor.
 51 Cum a Domino Dominus pluit igni triste Gomorrae,
 52 filius et pater est, a Domino Dominus.
 53 Qui tuus, ipse meus stat conditor atque creator,
 54 hujus plasma sumus qui est trinitate Deus.
 55 Unius estis oves, heu, cur non uniter itis ?
 56 Sit, rogo, grex unus, pastor ut unus adest.
 57 Rennuis ? An recolis quod canna davitica pangit
 58 quodque prophetali virgine fetus agit ?
 59 In cruce transfixus palmis pedibusque pependit
 60 sed corrupta caro non fuit ex tumulto.
 61 Post triduum remeans sanat nos vulnere longo :
 62 quod rediit caelis, testis et ista dies.
 63 Crede meis aut crede tuis, convicta senectus,
 64 si fugis ac trepidas, nec legis ista legens.
 65 Protrahimus verbum brevitatis tempore longum :
 66 aut admitte preces aut, rogo, cede loco.
 67 Vis hic nulla premit, quo vis te collige liber :
 68 aut meus esto sequax aut tuus ito fugax.
 69 Redde, colone, locum, tua duc contagia tecum,
 70 aut ea sit sedes, si tenet una fides. "
 71 Haec pia verba viris miti dedit ore sacerdos
 72 ut sibi quo libeat semita cordis eat.
 73 Ast judaea manus, stimulante furore rebellis,
 74 colligitur, rapitur, conditur inde domo.
 75 Christicolae ut cernunt tunc agmina manzara jungi,
 76 protinus insiliunt qua latet ille dolus :
 77 si fremerent, gladiis sentirent justa cadentes
 78 vivere quo possint aut daret arma fides.

79 Legati occurrunt vati mandata ferentes :
 80 "Nos judaea manus jam tua caula sumus.
 81 Ne pereant, acquire Deo qui vivere possunt.
 82 Si mora fit, morimur et tua lucra cadunt.
 83 Tende celer gressum, properes nisi praepete cursu,
 84 funera natorum sunt tibi flenda, pater ".
 85 Fletibus his victus rapitur miserando sacerdos,
 86 ut ferat adflctis rite salutis opem.
 87 Perveniunt quo clausa loco fera turba latebat,
 88 quae occurrens lacrimis ingerit ore preces :
 89 "mens est tarda boni judaica jura tenenti,
 90 lucem sero videt praetereunte die.
 91 Sic oculis cordis velum est ab origine tensum,
 92 caecus ut ignoret quo via recta vocet.
 93 Sed tandem sequimur, pastor, quo saepe monebas,
 94 qui sale tam dulci currere cogis oves.
 95 Credentes jam crede tuos nec fallere falsis :
 96 nos lavacrum petimus, sit tibi praesto lacus.
 97 Sensimus effectu quod agebas rite precando,
 98 quod per te hominem nos Deus ipse monet ".
 99 Hinc trahit ad lucem quos texerat umbra negantes
 100 militiaeque novae rex aperibat iter.
 101 Agmina conveniunt quondam diversa sub unum
 102 partibus et geminis fit Deus unus amor.
 103 Hinc oleari ovium perfunditur unguine vellus
 104 aspersuque sacro fit gregis alter odor.
 105 Ecce dies aderat qua spiritus almus ab alto
 106 missus apostolicis fluxit in ora viris.
 107 Res sacra ruricolae, urbanos excitat omnes
 108 certatimque aditus ad pia festa terunt.
 109 Abluitur judaeus odor baptismate divo
 110 et nova progenies reddita surgit aquis.
 111 Vincens ambrosios suavi spiramine rores
 112 vertice perfuso chrismatis efflat odor.
 113 Ingenti numero celebratur pascha novellum
 114 ac de stirpe lupi progenerantur oves.
 115 Excepit populus populum, plebs altera plebem ;
 116 germine qui non est, fit sibi fonte parens.
 117 Undique rapta manu lux cerea provocat astra,
 118 credas ut stellas ire trahendo comas.
 119 Lacteus hinc vestis color est, hinc lampade fulgor
 120 ducitur et vario lumine picta dies
 121 nec festiva minus quam tunc fuit illa coruscans
 122 diversis linguis quae dedit una loqui.
 123 Quis, rogo, pontificis fuit illic sensus Aviti ?
 124 Quam validus fervor, cum daret ista Deo ?
 125 Inter candelabros radiabat et ipse sacerdos
 126 diffuso interius spiritus igne micans.
 127 Tum sibi qualis erat tam vera holocausta ferendo,
 128 cum libeat vivo hostia viva Deo ?
 129 Si patriarcha placet quoniam natum obtulit unum,
 130 qui tantos offert quam placiturus erit ?
 131 Moyses non valuit fidei quos subdere nostrae
 132 qui Christo adquirat quod sibi munus erit ?
 133 Fudit aromaticum Domini libamen ad aram
 134 incensumque novum misit ad astra Deo.
 135 Obtinuit votum quia junxit ovile sub uno
 136 et grege de niveo gaudia pastor habet.

137 Haec inculta tibi reputa, pater alme Gregori,
 138 qui Fortunato non valitura jubes.
 139 Adde quod exiguum me portitor inpulit instans
 140 et datur in spatiis vix geminata dies.
 141 Novimus affectu potius quo diligis illum
 142 hinc quem corde vides semper et ore tenes.
 143 Hoc tibi nec satis est hujus quod es ipse relator :
 144 conpellis reliquos plaudere voce sibi.
 145 Non fuit in vacuum quod te provexit alumnum :
 146 sic cui mente fidem reddis amore vicem.
 147 Annuat Omnipotens longo memoraliter aevo
 148 ut tu laus illi, laus sit et ille tibi.
 149 Me quoque vos humilem pariter memoretis utrique
 150 et pro spe veniae voce feratis opem.

AD SYAGRIUM EPISCOPUM AUGUSTIDUNENSEM_AUGUSTIDUNENSIS OPUS TIBI SOLVO SYAGRI

F5_6 v.1 Diu apex Adam ut fecit, dat somnia, donec
 2 avulsa costa plasmata est Eva nec inpar :
 3 felices pariter, dyploide lucis operti,
 4 ore coruscantes inter pia rura jugales ;
 5 ripae jocundae nari grata aura redibat,
 6 turis deliciae saturabant ubere flatu,
 7 una fovens ambos florosa sede voluptas,
 8 nota bonis regio pascebat Tempe beatos.
 9 At cum tam magno pollerent majus honore,
 10 tota hominum mire parebat terra duorum,
 11 occultus mendax mox exerit arma veneni :
 12 serpens elatus, zelator, larveus hostis,
 13 atrox innocuos evincens felle nocenti
 14 conlisit suasu quos gratia diva bearat.
 15 Et homo de terra tum denuo decedit illuc
 16 reptantisque dolo Eoo is excluditur ortu.
 17 Hac nati morimur damnati lege parentum.
 18 At Deus excellens aie et de lumine lumen
 19 e caeli solio dum munera providet ultro,
 20 castae carne rudi vivax introiit agnus.
 21 Prodiit inde salus matutinive lucerna
 22 intactae partu lux eruit excita mundum :
 23 a patre jure Deus, homo dehinc carneus alvo,
 24 ut nos eriperet, vili se detrahit auctor.
 25 O Regis venale caput, quod de cruce fixit,
 26 telo voce manu malfactus verbere felle,
 27 ac tu hac solvis captivos sorte, creator :
 28 sero vera data est vitalis emptio morte ;
 29 ymnos unde Deo loquor absolvente reatu.
 30 At vos, aeternae suffulti laude coronae,
 31 Gallorum radii vobis quo fulgeat et nox,
 32 rumpite lora jugis et sumitis arma diei :
 33 ipsave libertas vos liberat atque beabit.
 uersus descendentes
 34 Da Fortunato, sacer, haec pia vota, Syagri.
 35 Captivos laxans, domini meditatio fies.
 36 Cristus se misit cum nos a morte revexit.
 37 Dulce Dei munus quo merx te, care, coronet.
 38 Cara Deo pietas animam dat de nece solvi.

ITEM AD FELICEM EPISCOPUM NAMNETICUM
 F5_7 v.1 Sentio, summe pater, lumen venerabile cunctis,

2 urbis dulce ca put, mihi nomen amabile, Felix,
 3 amplectens quem corde gero pietatis in ulnis,
 4 pondus suave meum - nec onus gravat istud amantem.
 5 Cur humilem rae, summe, vocas loca visere blanda
 6 quae te, care, tenent ? Tecum modularer in illis,
 7 qua tua rura bavat vitrea Liger algidus unda.
 8 Cariaci speciosus ager devexus in amnem,
 9 hinc ubi flumen aquis recreat, hinc pampinus umbris
 10 et crepitans Boreas pineta comata flagellat :
 11 uber nempe solum, piscoso litore pulchrum,
 12 sed Fortunato facies tua reddit amoenum.

AD GREGORIUM EPISCOPUM POST ITINER

F5_8 v.1 Culmen honoratum, decus alium, lumen opimum,
 2 pastor apostolicae sedis amore placens,
 3 amplectende mihi semper, sacer arce Gregori,
 4 nec divulse animo, vir venerande, meo,
 5 gaudeo quod rediit Turonis antistes honore
 6 laetificorque mihi te remeasse patrem.
 7 Plaudimus instanter communia vota tenere,
 8 civibus et patriae te revocasse diem.
 9 Praesentem famulum mecum commendo, sacerdos,
 10 10 optantes longe vos moderare gregem.

AD EUNDEM

11 Officiis generose piis, pater alme Gregori,
 12 12 mente salutifera qui petis astra palam,
 13 13 et quicumque tuis monitis animatur inermis,
 14 14 militiae sacrae victor habebit opem.
 15 15 Commendans humilem famulum me solvo salutem
 16 16 semper amore pio, vir benedictae Deo.
 17 17 Pagina si brevis est, non est brevis ardor amantis,
 18 18 nam plus corda colunt quam mea verba canunt.

AD EUNDEM PRO LIBRO PRAESTITO

19 Carmina diva legens proprioque e pectore condens,
 20 20 participans aliis fit tibi palma, parens.
 21 21 Haec quoque, quae pridem tribuisti pastor ovili,
 22 22 grates persolvens debite laudo libens.
 23 23 Vos tamen hinc maneant donaria celsa Tonantis,
 24 24 qui sacras inopi distribuistis opes.
 25 25 Quae cum percontare queam, pro munere tanto
 26 26 tunc magis ore meo gratia vestra sonet.
 27 27 Praesentem famulum Prodromerem, summe sacerdos,
 28 28 commendo supplex, dulcis amore pater.
 29 29 Cui sua concedens justae moderamine librae
 30 30 crescat honore Dei palma futura tibi.

AD EUNDEM PRO INVITATIONE

F5_9 v.1 Invitans pietate patris sacer ire Gregori
 2 qua Domini Turonis pascis amare greges,
 3 quo sacer antistes meritis Martinus opimis
 4 quas prius obtinuit, has tibi cessit oves.
 5 Nunc quoque per caulas et florea pascua Christi
 6 rite gubernantes ducitis ambo greges.
 7 Sed mihi vim faciens vester modo frater honore,
 8 ad vos ne properem nempe, retorsit iter.
 9 Saepe rogans voto, mandato et missile verbo
 10 10 et conjuratus sum sibi pollicitus.
 11 11 Vir bonitate placens et pastor pacis amator :

12 foederis ob studium sit veniale, precor.
 13 Vos quoque sed genitae propriae, lvenerande, salutant,
 14 ast ego commender, quaeso, beate pater.

AD EUNDEM PRO COMMENDATIONE MULIERIS

F5_10 v.1 Summe pater patriae, specimen pietatis opimae,
 2 dulce caput Turonis, religionis apex,
 3 jugiter alta sequens, clementi corde Gregori,
 4 unde animae decus est huc ratione petens :
 5 quam commendasti venientem, celse sacerdos,
 6 hanc redeuntem ad te suscipe more patris.
 7 Sis quoque longaevus cunctorum, care, recursus,
 8 et mihi vel reliquis sit tua vita seges.

AD EUNDEM DE ITINERE SUO

F5_11 v.1 Jugiter opto libens, sacer amplectende Gregori,
 2 cernere vos oculis, quaerere litterulis.
 3 Dulce videre mihi, at si desit copia cerni,
 4 spes erit oranti vel dare verba patri.
 5 Nuper ab aspectu decedens concite vestro
 6 per glaciem vitreas me loquor isse vias.
 7 Sed crucis auxilio, Martino operante patrono,
 8 perveni ad matres salvus, opime pater.
 9 Quae vos multiplici veneranter honore salutant ;
 10 ast ego pro reditu vota salutis ago.

AD EUNDEM SALUTATORIA

F5_12 v.1 Summe sacerdotum, bonitatis opima facultas,
 2 culmen honore tuo, lumen amore meo,
 3 officiis venerande sacris, pietatis alumne,
 4 pignore amicitiae corde tenende meae,
 5 florens in studiis et sacra in lege fidelis,
 6 semper agens animae dona futura tuae :
 7 te, pater, ergo precans terram freta sidera testor,
 8 ut velis ore sacro me memor esse tuum.

AD EUNDEM PRO POMIS ET GRAFIOLIS

F5_13 v.1 Officiis generose piis, sacer arce Gregori,
 2 absens fis praesens munere, summe pater,
 3 qui mihi transmittis propria cum prole parentes,
 4 insita cum fructu : surcula, poma simul.
 5 Det Deus omnipotens, meritorum fruge repletus
 6 mala legas avidae quae paradisus habet.

AD EUNDEM DE COMMENDATIONE PUELLAE

F5_14 v.1 Cum graderer festinus iter, pater alme Gregori,
 2 qua praecessoris sunt pia signa tui, -
 3 quod fertur convulsa jacens radicatus arbor
 4 Martini ante preces exiluisse comis ;
 5 quae fidei merito nunc stat spargendo medellas,
 6 corpora multa medens, cortice nuda manens -
 7 fletibus huc lugent genitor genetrixque puellam
 8 voce implendo auras et lacrimando genas.
 9 Figo pedem, suspendo aurem : mihi panditur ore
 10 vix per singultus vendita nata suos.
 11 Quaero adhuc : questus perhibet nullo indice furto
 12 furti ex objectu hanc pater ire jugo ;
 13 se voluisse dare et jurantes ordine testes

- 14 nomine quemque tenens nec potuisset egens.
 15 Non aderat iudex, erat accusator adurguens :
 16 hic ego quid facerem, posse vetante, sacer ?
 17 " Si pius hic, dixi, praesens Martinus adesset,
 18 nil permisisset perdere pastor ovem ".
 19 Sed tamen invalui recolens te, summe sacerdos,
 20 spem praecessoris qui pietate refers.
 21 Discute, distringe ac, si sit secus, eripe dulcis
 22 et pater adde gregi : hanc quoque redde patri.
 23 Me simul officio famulum tibi, care, subactum
 24 protege perfugio, pastor opime, pio.
- ITEM AD EUNDEM DE COMMENDATIONE PEREGRINI
- F5_15 v.1 Vir bone, pro meritis adipiscens culmen honoris,
 2 nobile praesidium, pontificale caput,
 3 quem gradus et genium fructu pietatis opimo
 4 dignius adtollunt amplificante Deo,
 5 ut tibi sit famulans memoratus amore benigno,
 6 Fortunati humilis te, pater, orat apex.
 7 Hic peregrinus item laetetur, summe sacerdos,
 8 pastorem et patriam te meruisse suam.
- AD EUNDEM SALUTATORIA
- F5_16 v.1 Pastor honoris apex, venerabilis arce sacerdos
 2 et decus alme patrum, religionis amor,
 3 gloria pontificum, meriti pia palma, Gregori,
 4 adsurgente gradu nobile jure caput :
 5 Fortunatus, opem tribui qui poscit Olympi,
 6 per te, care pater, quo mereatur age.
- ITEM AD EUNDEM SALUTATORIA
- F5_17 v.1 Visitat a vobis dignanter epistula currens
 2 me, sacer antistes, vir pietate pater.
 3 Hanc avidus capiens oculis animoque recurro,
 4 sospite te gaudens, quod referebat apex.
 5 Longius huc vestro sub nomine, papa Gregori,
 6 pagina me recreet missa salutis ope.
- DOMINIS SANCTIS ATQUE APOSTOLICIS IN CHRISTO
- F5_18 v.1 Gloria pontificum, veneratio Christicolarum,
 2 norma sacerdotum, culmen et orbis honor,
 3 qui loca perspicitis propriae mercedis amore,
 4 succurrendo viris vester ut extet apex :
 5 ecce venit praesens Italus, peregrinus et hospes :
 6 cernens pastores ne, precor, erret ovis.
 7 Qualiter ad patriam properet, solacia poscit :
 8 inveniat munus vos vagus exul inops.
 9 Me Fortunatum proprium pietate parentum
 10 conciliate polo, quaeso, precando Deum.
- AD AREDIUM ABBATEM
- F5_19 v.1 Opto, benigne pater, verbo tibi ferre salutem,
 2 si minus hinc oculo cernere te valeo.
 3 Est etenim vestri tantus mihi cultus honoris,
 4 ut pro me occurrat hinc tibi missus apex.
 5 Quaeso, beate, tamen per dulcia pabula Christi
 6 me quoque commemores, cum dabis ore preces.
 7 Munera credo Dei tribui mihi, pastor Aredi,

8 si Fortunati sis memor, alme, tui,
 9 pro me etiam sanctam genetricem, care, salutans.
 10 Cum redit iste puer, redde loquentis opem.
 11 Vos itidem genitae propriae, pater ample, salutant,
 12 Agnes amore pio cum Radegunde simul.

LIBER SEXTUS

DE DOMNO SIGIBERTO REGE

F6_1A v.1 Vere novo, tellus fuerit dum exuta pruinis,
 2 se picturato gramine vestit ager,
 3 longius extendunt frondosa cacumina montes
 4 et renovat virides arbor opaca comas.
 5 Promittens gravidas ramis genitalibus uvas
 6 palmite gemmato vitis amoena tumet.
 7 Praemittens flores gracili blandita susurro
 8 deliciosa favis mella recondit apes ;
 9 progeniem reparans casto fecunda cubili
 10 artifices natos gignere flore cupit.
 11 Nexibus apta suis pro posteritatis amore
 12 ad fetus properans garrula currit avis.
 13 Semine quisque suo senio juvenescit in ipso,
 14 omnia dum redeunt gaudia mundus habet.
 15 Sic modo cuncta favent, dum prosperitate superna
 16 regia caesareo proficit aula jugo.
 17 Ordine multiplici felicem in saecula regem
 18 undique cinxerunt lumina tanta ducum.
 19 Culmina tot procerum concurrunt culmen ad unum.
 20 Mars habet ecce duces, pax habet ecce decus.
 21 Cunctorum adventu festiva palatia fervent,
 22 conjugio regis gens sua vota videt.
 23 Vos quorum inrigui fontis meat unda, favete :
 24 iudicio vestro crescere parva solent.

DE DOMNO SIGIBERTO REGE

F6_1B v.1 Felicem, sol, pande diem radiisque serenis
 2 sparge comas, thalamos sincero lumine complens.
 3 Sigibertus ovans, ad gaudia nostra creatus,
 4 vota facit, qui nunc alieno liber amore
 5 vincula cara subit, cujus moderante juventa
 6 conubium mens casta petit lasciva retundens.
 7 Ad juga confugit cui nil sua subripit aetas.
 8 Corde pudicus agens, rector tot gentibus unus
 9 et sibi frena dedit, sed quod natura requirit,
 10 lege maritali amplexu est contentus in uno,
 11 quo non peccat amor, sed casta cubilia servans
 12 instaurat de prole lares, ubi luserit heres.
 13 Torsit amoriferas arcu stridente sagittas
 14 forte Cupido volans, terris genus omne perurit
 15 nec pelagus defendit aquis ; mox vilia corda
 16 subdit, vulgus iners. Tandem dehinc sensus opimi
 17 regis anhelantem placidis bibit ossibus ignem,
 18 molliter incumbens et inhaesit flamma medullis.
 19 Regalis fervebat apex nec nocte sopora
 20 cordis erat requies. Oculis animoque recurrens
 21 ad vultus quos pinxit Amor mentemque fatigans
 22 saepe per amplexum falsa sub imagine lusit.

23 Mox ubi conspexit telo superante Cupido
24 virginea mitem torreri lampade regem
25 laetus ait Veneri : " Mater, mea bella peregi :
26 pectore flagranti mihi vincitur alter Achilles,
27 Sigibertus amans Brunichilde carpitur igne ;
28 quae placet apta toro, maturis nubilis annis,
29 virginitas in flore tumens, complexa marito
30 primitiis placitura suis, nec damna pudoris
31 sustinet, unde magis pollens regina vocatur.
32 Hoc quoque virgo cupit, quamvis verecundia sexus
33 obstet : amata viri dextra levio re repellit
34 ignoscitque sibi culpas quas intulit ignis.
35 Sed modo laeta veni, quoniam te vota requirunt. "
36 Mox Venus ambrosio violas admiscit amomo,
37 demetit ungue rosas gremioque recondit avaro
38 et pariter levibus fregerunt nubila pinnis.
39 Ut venere simul thalamos ornare superbos,
40 hinc Venus egregiam praeponere coepit alumnam,
41 inde Cupido virum, nubentibus ambo faventes
42 et litem fecere piam. Sic deinde Cupido
43 matri pauca refert : "Tibi quem promissimus hic est,
44 Sigibertus, amor populi, lux nata parentum,
45 qui genus a proavis longo tenet ordine reges
46 et reges geniturus erit, spes gentis opimae,
47 quo crevit natale decus, generosa propago.
48 Ac melior de stirpe redit famamque priorum
49 posteritas excelsa fovet. Hic nomen avorum
50 extendit bellante manu, cui de patre virtus
51 quam Nablis ecce probat, Toringia victa fatetur,
52 proficiens unum gemina de gente triumphum,
53 per Theudebertum pietas, dominum venialem :
54 reddidit iste duos, pro ambobus sufficit unus.
55 Cardinis occidui dominans in flore juventae,
56 jam gravitate senes tenerosque supervenit annos :
57 legem naturae meruit praecedere factis,
58 quamvis parva tamen nulli minor imperat aetas.
59 Qui sensum mature regit generosior hic est
60 quisquis in angusto fuerit moderatior aevo.
61 Sic fovet hic populos ipsis intransantibus annis :
62 ut pater et rex sit, nullum gravet, erigat omnes.
63 Nulla dies sine fruge venit : nisi congrua praestet,
64 perdere plura putat, si non concesserit ampla.
65 Gaudia diffundit radianti lumine vultus :
66 nubila nulla gravant populum sub rege sereno.
67 Pectore maturo culpas indulget acerbas.
68 Unde alii peccant, ignoscendo iste triumphat.
69 Doctus enim quoniam prima est in principe virtus
70 esse pium, quia semper habet qui parcere novit,
71 corrigit ipse prius quod poscit ut alter emendet.
72 Qui sibi censura est reliquos bene lege coerces.
73 In quo digna manent quicquid de rege requiras.
74 Solus amat cunctos et amatur ab omnibus unus. "
75 Incipit inde Venus laudes memorare puellae :
76 "O virgo miranda mihi, placitura jugali,
77 clarior aetheria, Brunichildis, lampade fulgens,
78 lumina gemmarum superasti lumine vultus,
79 altera nata Venus regno dotata decoris
80 nullaque Nereidum de gurgite talis Hiberno

81 Oceani sub fonte natat, non ulla Naphea
 82 pulchrior, ipsa suas subdunt tibi flumina nymphas.
 83 Lactea cui facies incocta rubore coruscat,
 84 lilia mixta rosis, aurum si intermicet ostro,
 85 decertata tuis numquam se vultibus aequant.
 86 Sapphirus, alba, adamans, crystalla, zmaragdus, iaspis
 87 cedant cuncta : novam genuit Hispania gemmam.
 88 Digna fuit species potuit quae flectere regem.
 89 Per hiemes validasque nives, Alpenque, Pyrenen,
 90 perque truces populos vecta est duce rege sereno
 91 terrenis regina toris. " Super ardua montis
 92 planum carpis iter : nil obstat amantibus umquam
 93 quos jungi divina volunt. Quis crederet autem
 94 hispanam tibimet dominam, Germania, nasci,
 95 quae duo regna jugo pretiosa conexuit uno ?
 96 Non labor humanus potuit tam mira parare ;
 97 nam res difficilis divinis utitur armis.
 98 Longa retro series regi hoc vix contulit ulli :
 99 difficili nisu peraguntur maxima rerum.
 100 Nobilitas excelsa nitet, genus Athanagildi
 101 longius extremo regnum qui porrigit orbi,
 102 dives opum quas mundus habet populumque gubernat
 103 hispanum sub jure suo pietate canenda.
 104 Cur tamen egregii genitoris regna renarrem,
 105 quando tuis meritis video crevisse parentes ?
 106 Quantum, virgo micans, turbas superare videris
 107 femineas, quantum tu, Sigiberte, maritos.
 108 Ite diu juncti membris et corde jugati,
 109 ambo pares genio, meritis et moribus ambo,
 110 sexum quisque suum pretiosis actibus ornans,
 111 cujus amplexu sint colla conexa sub uno
 112 et totos placidis pergatis lusibus annos.
 113 Hoc velit alterutrum quicquid dilexerit alter.
 114 Aequa salus ambobus eat, duo pectora servans,
 115 unus amor vivo solidamine junctus alescat.
 116 Auspiciis vestris cunctorum gaudia surgunt,
 117 pacem mundus amet, victrix concordia regnet.
 118 Sic iterum natis celebretis vota parentes
 119 et de natorum teneatis prole nepotes.

F6_1C v.1 ITEM DE SIGIBERTO ET BRUNICHILDE REGINA
 2 Victor ab occasu quem laus extendit in ortum
 3 et facit egregium principis esse caput,
 4 quis tibi digna ferat ? Nam me vel dicere pauca
 5 non trahit ingenium, sed tuus urguet amor.
 6 Si nunc Vergilius, si forsitan esset Homerus,
 7 nomine de vestro jam legeretur opus.
 8 Sigiberte potens, generosis clare triumphis,
 9 hinc nova te virtus praedicat, inde genus.
 10 Cujus rapta semel sumpsit Victoria pinnas
 11 et tua vulgando prospera facta volat.
 12 Saxone Thoringo resonat : sua damna moventes,
 13 unius ad laudem tot cecidisse viros.
 14 Quod tunc ante aciem pedibus prior omnibus isti,
 15 hinc modo te reges unde sequantur habes.
 16 Prosperitate nova pacem tua bella dederunt
 17 et peperit gladius gaudia certa tuus.
 Plus tamen ut placeas, cum sit victoria jactans,

18 tu magis unde subis, mitior inde manes.
 19 Est tibi summus honor, sed mens praecessit honorem,
 20 moribus ut vestris debitor extet apex.
 21 Justitiae cultor, pietatis amore coruscas :
 22 quod te plus habeat, certat utrumque bonum.
 23 Lingua, decus, virtus, bonitas, mens, gratia pollent,
 24 ornarent cunctos singula vestra viros.
 25 Cunctorum causas intra tua pectora condis,
 26 pro populi requie te pia cura tenet :
 27 omnibus una salus datus es quibus ordine sacro
 28 tempore praesenti gaudia prisca refers.
 29 Catholico cultu decorata est optima conjux,
 30 Ecclesiae crevit te faciente domus.
 31 Reginam meritis Brunichildem Christus amore
 32 tunc sibi conjunxit, hanc tibi quando dedit.
 33 Altera vota colens melius quia munere Christi,
 34 pectore juncta prius, plus modo lege placet.
 35 Rex pie, reginae tanto de lumine gaude,
 36 adquaesita bis est quae tibi nupta semel,
 37 pulchra, modesta, decens, sollers, pia, grata, benigna,
 38 ingenio, vultu, nobilitate potens.
 39 Sed quamvis tantum meruisset sola decorem,
 40 ante tamen homini, nunc placet ecce Deo.
 41 Saecula longa micans cara cum conjugue ducas
 42 quam tibi divinus consociavit amor.

DE CHARIBERTO REGE

F6_2 v.1 Inclita magnarum processit gloria rerum
 2 et de rege pio sparsit ubique decus,
 3 quem gravitate, animo, sensu, moderamine legum,
 4 praedicat occiduus sol oriensque virum,
 5 qui quadripertitis mundi sub partibus amplis,
 6 fructificante fide, semina laudis habet.
 7 Hinc cui barbaries, illinc Romania plaudit ;
 8 diversis linguis laus sonat una viri.
 9 Dilige regnantem celsa, Parisius, arce
 10 et cole tutorem qui tibi praebet opem.
 11 Hunc modo laeta favens avidis amplectere palmis
 12 qui jure est dominus, sed pietate pater.
 13 De Childeberto veteres compesce dolores :
 14 rex placidus rediit qui tua vota fovet.
 15 Ille fuit mitis, sapiens, bonus, omnibus aequus :
 16 non cecidit patruus, dum stat in urbe nepos.
 17 Dignus erat heres ejus sibi sumere regnum
 18 qui non est illo, laude loquente, minor.
 19 Charibertus adest, qui publica jura gubernans
 20 tempore praesenti gaudia prisca refert.
 21 In tantum patruo se prodidit esse sequacem
 22 ut modo sit tutor conjugis iste nepos
 23 qui Childeberti retinens dulcedine nomen
 24 ejus natarum est frater et ipse pater.
 25 Quae bene defensae placido moderamine regis
 26 in consobrino spem genitoris habent.
 27 Maxima progenies, generosa luce coruscans,
 28 cujus ab excelsis gloria currit avis.
 29 Nam quoscumque velim veterum memorare parentum
 30 stirpis honorificae regius ordo fluit,
 31 cujus celsa fides eduxit ad astra cacumen

32 atque super gentes intulit illa pedes,
 33 calcavit hostes tumidos, erexit amicos,
 34 fovit subjectos conteruitque feros.
 35 Cur tamen hic repetam praeconia celsa priorum,
 36 cum potius tua laus ornet honore genus ?
 37 Illi auxere armis patriam, sed sanguine fuso,
 38 tu plus adquiris qui sine clade regis.
 39 Quos prius infestis lassarunt bella periclis
 40 hos modo securos pacis amore foves.
 41 Omnia laeta canunt felicia tempora regis
 42 cujus in auspiciis floret opima quies,
 43 per quem tranquille terrarum frugis abundat :
 44 devotis populis est tua vita seges.
 45 Cum te nascentem meruerunt saecula regem,
 46 lumine majori fulsit in orbe dies.
 47 Posteritate nova tandem sua gaudia cernens
 48 crescere se dixit prolis honore pater.
 49 Qui quamvis esset sublimi vertice rector,
 50 altius erexit, te veniente, caput :
 51 laetus in heredis gremio sua vota reclinans,
 52 floruit inde magis spe meliore senes.
 53 Ante alios fratres regali germine natus,
 54 ordine qui senior, sic pietate prior.
 55 Praedicat hinc bonitas, illinc sapientia plaudit,
 56 inter utrumque decus te sibi quisque rapit.
 57 De patruo pietas et de patre fulget acumen,
 58 unius in vultu vivit uterque parens.
 59 Quas habuere ambo laudes tu colligis omnes
 60 et reparas solus lege favente duos.
 61 Semita justitiae, gravitatis norma refulges
 62 et speculum vitae dat pretiosa fides.
 63 Tranquillis animis moderatio fixa tenetur,
 64 qui portum in proprio pectore semper habes.
 65 Tempestas nullo penetrat tua corda tumultu,
 66 ne sensu titubes, anchora mentis adest :
 67 constantes animos non ventilat aura susurrans
 68 nec leviter facili mobilitate trahit.
 69 Hinc bene disposito comitatur gloria cursu,
 70 quod se mature mens moderata gerit.
 71 Consilium vigilans alta radice retractas
 72 et res clausa aliis est manifesta tibi.
 73 Publica cura movens proceres si congreget omnes
 74 spes est consilii te monitore sequi.
 75 Hinc quotiens felix legatio denique pergit,
 76 ingreditur caute quam tua lingua regit.
 77 Quod tam mirifico floret patientia cultu,
 78 est tibi daviticae mansuetudo lyrae.
 79 Justitiae rector, venerandi juris amator,
 80 judicium sapiens de Salomone trahis,
 81 tu melior fidei merito. Nam principis ampli
 82 Trajani ingenium de pietate refers.
 83 Quid repetam maturum animum, qui tempore nostro
 84 antiqui Fabii de gravitate places ?
 85 Si veniant aliquae variato murmure causae,
 86 pondera mox legum regis ab ore fluunt.
 87 Quamvis confusas referant certamina voces,
 88 nodosae litis solvere fila potes.
 89 Obtinet adveniens fructum cum justa petuntur :

90 quem sua causa fovet praemia victor habet.
 91 Cujus clara fides valida radice tenetur :
 92 antea mons migrat quam tua verba cadant.
 93 Spes promissa stat nullo mutabilis actu :
 94 pollicitata semel perpetuata manent.
 95 Illa domus proprio de pondere tuta tenetur
 96 quae fundamento stat bene fixa suo.
 97 Cum sis progenitus clara de gente Sigamber,
 98 floret in eloquio lingua latina tuo.
 99 Qualis es in propria docto sermone loquella,
 100 qui nos Romanos vincis in eloquio ?
 101 Splendet in ore dies detersa fronte serenus :
 102 sinceros animos nubila nulla premunt.
 103 Blanda serenatum circumdat gratia vultum,
 104 laetitiam populus regis ab ore capit.
 105 Muneribus largis replet tua gratia cunctos :
 106 ut mea dicta probes, plebs mihi testis adest.
 107 Bonitas immensa Dei, quae divite censu
 108 quod famulis tribuit, hoc putat esse suum !
 109 Erigis abjectos, erectos lege tueris,
 110 omnibus in totum factus es omne bonum.
 111 Protegat Omnipotens pietatis munere regem
 112 et dominum servet quem dedit esse patrem.
 113 Cives te cupiant, tu gaudia civibus addas,
 114 plebs placeat famulans, rex pietate regat.

DE THEUDECHILDE REGINA

F6_3 v.1 Inclita progenies, regali stirpe coruscans,
 2 cui celsum a proavis nomen origo dedit.
 3 Currit in orbe volans generis nova gloria vestri
 4 et simul hinc frater personat, inde pater.
 5 Sed quamvis niteat generosa propago parentum,
 6 moribus ex vestris multiplicatur honor.
 7 Cernimus in vobis quicquid laudatur in illis :
 8 ornasti antiquum, Theudechilde, genus.
 9 Mens veneranda, decens, sollers, pia, cara, benigna,
 10 cum sis prole potens, gratia major adest.
 11 Evitans odii causas micat ampla potestas.
 12 Quae terrore minus, plus in amore venis.
 13 Mitis ab ore sonus suavissima dicta resultat
 14 verbaque colloqui sunt quasi mella favi.
 15 Femineum sexum quantum praecedis honore,
 16 tantum alias superas et pietatis ope.
 17 Si novus adveniat, recipis sic mente benigna
 18 ac si servitiis jam placuisset avis.
 19 Pauperibus fessis tua dextera seminat escas,
 20 ut segetes fructu fertilioris metas.
 21 Unde foves inopes, semper satiata manebis
 22 et quem sumit egens fit tuus ille cibus.
 23 Pervenit ad Christum quicquid largiris egeno :
 24 etsi nemo videt, non peritura manent.
 25 Cum venit extremus finis concludere mundum
 26 omnia dum pereunt, tu meliora petis.
 27 Ecclesiae sacrae, te dispensante, novantur.
 28 Ipsa domum Christi condis et ille tuam.
 29 Tu fabricas illi terris, dabit ille supernis :
 30 conmutas melius sic habitura polos.
 31 Stat sine fraude tuum quod mittis ad astra talentum :

32 quas bene dispergis has tibi condis opes.
 33 Quae Domino vivis, summos non perdis honores.
 34 Regna tenes terris, regna tenenda polis.
 35 Sit modo longa salus pro munere plebis in orbe ;
 36 felix quae meritis luce perennis eris.

DE BERTHICHILDE

F6_4 v.1 Mens devota Deo, Berchilde corde coruscans
 2 pectore sub cuius Christus amore manet,
 3 despiciens mortale malum, vitalia servans,
 4 unde fugis terras, hinc petis astra magis.
 5 Inmaculata micans, nescis contagia mundi,
 6 sordibus humanis libera membra geris.
 7 Digna pudicitiae debentur praemia sacrae,
 8 virgo dicata Deo, hinc rapienda polo.
 9 Ille tenet caelos cui tu complexa videris :
 10 quo tuus est sponsus, huc eris ipsa simul.
 11 Non cupis auro humeros nec collum pingere gemmis,
 12 sed melius casto pectore pura micas.
 13 Mutasti vestem, mutasti gentis honorem,
 14 cum thalamis Domini sponsa juganda venis.
 15 Quam meliore via meruisti vota tenere,
 16 quando Creatori, forma creata, places !
 17 Pauperibus largas das esurientibus escas :
 18 nescit habere famem qui tua tecta petit.
 19 Qui sine veste jacet, tegmen pietate ministras :
 20 unde calet nudus, frigora nulla times.
 21 Te redimente pia, captivi vincula laxant :
 22 quae solvis vinctos, libera semper eris.
 23 Distribuis censum nulli sua vota negando
 24 divitiasque tuas omnibus esse facis.
 25 Colligis in caelis quicquid dispergis in arvis.
 26 Semina nunc fundens, post meliora metes.
 27 Quicquid habet mundus fugitivo tramite transit.
 28 Tempore tu modico semper habenda facis.
 29 Hic tibi longaevis sit vita superstes in annis,
 30 rursus in aeternum sit tibi vera salus.

DE GELESUINTA

F6_5 v.1 Casibus incertis rerum fortuna rotatur
 2 nec figit stabilem pendula vita pedem.
 3 Semper in ambiguo saeculum rota lubrica volvit
 4 et fragili glacie lapsibus itur iter.
 5 Nulli certa dies, nulli est sua certior hora,
 6 sic sumus in statu debiliore vitro.
 7 Dum gressu ancipiti trahit ignorantia fallens,
 8 huc latet ars foveae, quo putat esse viae.
 9 Nescia mens hominum quid sit necis atque salutis,
 10 lucifer an vitae mors sibi vesper erit.
 11 His premimur tenebris, ignari sorte futuri
 12 et vaga tam fragile haec tempora tempus habent.
 13 Toletus geminas misit tibi, Gallia, turres :
 14 prima stante quidem, fracta secunda jacet.
 15 Alta super colles, speciosa cacumine pulchro,
 16 flatibus infestis culmine lapsa ruit.
 17 Sedibus in patriae sua fundamenta relinquens,
 18 cardine mota suo, non stetit una diu
 19 de proprio migrata solo : nova mersit harena

20 exul et his terris, heu, peregrina jacet.
 21 Quis valet ordiri tanti praesagia luctus ?
 22 Stamine quo coepit texere flenda dolor ?
 23 Cum primum argentes jungi peteretur ad arctos
 24 regia regali Gelesuinta toro,
 25 fixa cupidineis cuperet huc frigora flammis
 26 viveret et gelida sub regione calens.
 27 Hoc ubi virgo metu audituque exterrita sensit,
 28 currit ad amplexus, Goisuintha, tuos.
 29 Tum matris collecta sinu male sana reclinans,
 30 ne divellatur se tenet ungue manu.
 31 Brachia constringens nectit sine fune catenam
 32 et matrem amplexu per sua membra ligat,
 33 illis visceribus retineri filia poscens
 34 ex quibus ante sibi lucis origo fuit,
 35 committens secura ejus se fasce levare
 36 cujus clausa uteri pignore tuta fuit.
 37 Tum gemitu fit maesta domus, strepit aula tumultu,
 38 reginae fletu plorat et omnis honor.
 39 In populi facie lacrimarum flumina sordent.
 40 Infans qui affectum nescit et ipse gemit.
 41 Instant legati germanica regna requiri,
 42 narrantes longae tempora tarda viae.
 43 Sed matris moti gemitu sua viscera solvunt
 44 et qui compellunt, dissimulare volunt.
 45 Dum natae amplexu genetrix nodata tenetur
 46 praetereunt duplices, tertia, quarta dies.
 47 Instant legati nota regione reverti.
 48 Quos his alloquitur Goisuintha gemens :
 49 " Si feritate trucis premerer captiva Geloni,
 50 forsitan ad has lacrimas et pius hostis erat ;
 51 si nec corde pius, cupidus mihi cederet hostis
 52 ut natam ad pretium barbara praeda daret.
 53 Si neque sic animum velit inclinare cruentum,
 54 matri praestaret quo simul iret iter.
 55 Nunc mora nulla datur, pretio neque flectimus ullo.
 56 Qui nihil indulget saevius hoste nocet.
 57 Post uteri gemitus, post multa pericula partus
 58 postque laboris onus quod grave feta tuli,
 59 quae genui natae matrem me non licet esse,
 60 ipsaque naturae lex mihi tota perit.
 61 Affectu jejuna meo, lacrimosa repellor
 62 nec pietas aditum nec dat origo locum.
 63 Quid rapitis ? Differte dies, dum disco dolores
 64 solamenque mali sit mora sola mei.
 65 Quando iterum videam, quando haec mihi lumina ludant,
 66 quando iterum natae per pia colla cadam ?
 67 Unde, precor, tenerae gressum spectabo puellae
 68 oblectetque animos matris et ipse jocus ?
 69 Post causas quas regna gerunt, ubi maesta reclinem ?
 70 Quis colat affectu, lambiat ore caput ?
 71 Extensis palmis quis currat ad oscula, vel quae
 72 cervici insiliant pendula membra meae ?
 73 Quem teneam gremio, blando sub fasce laborans,
 74 aut leviori manu verberer ipsa joco ?
 75 Nec te ferre sinu, quamquam sis adulta, gravarer,
 76 quae mihi dulce nimis et leve pondus eras.
 77 Cur nova rura petas illic ubi non ero mater ?

78 An regio forsan non capit una duas ?
 79 Quae genuere ergo lacerentur viscera luctu :
 80 gaudia cui pereunt, tempora fletus erunt.
 81 Plorans perdam oculos, duc et mea lumina tecum,
 82 si tota ire vetor, pars mea te sequitur."
 83 Tum proceres, famuli, domus, urbs, rex ipse remugit,
 84 quaque petisses iter, vox gravis una gemit.
 85 Progrediere fores tandem, sed turba morosa
 86 solvere dum properat, se properando ligat.
 87 Hinc tenet affectus, rapit inde tumultus euntes ;
 88 sic per utrasque vices flebile fervet opus.
 89 Alter abire monet, rogat alter amore redire :
 90 sic variante fide, hic trahit, ille tenet.
 91 Dividitur populus per regna novella vetustus ;
 92 stat pater, it genitus stat socer itque gener.
 93 Qui vidit strepitum, patriam migrare putaret
 94 et quasi captivum crederet ire solum.
 95 Procedunt portis. Serraco in ponte retento,
 96 protulit hoc fletu Gelesuinta caput :
 97 " Sic gremio, Tolete, tuo nutribas, ut aegra
 98 excludar portis tristis alumna tuis ?
 99 Quoque magis crucier, prodens mea vulnera luctu,
 100 stas felix regio : cur ego praeda trahor ?
 101 Antea clausa fui, modo te considero totam,
 102 nunc mihi nota prius, quando recedo, ferox.
 103 Hinc te dinumero currens per culmina visu ;
 104 en ego de numero non ero sola tuo.
 105 Crudeles portae, quae me laxastis euntem
 106 clavibus oppositis nec vetuistis iter !
 107 Antea vos geminas adamans petra una ligasset
 108 quam daret huc ullam janua pansa viam.
 109 Urbs, pia plus fueras, si murus tota fuisses :
 110 me ire ut ne sineres, cingeret alta silex.
 111 Pergo ignota locis, trepidans quidnam antea discam :
 112 gentem, animos, mores, oppida, rura, nemus.
 113 Quem, precor, inveniam peregrinis advena terris
 114 quo mihi nemo venis civis, amice, parens ?
 115 Dic, si blanda potest nutrix aliena placere,
 116 quae lavet ora manu vel caput ornet acu ?
 117 Nulla puella choro neque collactanea ludat :
 118 hic mea blandities, hic mea cura jaces.
 119 Si me non aliter, vel nuda sepulchra tenerent :
 120 non licet hic vivi ? Hic mihi dulce mori.
 121 Non fruor amplexu neque visu plena recedo ;
 122 quae me dimittis, dura Tolete, vale. "
 123 Sic accensi animi lacrimarum flumina rumpunt,
 124 fixus et inriguas parturit ignis aquas.
 125 Hinc iter arripiunt genetrix, nata, agmina flentum
 126 nec piget obsequii mater anhela sequi.
 127 Deducit dulcem per amara viatica natam,
 128 implentur valles fletibus, alta tremunt,
 129 frangitur et densus vacuis ululatibus aer.
 130 Ipsa repercusso murmure silva gemit.
 131 Dat causas spatii genetrix ut longius iret,
 132 sed fuit optanti tempus iterque breve.
 133 Pervenit quo mater ait sese inde reverti,
 134 sed quod velle prius, postea nolle fuit.
 135 Rursus adire cupit, via qua fert invia matrem.

136 Quam proceres retinent, ne teneretur iter.
 137 Haerebant in se amplexae pariterque reflexae.
 138 Incipit hic gemitu Goisuintha fero :
 139 " Civibus ampla tuis, angusta Hispania matri
 140 et regio soli tam cito clausa mihi !
 141 Quae licet a Zephyro calidum percurris in Eurum,
 142 et de Tyrreno tendis ad Oceanum,
 143 sufficiens populis quamvis regionibus amplis,
 144 quo est mea nata absens, terra mihi brevis es.
 145 Nec minus hic sine te errans et peregrina videbor
 146 inque loco proprio civis et exul ero.
 147 Quaeso quid inspiciant oculi quem, nata, requirant ?
 148 Quae mea nunc tecum lumina ducis, amor,
 149 tu dolor unus eris ; quisquis mihi luserit infans,
 150 amplexu alterius tu mihi pondus eris.
 151 Currat, stet, sedeat, fleat, intret et exeat alter,
 152 sola meis oculis dulcis imago redis.
 153 Te fugiente, errans aliena per oscula curram
 154 et super ora gemens ubera sicca premam.
 155 De facie infantum plorantia lumina lambam
 156 et teneras lacrimas insatiata bibam.
 157 Tali potu utinam vel parte refrigerer ulla,
 158 aut plorata avidae mitiget unda sitim !
 159 Quicquid erit, crucior : nulla hic medicamina prosunt,
 160 vulnere distillo, Gelesuintha, tuo.
 161 Qua, rogo, nata, manu cara haec coma pexa nitebit ?
 162 Quis sine me placidas lambiat ore genas ?
 163 Quis gremio foveat, genibus vehat, ambiat ulna ?
 164 Sed tibi praeter me non ibi mater erit.
 165 Quod superest, timibundus amor hoc mandat eunti :
 166 sis, precor, o felix, sed cave, vade, vale.
 167 Mitte avidae matri vel per vaga flabra salutem :
 168 si venit, ipsa mihi nuntiet aura boni. "
 169 Filia tum validis genetricis onusta querellis
 170 tristis, inops animi nec valitura loqui,
 171 clausa voce diu, vix fauce solubile fandi
 172 pauca refert - cordis vulnere lingua gravis :
 173 " Majestas si celsa Dei mihi tempora vellet
 174 nunc dare plus vitae, non daret ista viae.
 175 Ultima sed quoniam sors inrevocabilis instat,
 176 si jam nemo vetat, qua trahit ira sequar.
 177 Haec extrema tamen loquar et memoranda dolori :
 178 hinc tua non tua sunt. Goisuintha, vale. "
 179 Oscula sic rumpunt et fixa ori ora repellunt :
 180 dum se non possunt, aera lambit amor.
 181 Hinc pilente petens loca gallica Gelesuintha,
 182 stabat fixa oculis tristis eunte rota.
 183 E contra genetrix post natam lumina tendens,
 184 uno stante loco, pergat et ipsa simul.
 185 Tota tremens, agiles raperet ne mula quadrigas
 186 aut equus inpatiens verteret axe rotas,
 187 sollicitis oculis circumvolitabat amantem,
 188 illuc mente sequens qua via flectit iter.
 189 Saepe loquebatur quasi secum nata sederet
 190 absentemque manu visa tenere sinu.
 191 Prendere se credens in ventos brachia jactat
 192 nec natam recipit sed vaga flabra ferit.
 193 Inter tot comites unam spectabat euntem,

194 sola videbatur qua suus ibat amor.
 195 Plus genetrix suspensa animo quam filia curru :
 196 haec titubans votis ibat et illa rotis,
 197 donec longe oculo spatioque evanuit amplo
 198 nec visum adtingit, dum tegit umbra diem.
 199 Ipsa putat dubios natae se cernere vultus
 200 et cum forma fugit, dulcis imago redit.
 201 O nomen pietate calens, o cura fidelis,
 202 quamvis absenti quid nisi mater eras ?
 203 Fletibus ora rigans, lamentis sidera pulsans,
 204 singula commemorans, dulcia, dura, pia,
 205 mobilis, inpatiens, metuens, flens, anxia mater,
 206 quid sequeris lacrimis ? Augurat altus amor ?
 207 Illa tamen pergit qua trita viam orbita sulcat ;
 208 quisque suis vacuos fletibus implet agros.
 209 Inde Pyreneas per nubes transilit Alpes
 210 quaque pruinosis Julius alget aquis,
 211 qua nive canentes fugiunt ad sidera montes
 212 atque super pluvias exit acutus apex.
 213 Excipit hinc Narbo, qua litora plana remordens
 214 mitis Atax Rhodanas molliter intrat aquas.
 215 Post aliquas urbes Pictavas attigit arces
 216 regali pompa praetereundo viam
 217 inclitus ille quibus vere amplius Hilarius oris
 218 et satus et situs est, ore tonante loquax.
 219 Thrax, Italus, Scythia, Persa, Indus, Geta, Dacia, Britannus
 220 hujus in eloquio spem bibit, arma capit.
 221 Sol radio, hic verbo generalia lumina fundunt :
 222 montibus ille diem, mentibus iste fidem.
 223 Hanc ego nempe novus conspexi praetereuntem
 224 molliter argenti turre rotante vehi.
 225 Materno voluit pia quam Radegundis amore
 226 cernere ferventer, si daret ullus opem.
 227 Saepe tamen missis dulci sibi dulcis adhaesit
 228 et placide coluit quod modo triste dolet.
 229 Toronicas terras Martini ad sidera noti
 230 inde petit lento continuante gradu.
 231 Vingennae volucer transmittitur alveus alno :
 232 turba comes rapidis alacris exit aquis.
 233 Excipit inde repens vitrea Liger algidus unda
 234 quo neque vel piscem levis arena tegit.
 235 Pervenit qua se piscoso Sequana fluctu
 236 in mare fert, juncto Rotomagense sinu.
 237 Jungitur ergo toro regali culmine virgo
 238 et magno meruit plebis amore coli.
 239 Hos quoque muneribus permulcens, vocibus illos,
 240 et licet ignotos sic facit esse suos.
 241 Utque fidelis ei sit gens armata, per arma
 242 jurat jure suo, se quoque lege ligat.
 243 Regnabat placido componens tramite vitam,
 244 pauperibus tribuens advena mater erat.
 245 Quaque magis possit regno superesse perenni,
 246 catholicae fidei conciliata placet.
 247 Dolor insignis quid differs tempora fletus
 248 lugubresque vices plura loquendo taces ?
 249 Improba sors hominum, quae improviso abdita lapsu
 250 tot bona tam subito, morte volante, voras.
 251 Nam breve tempus habens consortia nexa jugalis

252 principio vitae funere rapta fuit.
 253 Praecipiti casu volucris praeventa sub ictu
 254 deficit et verso lumine lumen obit.
 255 Infelix nutrix, audito funere alumnae
 256 exanimum ad corpus vix animata volat.
 257 Ipsa inter famulas incumbens prima fideles
 258 haec tandem potuit clausa dolore loqui :
 259 "Sic placidae matri promisi pessima nutrix
 260 te longe incolomem, Gelesuintha, fore ?
 261 Sic extincta meum mea cernunt lumina lumen,
 262 pallida sic facies qua rubor ante fuit.
 263 Dic aliquid miserans, miserae mihi redde loquellas.
 264 Quid referam ad matrem, si remeare licet ?
 265 Hoc sum per tantos peregrina secuta labores.
 266 Pro vice tale mihi munus, alumna, refers.
 267 Optabas pariter nobis vitam atque sepulcra :
 268 quae tecum vixi me sine passa mori.
 269 Ordo utinam vitae juvenique senique fuisset :
 270 te stante incolomi, me prius ire neci. "
 271 Vix paucos profert, vocem rapit alter ab ore
 272 nec valet una loqui quod videt aula gemi.
 273 Interea vehitur tristi lacrimata feretro
 274 solvit et exequias obsequialis amor.
 275 Ducitur, ornatur, deponitur, undique fletur
 276 conditur et tumulo sic peregrina suo.
 277 Nascitur hic subito rerum mirabile signum.
 278 Dum pendens lichnus lucet ad obsequium,
 279 decidit in lapidem nec vergit et integer arsit
 280 nec vitrum saxis nec perit ignis aquis.
 281 Fama recens resides germanae perculit aures
 282 affectuque pio sic movet ora soror :
 283 "Hanc, rogo, germanae mandasti, cara, salutem ?
 284 Scripta tuis digitis hoc mihi charta refert ?
 285 Sollicitis oculis expectabam unde venires :
 286 quale precata fui non agis illud iter.
 287 Optavi Gallis te ut huc Hispania ferret :
 288 non te hic cara soror, non ibi mater habet.
 289 Extremo obsequio non huc Brunichildis adivi ;
 290 si tibi nil vivae, mortis honora darem.
 291 Cur peregrina tuos non clausi dulcis ocellos
 292 auribus aut avidis ultima verba bibi ?
 293 Officium tristi nihil inpendi ipsa sorori,
 294 membra, manus, faciem nec manus ista tegit.
 295 Non licuit fundi lacrimas nec ab ore resorbi
 296 frigida nec tepido viscera fonte lavo.
 297 Nutritas pariter, junctas regionibus isdem,
 298 cur ad mortis iter dividis, alte dolor ? "
 299 Sicque relicta soror casu laceratur ademptae.
 300 Haec vocat, illa jacet nec repetita redit.
 301 Germanae validos audit Germania fletus
 302 quaque recurrit iter, questibus astra ferit,
 303 nomine saepe vocans te, Gelesuintha, sororem :
 304 hoc fontes, silvae, flumina, rura sonant.
 305 Gelesuintha, taces ? Responde ut muta sorori
 306 respondent, lapides, mons, nemus, unda, polus.
 307 Anxia sollicitans ipsas interrogat auras,
 308 sed de germanae cuncta salute silent.
 309 Nuntius hic subito fluvios transcendit et Alpes

310 maerorisque gravis tam cito pinna volat.
 311 Optandum fuerat, postquam loca cuncta replisset,
 312 tardius ad matrem hic dolor iret iter.
 313 Sed quod fama refert qui plus amat et prius audit
 314 ac dubium credit, dante timore fidem.
 315 Mox igitur matris jaculans dolor adtigit aures,
 316 ac si succiso poplite lapsa ruit.
 317 Audita de morte una mors altera pulsat
 318 et paene incolomi corpore funus erat.
 319 Pallida suffuso tum Goisuintha rubore
 320 molliter haec, anima vix redeunte, refert :
 321 " Siccine me tenero natae solabar amore,
 322 ut mea nunc gravius viscera vulnus aret ?
 323 Si nostrum jam lumen obit, si nata recessit,
 324 quid me ad has lacrimas, invida vita, tenes ?
 325 Errasti, mors dura nimis, cum tollere matrem
 326 funere debueris, sors tibi nata fuit.
 327 O utinam mersis crevissent flumina ripis,
 328 naufraga ceu fuis terra natasset aquis,
 329 alta Pyrenei tetigissent sidera montes,
 330 aut vitrea glacie se solidasset iter,
 331 quando relaxavi te, Gelesuintha, sub Arcto,
 332 ut nec reda rotis, non equus isset aquis !
 333 Hoc ergo illud erat quod mens praesaga timebat,
 334 non posse amplexu vellere, nata, meo.
 335 Paruimus votis alienis, jussa sequentes ;
 336 promissa existi non reditura mihi.
 337 Hoc erat altus amor, placida dulcedine natae
 338 quod teneris labiis ubera pressa dedi.
 339 Cur hinc lactis opem produxit vena mamillae ?
 340 Cur alimenta dedi nec habitura fui ?
 341 Saepe soporantem furtiva per oscula suxi,
 342 ut leve dormires viscera subposui.
 343 Optasse extremum de te quid profuit illud,
 344 luderet ut gremiis parvula neptis avis ?
 345 Nec felix vota aut infelix funera vidi :
 346 perdidit heu nimius hoc labor, illud amor ".
 347 Partitis lacrimis soror hinc, inde anxia mater
 348 vocibus haec Rhenum, pulsat et illa Tagum ;
 349 condolet hinc Batavus, gemit illinc Beticus axis,
 350 perstrepat hoc Vachalus, illud Hiberus aquis.
 351 Tot lacrimas stillasse sat est, sed ab imbre vaporis
 352 non relevando sitim gutta ministrat opem.
 353 Affectus si forte potest mitescere, dicam :
 354 Non ea flenda jacet quae loca laeta tenet.
 355 Dicite si quid ei nocuit quam tempore lapso
 356 mortis iter rapuit, vita perennis alit.
 357 Quae modo cum Stephano caelesti consule pergat,
 358 fulget apostolico principe clara Petro.
 359 Matre simul Domini plaudens radiante Maria
 360 rege sub aeterno militat illa Deo.
 361 Conciliata placet, pretioso funere fulget,
 362 deposita veteri, nunc stola pulchra tegit.
 363 Atque utinam nobis illos accedere vultus
 364 cedat amore Deus per mare, per gladios !
 365 Vitae signa tenet, vitreo cum vase cadente
 366 non aqua restinxit nec petra fregit humi.
 367 Tu quoque, mater, habes consultum voce Tonantis

368 de nata et genero, nepte, nepote, viro.
 369 Credite, Christicolae, vivam, quia credidit illa ;
 370 non hanc flere decet quam paradisus habet.

DE ORTO VLTROGOTHONIS

F6_6 v.1 Hic ver purpureum viridantia gramina gignit
 2 et paradisiacas spargit odore rosas.
 3 Hic tener aestivas defendit pampinus umbras
 4 praebet et uviferis frondea tecta comis
 5 pinxeruntque locum variato germine flores
 6 pomaque vestivit candor et inde rubor.
 7 Mitior hic aestas, ubi molli blanda susurro
 8 aura levis semper pendula mala quatit.
 9 Haec magno inseruit rex Childebertus amore :
 10 carius ista placent quae manus illa dedit.
 11 De cultore trahit mellitum planta saporem
 12 forsitan et hic tacitos miscuit ille favos.
 13 Regis honore novis duplicata est gratia pomis,
 14 nare suavis odor, dulcis in ore sapor.
 15 Qualiter ille hominum potuit prodesse saluti
 16 cuius et in pomis tactus odore placet ?
 17 Felix perpetua generetur ab arbore fructus
 18 ut de rege pio sit memor omnis homo.
 19 Hinc iter ejus erat, cum limina sancta petebat
 20 quae modo pro meritis incolit ille magis.
 21 Antea nam vicibus loca sacra terebat amatus,
 22 nunc tamen assidue templa beata tenet.
 23 Possideas felix haec, Ultrogotho, per aevum
 24 cum geminis natis tertia, mater ovans.

AD CANTUMBLANDUM VILLAM. DE POMIS DICTUM

F6_7 v.1 Venimus ad Cantum felici tramite blandum,
 2 Aregium laetor quo reperisse patrem.
 3 Quod petit instigans avido gula nostra baratro,
 4 excipiunt oculos aurea poma meos.
 5 Undique concurrunt variato mala colore,
 6 credas ut pictas me meruisse dapes.
 7 Vix digitis tetigi, fauce hausit, dente rotavi
 8 migravitque alvo praeda citata loco.
 9 Nam sapor ante placet quam traxit naris odorem
 10 sic vincente gula naris honore caret.

DE COCO QUI IPSI NAVEM TULIT

F6_8 v.1 Cur mihi tam validas innectis, cura, querellas ?
 2 Heu mea vel tandem desere corda, dolor.
 3 Quid revocas casus ? Jam me mea sarcina lassat.
 4 Quod jactare puto, cur duplicatur onus ?
 5 Tristius erro nimis, patriis vagus exul ab oris,
 6 quam sit Apollonius naufragus hospes aquis.
 7 Venimus ut Mettis, cocus illic regius instans
 8 absenti nautas abstulit atque ratem.
 9 De flammis ardente manu qui diripit escas,
 10 ille rati nescit parcere tutus aquis.
 11 Corde niger, fumo pastus, fuligine tinctus
 12 et cuius facies caccabus alter adest,
 13 cui sua sordentem pinxerunt arma colorem,
 14 frixuriae, cocumae, scafa, patella, tripes,
 15 indignus versu, potius carbone notetur

16 et piceum referat turpis imago virum.
 17 Res indigna nimis, gravis est injuria facti :
 18 plus juscella coci quam mea jura valent,
 19 nec tantum codex quantum se caccabus effert,
 20 ut mea nec mihi sit participata rates.
 21 Sed tamen auxilium solito porrexit amore
 22 qui Domini pascens Villicus auget oves.
 23 Praestitit et gracili pavidus cum lintre cucurrit,
 24 imbre, euro, fluvio sed madefactus ego.
 25 Jactavi reliquos, sequerentur ut inde pedestres.
 26 Nam si nemo foris, nemo nec intus erat.
 27 Mergere mox habuit cunctos, rapiente periclo ;
 28 naufragii testis nemo superstes erat.
 29 Sic vicinus eram, postquam jactavimus omnes
 30 ictibus ut crebris lamberet unda pedes.
 31 " Obsequium, dixi, remove, modo nolo lavari ",
 32 sed tamen instabat lympa rigare pedes.
 33 Nauriacum veniens, refero mea tristia regi.
 34 Risit et ore pio jussit adesse ratem.
 35 Quaerunt, nec poterant aliquam reperire carinam,
 36 donec cuncta cohors regia fluxit aquis.
 37 Restitit hic solus praestans solacia Gogo ;
 38 quod tribuit cunctis non negat ille suis.
 39 Dulcius alloquitur comitem qui Pappulus extat
 40 ut quamcumque mihi redderet ipse ratem.
 41 Omnia perlustrans vidit sub litore lintrem ;
 42 nec tamen hic poterat sarcina nostra capi.
 43 Nauriacum interea fecit me stare parumper
 44 ordinat et sumptus quos locus ipse dedit.
 45 Quamvis parva ferat, satis est mihi sola voluntas,
 46 est nec parva quidem quam dat amator opem.
 47 Addidit et comis mihi pocula gratus amicus,
 48 in quantum poterat rure parare merum.
 49 Sic mihi jucundam direxti, Pappule, proram.
 50 Felix vive, vale, dulcis amice comes.

AD DINAMIUM DE MASSILIA

F6_9 v.1 Expecto te, noster amor, venerande Dinami,
 2 quamvis absentem quem mea cura videt.
 3 Quae loca te teneant venientia flabra requiro.
 4 Si fugias oculos, non fugis hinc animos.
 5 Massiliae tibi regna placent, Germania nobis :
 6 vulsus ab aspectu, pectore junctus ades.
 7 Quo sine te tua pars hucusque oblita remansit
 8 nec revocas animo membra relicta tuo.
 9 Si sopor obrepsit, tibi me vel somnia narrent :
 10 nam solet unianimes ipsa videre quies.
 11 Si vigilas, fateor, veniam tibi culpa negabit ;
 12 nil unde excuses desidiosus habes.
 13 Altera signiferi revolutis mensibus anni,
 14 solis anhelantes orbita lassat equos,
 15 cum mea discedens rapuisti lumina tecum
 16 et modo nil sine te cerno patente die.
 17 Vel mihi verba dares de fonte refusa loquaci,
 18 ut faceret tecum pagina missa loqui.
 19 Sed tamen ut tandem venias huc carius hortor
 20 et revocas oculis lumen, amice, meis.

ITEM AD DINAMIUM

F6_10 v.1 Tempora praecipiti vos invidistis amori,
 2 officium voti quae vetuistis agi
 3 per lyricos modulos et fila loquacia plectris
 4 qua cytharis Erato dulce relidit ebur.
 5 Ecce vaporiferum sitiens canis exerit astrum
 6 et per hiulcatos fervor anhelat agros.
 7 Hinc metuens saniem, ne quo jacularer ab igne,
 8 sanguine laxato brachia nexa gero.
 9 Labitur unde cruor, nodo manus inde tenetur
 10 et dextram innocuam vena soluta ligat,
 11 ut sine temperie validi sitis urat amoris :
 12 causa meis votis obstitit ista gravis.
 13 Nescio quam prosit ratio perfuncta medellae ;
 14 me tamen inde nocet quod reticere facit.
 15 Scribere si digitis sinerer, satis illa fuisset :
 16 nunc mihi prima tui cura, secunda mei.
 17 Ex studio studiis retrahor : silet unda Camenae.
 18 Carne fluit sanies, ne riget ore latex.
 19 Musicus ignis abest, algent in fonte sorores.
 20 Nam sanguis latices hinc gelat unde rigat.
 21 Si qua calens animo recitanda poemata pangam,
 22 scis ipse hoc studio quam gravet arte labor.
 23 Nam cruor ablatus magis otia lenta requirit,
 24 quo neque frigus hiat nec vapor ustus arat
 25 secretumque petit neu flabilis aura flagellet,
 26 quo recreans animum stat viror, halat odor.
 27 Ast ego posthabeo affectu mea seria vestro ;
 28 cura tui faciem, nam mea terga tenet.
 29 Post sudorem habui modo nam dare membra quieti :
 30 ordine postposito tempora rumpit amor.
 31 Duco parum propriam, tibi dum volo ferre salutem,
 32 sed mea prospicio, cum tua vota colo.
 33 Nunc cape parva, cate et pollens duilance Dinami,
 34 clare decore tuo, care favore meo.
 35 Partibus Italiae advecto mihi Rhenus et Hister
 36 quem cecinere prius quam daret ipse locus,
 37 insignem specie, celsum lare, lege sagacem,
 38 omnibus aequalem spe, sale, pace, fide.
 39 Incidit unde mihi, fateor, te sorte videndi
 40 Arctoi gelida sub regione calor,
 41 plusque libens vultus efferveo totus in illos
 42 ad patriae reditus quam peregrina cohors,
 43 visibus atque tuis issem velocius ac si
 44 ad patris amplexus de Telamone satus.
 45 Vix quoque tam cupidus vario sinuamine sulcat
 46 rusticus arte solum, navita aplustre fretum.
 47 Ex illo, celebrande, cliens stat pars mea tecum
 48 et venis huc animae pars mediata meae,
 49 antea corde mihi notus quam lumine visus ;
 50 quem mente adstringo, si neque tango manu.
 51 Brachia qui necdum circum tua colla cateno
 52 quod digiti nequeunt, alligat illud amor.
 53 Longius inde absens ibi sed pertingo quod opto :
 54 quo pede non venio, pectore totus eo.
 55 Nos licet obstet Arar Rhodanusque, natamus amore
 56 nec vetat ire animum qui vetat ire gradum.

57 Legi etiam missos alieno nomine versus,
 58 quo quasi per speculum reddit imago virum.
 59 Fonte camenali quadrato spargeris orbi,
 60 ad loca quae nescis duceres oris aquis.
 61 Hinc quoque non aliquo nobis abolende recedis,
 62 quo fixus scriptis nosceris esse tuis.
 63 Interiora mei penetrans possessor agelli,
 64 felix perpetuae, dulcis amice vale.
 65 Spectans oris opem melioraque sideris optans,
 66 currat ut affatus, stet tibi longa salus.
 67 Sacris Theodoro primo lare, sede Sapaudo
 68 Felici egregio quem dedit orbis honor,
 69 Albino eximio, Heliae claroque Jovino
 70 pro Fortunato redde salutis opus.
 71 Haec tibi nostra chelys modulatur simplice cantu,
 72 sed tonat archetypo barbitus inde sopho.

LIBER SEPTIMVS

AD GOGONEM

F7_1 v.1 Orpheus orditas moveret dum pollice cordas
 2 verbaque percusso pectine fila darent,
 3 mox resonante lyra tetigit dulcedine silvas,
 4 ad citharae cantus traxit amore feras.
 5 Undique miserunt vacuata cubilia dammas,
 6 deposita rabie tigris et ipsa venit.
 7 Sollicitante melo nimio filomela volatu,
 8 pignora contemnens fessa cucurrit avis.
 9 Sed quamvis longo spatio lassaverat alas,
 10 ad votum veniens se recreavit avis.
 11 Sic stimulante tua captus dulcedine, Gogo,
 12 longa peregrinus regna viator adit.
 13 Undique festini veniant ut promptius omnes,
 14 sic tua lingua trahit sicut et ille lyra.
 15 Ipse fatigatus huc postquam venerit exul
 16 antea quo doluit te medicante caret.
 17 Eruis adflictis gemitus et gaudia plantas ;
 18 ne tamen arescant, oris ab imbre foves.
 19 Aedificas sermone favos nova mella ministrans
 20 dulcis et eloquii nectare vincis apes.
 21 Ubere fonte rigat labiorum gratia pollens
 22 cujus ab arcano vox epulanda fluit.
 23 Pervigili sensu dives prudentia regnat
 24 fomite condito cui salis unda natat,
 25 qui fulgore animi radios a pectore vibras
 26 et micat interior lux imitata diem.
 27 Sed vicibus mundum modo sol modo nubila complent,
 28 at tua semper habent corda serena diem.
 29 Visceribus promptis templum pietatis haberis
 30 muneribusque sacris es fabricata domus.
 31 Forma venusta tibi proprio splendore coruscat
 32 ut mentis habitum vultus et ipse probet.
 33 Omne genus laudum specie concludis in una
 34 nec plus est aliquid quam tua forma gerit.
 35 Principis arbitrio Sigiberthi magnus haberis :
 36 iudicium regis fallere nemo potest.

37 Elegit sapiens sapientem et amator amantem
 38 ac veluti flores docta sequestrat apes.
 39 Illius ex merito didicisti talis haberi
 40 et domini mores serve benigne refers.
 41 Nuper ab Hispanis per multa pericula terris
 42 egregio regi gaudia summa vehis.
 43 Diligis hunc tantum quantum meliora parasti :
 44 nemo armis potuit quod tua lingua dedit.
 45 Haec bona si taceam, te nostra silentia laudant
 46 nec voces spectes qui mea corda tenes.
 47 Vera favendo cano neque me fallacia damnat,
 48 teste loquor populo : crimine liber ero.
 49 Haec tibi longinquos laus ardua surgat in annos,
 50 haec te vita diu servet et illa colat.

ITEM AD EUNDEM CUM ROGARETUR AD CENAM

F7_2 v.1 Nectar, vina, cibus, vestis, doctrina, facultas,
 2 muneribus largis tu mihi, Gogo, sat es.
 3 Tu refluus Cicero, tu noster Apicius extas :
 4 hinc satias verbis, pascis et inde cibus.
 5 Sed modo da veniam : bubla turgente quiesco.
 6 Nam fit lis uteri, si caro mixta fremat.
 7 Hic ubi bos recubat, fugiet, puto, pullus et anser :
 8 cornibus et pinnis non furor aequus erit.
 9 Et modo jam somno languentia lumina claudio,
 10 nam dormire meum carmina laeta probant.

ITEM AD EUNDEM

F7_3 v.1 Quas mihi porrexit modo pagina missa querellas,
 2 immunem culpae me loquor esse tuae.
 3 Nam causam Remus tua plus praesentia laesit :
 4 quo vos peccastis crimine culpor ego.
 5 Non tamen ex tali titulo dulcedo peribit :
 6 fructus amicitiae corde colente manet.

ITEM AD EUNDEM

F7_4 v.1 Nubila quae rapido perflante Aquilone venitis,
 2 pendula sidereo quae movet axe rota,
 3 dicite qua vegitet carus mihi Gogo salute.
 4 Quid placidis rebus mente serenus agit ?
 5 Si prope fluctivagi remoratur litora Rheni
 6 ut salmonis adeps rete trahatur aquis,
 7 an super uviferi Musellae obambulat amnem,
 8 quo levis ardentem temperet aura diem,
 9 pampinus et fluvius medios ubi mitigat aestus :
 10 vitibus umbra rigens, fluctibus unda recens.
 11 Aut Mosa dulce sonans, quo grus, ganta anser olorque est,
 12 triplice merce ferax - alite, pisce, rate - ?
 13 An tenet herbosis qua frangitur Axona ripis
 14 cujus aluntur aquis pascua, prata, seges ?
 15 Esera, Sara, Cares, Scaldis, Sate, Somena, Sura ?
 16 Seu qui Mettis adit de sale nomen habens ?
 17 Aut aestiva magis nemorum saltusque pererrans
 18 cuspide, rete feras hinc ligat, inde necat ?
 19 Ardenna an Vosagus cervi, caprae, helicis, uri
 20 caede sagittifera silva fragore tonat ?
 21 Seu validus bufalus ferit inter cornua campum
 22 nec mortem differt ursus, onager, aper ?

23 An sua rura colens exusta novalia sulcat
 24 et rude cervici taurus aratra gemit ?
 25 Sive palatina residet modo laetus in aula,
 26 cui scola congregiens plaudit amore sequax ?
 27 An cum dulce Lupo pietatis jura retractant
 28 consilioque pari mitia mella creant
 29 quo pascatur inops, viduae solacia praestent,
 30 parvus tutorem sumat, egenus opem ?
 31 Quidquid agunt, pariter felicia vota secudent
 32 et valeant Christi regis amore frui.
 33 Vos precor, o venti, qui curritis atque reditis,
 34 pro Fortunato nuntia ferte suo.

DE BODEGISILO DUCE

F7_5 v.1 Pectore de sterili si flumina larga rigarem,
 2 non te sufficerem, dux Bodegisle, loqui.
 3 Invasit nostram subito tua gratia mentem,
 4 ut modo plus vester quam meus esse velim.
 5 Quo primum placidos merui cognoscere vultus,
 6 oris ab unguento membra refecta gero.
 7 Colloquio dulci satiasti pectus amantis :
 8 nam mihi devoto dant tua verba cibum.
 9 Distribuunt epulas alii quae corpora suppleant ;
 10 unde animum saties, das magis ipse dapes.
 11 Non sic inficiunt placidissima mella Falernum
 12 ceu tuus obdulcat pectora nostra sapor.
 13 Qualiter oblectas quos semper amare videris,
 14 horae qui spatio me facis esse tuum !
 15 Quae tibi sit virtus si possem, prodere vellem,
 16 sed parvo ingenio magna referre vetor.
 17 Exiguus titubo tantarum pondere laudum,
 18 sed melius gradior quem tua facta regunt.
 19 Massiliae ductor felicia vota dedisti
 20 rectoremque suum laude perenne refert.
 21 Hic tibi consimili merito Germania plaudit
 22 cujus ad laudem certat uterque locus.
 23 De bonitate tua lis est regionis utraeque :
 24 te petit illa sibi, haec retinere cupit.
 25 Justitiam pauper numquam te iudice perdit
 26 nec poterit pretio vertere vera potens.
 27 Non ligat immunem, non solvit poena nocentem,
 28 nil persona capit, si sua causa neget.
 29 Lumina cordis habes, animi radiante lucerna
 30 et tuus aeterna luce coruscat apex.
 31 Ingenio torrente loquax de fonte salubri
 32 divitiasque pias ore fluente rigas.
 33 Si videas aliquem defectum forte labore,
 34 Nilus ut Aegyptum, sic tua lingua fovet.
 35 Qui patrias leges intra tua pectora condens
 36 implicitae causae solvere fila potes.
 37 Assiduis epulis saturas, venerande, catervas
 38 et repletus abit qui tua tecta petit.
 39 Si venis in campos, ibi plebs pascenda recurrit
 40 consequiturque suas te comitando dapes.
 41 Vota feras cunctis per saecula longa superstes
 42 et maneat populi semper in ore potens.

DE PALATINA FILIA GALLI MAGNI EPISCOPI, UXORE BODEGISILI DUCIS

F7_6 v.1 Lucifer ut nitidos producit in aethera vultus
 2 clarior et laeto nuntiat ore diem,
 3 ornat eundo polum, terris quoque lampade micat
 4 atque inter stellas lumine regna tenet,
 5 sic, Palatina, tuo diffundens lumina vultu
 6 femineos vincis pulchrior ore choros ;
 7 aut tibi sic cedit muliebris turba decore
 8 ut solis radiis lumine luna minor.
 9 Clara serenatos permutat forma colores,
 10 lilia nunc reparans, nunc verecunda rosas.
 11 Credite, nam si quis vultus conspexerit illos,
 12 hic relegit flores quos dare verna solent.
 13 Pingere non possunt pretiosam verba figuram
 14 nec valet eloquium mira referre meum.
 15 Gratior incessu, sensu reverenda pudico,
 16 talis in ingenio qualis in ore nitor.
 17 Blandior alloquio, placidis suavissima verbis
 18 dispiciamque lyram, si tua lingua sonat.
 19 Pectore perspicuo sapientia provida fulget,
 20 ornatur sexus te radiante tuus.
 21 Coniuge pervigili nituit magis aula mariti
 22 floret et egregia dispositrice domus.
 23 Jure quidem magna est quae est Galli filia Magni,
 24 sed merito natae crevit honore pater.
 25 Non aliter poterat nisi munere clarior esse
 26 quae meruit celso digna placere viro.
 27 Eligit e multis quam carus amaret amantem
 28 et iudex patriae iudicat ipse sibi.
 29 Ambo pares juncti longos maneatis in annos
 30 et quaecumque volunt gaudia vestra ferant.

DE LUPO DUCE

F7_7 v.1 Antiqui proceres et nomina celsa priorum
 2 cedant cuncta Lupi munere victa ducis.
 3 Scipio quod sapiens, Cato quod maturus agebat,
 4 Pompeius felix, omnia solus habes.
 5 Illis consulibus romana potentia fulsit,
 6 te duce sed nobis hic modo Roma redit.
 7 Te tribuente aditum cunctis fiducia surgit,
 8 libertatis opem libera lingua dedit.
 9 Maestitiam si quis confuso in pectore gessit,
 10 postquam te vidit spe meliore manet.
 11 Fundatus gravitate animi, quoque corde profundus
 12 tranquillii pelagi fundis ab ore salem.
 13 Sed facunda magis plebi tua munera prosunt :
 14 tu condis sensus, nam salis unda cibos.
 15 Consilii radix, fecundi vena saporis,
 16 ingenio vivax, ore rotante loquax,
 17 qui geminis rebus fulges in utroque paratus,
 18 quicquid corde capis prodere lingua potest.
 19 Pectore sub cuius firmantur pondera regis
 20 pollet et auxilio publica cura tuo.
 21 Subdis amore novo tua membra laboribus amplis :
 22 pro requie regis dulce putatur onus.
 23 O felix animus patriae qui consulit actus
 24 et vivit cunctis mens generosa viris !
 25 Legati adveniunt, te respondente ligantur

26 et jaculo verbi mox jacuere tui.
27 Lancea sermo fuit, quoque vox armata loquentis,
28 auspiciu palmae te Sigiberthus habet.
29 Responsum gentis sensu profertur ab illo
30 et votum populi vox valet una loqui.
31 Cujus ab ingenio sortita est causa triumphum,
32 adsertoris ope justior illa fuit.
33 Nullus enim poterit proprias ita pandere causas,
34 ceu tua pro cunctis inclita lingua tonat.
35 Nilus ut Aegyptum recreat, dum plenus inundat,
36 sic tu colloqui flumine cuncta foves.
37 Justitia florente favent te iudice leges
38 causarumque aequo pondere libra manes.
39 Ad te confugiunt, te cingula celsa requirunt
40 nec petis ut habeas, te petit omnis honor.
41 In cuius gremio nutritur adepta potestas,
42 quo rectore datus crescere novit apex.
43 Quam merito retinet concessos semper honores
44 per quem digna magis culmina culmen habent !
45 Antiquos animos romanae stirpis adeptus
46 bella moves armis, jura quiete regis.
47 Fultus utrisque bonis, hinc armis, legibus illinc,
48 quam bene fit primus cui favet omne decus !
49 Quae tibi sit virtus cum prosperitate superna
50 Saxonis et Dani gens cito victa probat.
51 Bordaa quo fluviu sinuoso gurgite currit,
52 hic adversa acies te duce caesa ruit.
53 Dimidium vestris jussis tunc paruit agmen :
54 quam merito vincit qui tua jussa facit !
55 Ferratae tunicae sudasti pondere victor
56 et sub pulvere nube coruscus eras
57 tamque diu pugnax acie fugiente secutus,
58 Laugona dum vitreis terminus esset aquis.
59 Qui fugiebat iners, amnis dedit ille sepulcrum :
60 pro duce felici flumina bella gerunt.
61 Inter concives meruit te Gallia lumen
62 lampade qui cordis splendor ubique micat.
63 Sunt quos forma potens, sunt quos sapientia praefert :
64 singula sunt aliis, sed bona plura tibi.
65 Occurrens dominis veneranda palatia complens
66 et tecum ingrediens multiplicatur honor.
67 Te veniente novo domus emicat alma sereno
68 et reparant genium regia tecta suum.
69 Nempe oculos recipit cum te videt aula redire
70 quem commune ducum lumina lumen habent ;
71 principis auxilium, patriae decus, arma parentum,
72 consultum reliquis, omnibus unus amor.
73 Admiranda etiam quid de dulcedine dicam
74 nectare qui plenus construis ore favos ?
75 Cara serenatum comitatur gratia vultum
76 fulget et interius perpetuata dies.
77 Qui satias escis, reficis sermone benignus,
78 sepositis epulis sunt tua verba dapes.
79 Quis tibi digna loqui valeat, quem voce potente
80 rex pius ornatum praedicat esse suum .
81 Sit tibi summus apex illo regnante per aevum
82 vitaeque sit praesens atque futura colat.

AD EUNDEM

F7_8 v.1 Aestifer ignitas cum Julius urit harenas
 2 siccaque pulvereo margine terra sitit,
 3 languidior placidas vix pampinus explicat umbras
 4 mollior et glaucas contrahit herba comas.
 5 Summissis foliis Phoebi regnante vapore
 6 vix sua defendit frigida tecta nemus.
 7 Pabula fastidens fugit aestu bucula saltus,
 8 ipse nec adflictis pascitur ervus equis.
 9 Longius expositam linguam canis ore flagellat,
 10 ilia lassa trahens tristis anhelat ovis.
 11 Forte viator iter gradiens ferventibus horis
 12 uritur accensis sole premente comis.
 13 Qui arescente solo, modico recreetur ut haustu,
 14 saepius inriguas anxius optat aquas,
 15 arboris aut tremulae viridante cacumine fuso
 16 frondibus oppositis temperet umbra sitim.
 17 Prosperitate nova si jam prope lucus opacet
 18 et vitrei fontis sibilet unda recens,
 19 huc properans placidis homo laetus sternitur arvis,
 20 volvit in herbosos et sua membra toros.
 21 Vota secuta tenens gemino refovetur amoeno :
 22 hinc levat umbra diem, hinc fugat unda sitim.
 23 Carmina siqua tenet, cantu modulante recurrit
 24 provocat et placidos blandior aura sonos.
 25 Si sibi forte fuit bene notus Homerus Athenis
 26 aut Maro Trajano lectus in urbe foro ;
 27 vel si Davitico didicit sacra dogmata plectro,
 28 psallit honorificum fauce rotante melum.
 29 Tangitur aut digito lyra, tibia, fistula, canna :
 30 quisque suis Musis carmine mulcet aves.
 31 Sic ego curarum valido defessus ab aestu
 32 noscens te salvum fonte refectus agor.
 33 O nomen mihi dulce Lupi replicabile semper
 34 quodque mei scriptum pagina cordis habet,
 35 quem semel inclusum tabulis dulcedinis intus
 36 non abolenda virum pectoris arca tenet ;
 37 thesauros pietatis habens, pretiosa voluntas
 38 producens animo pura talenta suo !
 39 Divitias quas mundus habet mens aurea vincit
 40 gemmarumque decus corde micante refert.
 41 Sensus aromaticus suaves diffundit odores,
 42 hoc tribuens animae quod bene tura solent.
 43 Melle saporatum refluens a pectore verbum
 44 et sale conditum reddis ab ore sophum.
 45 Post tenebras noctis stellarum lumina subdens
 46 Lucifer ut radiis, sic mihi mente nites.
 47 Ut recreat mundum veniens lux solis ab ortu,
 48 inlustrant animum, sic tua verba meum.
 49 Cum peregrina meos tenuit Germania visus,
 50 tu pater et patriae consuliturus eras.
 51 Quando merebar ovans placidos intendere vultus
 52 mox geminata mihi fulsit in orbe dies.
 53 Conserui quotiens vestro sermone loquellas
 54 credidi in ambrosiis me recubare rosis.
 55 Omnibus una manens, sed plus tua gratia nobis
 56 vinxit in affectu me properante suo.
 57 Nunc quoque pro magnis quis digna rependat honoris ?

58 Materia vincor et quia lingua minor.
 59 Sic post ascensum culmen supereminet altum :
 60 hinc meus urguet amor, hinc tuus obstat honor.
 61 Sed pro me reliqui laudes tibi reddere certent
 62 et qua quisque valet te prece, voce sonet,
 63 Romanusque lyra, plaudat tibi Barbarus harpa,
 64 Graecus Achilliaca, crotta Britanna canat.
 65 Illi te fortem referant, hi jure potentem,
 66 ille armis agilem praedicet, iste libris.
 67 Et quia rite regis quod pax et bella requirunt,
 68 judicis ille decus concinat, iste ducis.
 69 Nos tibi versiculos, dent barbara carmina leudos :
 70 sic variante tropo laus sonet una viro.
 71 Hi celebrem memorent, illi te lege sagacem,
 72 ast ego te dulcem semper habebo, Lupe.

ITEM AD LUPUM DUCEM

F7_9 v.1 Officiis intente piis, memorator amantis,
 2 prompte per affectum consuliture tuum,
 3 carius absentis nimium miseratus amici,
 4 quando latente loco signa requirit amor.
 5 Unde meis meritis datur hoc ut protinus esset
 6 spes Fortunati cura benigna Lupi ?
 7 Exul ab Italia nono, puto, volvor in anno
 8 litoris Oceani contiguante salo.
 9 Tempora tot fugiunt et adhuc per scripta parentum
 10 nullus ab exclusis me recreavit apex.
 11 Quod pater ac genetrix, frater, soror, ordo nepotum,
 12 quod poterat regio, solvis amore pio.
 13 Pagina blanda tuo sub nomine missa benigno
 14 nectarei fontis me renovavit aquis.
 15 Nec solum a vobis me dulcis epistula fovit,
 16 missus adhuc in rem portitor inde venit.
 17 Munera quis poterit, rogo, tot memor ore referre ?
 18 Affectum dulcem pandere lingua nequit.
 19 Sed tibi restituat rex cuncta supernus ab alto
 20 quae minimis fiunt qui docet esse suum.

AD MAGNULFUM FRATREM LUPI

F7_10 v.1 Quam cito fama volat pernicipibus excita pinnis
 2 et loca cuncta suis actibus aucta replet !
 3 Nam tibi cum Rhenus mihi sit Liger ecce propinquus,
 4 hic, Magnulfe decens, magnus honore places.
 5 Sic tuba praeconis Sigimundi missa cucurrit
 6 ut tua diffuso sint bona nota loco.
 7 Quod tamen in brevibus vix signat epistula verbis :
 8 non quia cuncta canit nec reticere cupit.
 9 Jure dico : in primis pollens torrente relatu,
 10 sic regis ut revoces facta vetusta novus,
 11 cujus in officiis, aequi cultoris aratro
 12 semine justitiae plebs sua vota metit.
 13 Nemo caret propriis, alienis nemo recumbit :
 14 sic facis ut populum non vacet esse reum.
 15 Sollicitudo tua reliquis fert dona salutis
 16 et labor unius fit populosa quies.
 17 Aequalis concors ut ab omnibus, alme, voceris,
 18 legibus hinc judex, hinc bonitate parens.
 19 Da paucis veniam, quoniam mihi portitor instat

20 nam de fratre Lupi res monet ampla loqui.
 21 Sic tribuat dominus, meritis reparationis ut illum
 22 quem pariter tecum cordis amore colo.

AD IOVINUM ILLUSTRUM AC PATRICIUM ET RECTOREM PROVINCIARUM

F7_11 v.1 Prosaico quotiens direxi scripta relatu !
 2 Nullaque de vestro pocula fonte bibo.
 3 Quem prius inrigua recrearas ditior unda
 4 nec modo Castaliis redditur haustus aquis.
 5 Si me cura minor vestri tenuisset amoris,
 6 jam fuerat licitum stringere colla manu.
 7 Nunc magis inde minus capio, quia diligo majus
 8 et cum plus cupiam, vota negata gemam.
 9 Qui sibi transfudit mea pectora pectore tuto,
 10 cur, rogo, non pariter lumina lumen habent ?
 11 Vel quod, amice, licet scriptis fero, care, salutem
 12 sed mihi qua relever pagina reddat opem.

ITEM EIUSDEM AD EUNDEM

F7_12 v.1 Tempora lapsa volant, fugitivis fallimur horis
 2 ducit et in senium lubrica vita viros.
 3 Fine trahit celeri sine fune volubilis axis
 4 nec retinet rapidas ad sua frena rotas,
 5 cuncta movens secum momenta et pondera rerum
 6 donec meta avidos sistere cogat equos.
 7 Sic quoque dissimiles ad finem tendimus omnes,
 8 nemo pedem retrahit quo sibi limes erit.
 9 Imperiale caput, regnum trahit, aequae senatum
 10 nec spectante die cum venit hora rapit.
 11 Quid sunt arma viris ? Cadit Hector et ultor Achilles
 12 Ajax in clipeo murus Achaeus obit.
 13 Quid satis est cupido gremio quod condit avaro ?
 14 Deliciis refluis Attalus auctus abest.
 15 Quis non versutus recubet dum fine supremo ?
 16 De Palamede potens ars in Ulixae perit.
 17 Forma venusta fluit, cecidit pulcherrimus Astur,
 18 occubat Hyppolitus nec superextat Adon.
 19 Non agiles fugiunt ; quo terminus instat eundem.
 20 Nam cum fratre celer sorte Quirinus abit.
 21 Quid, rogo, cantus agit ? Modulis blanditus acutis
 22 Orpheus et citharae vox animata jacet.
 23 Docta recessuris quid prodest lingua sophistis,
 24 qui valere loqui curva rotunda poli ?
 25 Archita, Phitagoras, Aratus, Cato, Plato, Crysippus,
 26 turba Cleantharum stulta favilla cubat.
 27 Quidve poema potest ? Maro, Lysa, Menander, Homerus
 28 quorum nuda tapho membra sepulchra tegunt ?
 29 Cum venit extremum neque Musis carmina prosunt
 30 nec juvat eloquio detinuisse melos.
 31 Sic dum puncta cadunt, fugiunt praesentia rerum
 32 et vitae tabulam tessera rapta levat.
 33 Est tamen una salus, pia, maxima, dulcis et ampla :
 34 perpetuo trino posse placere Deo.
 35 Hoc valet atque viget, manet et neque fine peribit,
 36 hinc quoque post tumulum nascitur almus honor.
 37 Quod superest habitu meritorum flore beato,
 38 suavis justorum flagrat odor tumulo,
 39 gratius aura fluens quam spiret aroma Sabaeum

40 vincens quae pinguis balsama silva reflat.
 41 Cinnama calta crocus violae rosa lilia cedunt,
 42 ut similis nullus nare bibatur odor.
 43 Quid quod morte magis virtus generatur in illis
 44 dumque sepulcra tenent languida membra fovent ?
 45 Multorum dubiam solidant pia funera vitam
 46 et redit ex tumulo vivificatus homo.
 47 Nobilis urna tegit pretiosa talenta Tonantis
 48 ac terris recubat quod super astra volat.
 49 Qui sub amore Dei sacro moderamine vivens
 50 fit peregrinus humi, civis eundo poli.
 51 Denique post illos qui fundamenta coruscant
 52 postque Petri ac Pauli lumina prima fide
 53 quis numerus radiat sanctorum sparsus in orbe,
 54 quanta columnarum gratia fusa viget !
 55 Per loca, per populos mundo sua sidera praesunt,
 56 quidquid ab Oceanis circulus ambit aquis.
 57 Arctos meridies oriens occasus honorat
 58 lumina muneribus clarificata suis.
 59 De reliquo nihil est quodcumque videtur in orbe,
 60 nam tumor hic totus fumus et umbra sumus.
 61 Cur igitur metuens trahitur data vita susurro
 62 nec Fortunato pauca, Jovine, refers ?
 63 Tempora lapsa vides neque longa silentia rumpis,
 64 me quoque ne recrees ad mea damna taces.
 65 Non ita rebar ovans, postquam Germania nostros
 66 contulerat visus, ut resileret amor.
 67 Credideram potius quantum se tenderet aetas
 68 ut vestri affectus se duplicaret opus.
 69 Heu magis, ut video, vota in contraria currunt ;
 70 tempora longantur, sed breviatur amor.
 71 An quantum ex oculo, tantum tibi corde recedo
 72 et tam longe animo quam sumus ambo loco ?
 73 Non ego sic refero, quoniam tibi pectore nector ;
 74 praedicat hoc aliter mens ubi dulce fovet.
 75 Nam cui cara fides animum sociavit amici
 76 quod minus est oculis flagrat amore magis
 77 et licet absentem paries locus aula retentet
 78 corde suo illic est est ubi forma placens,
 79 Prospicit affectu quem vultu non videt ipso
 80 et vox longinqua de regione sonat.
 81 Quid gerit aut ubi sit, tacito dare verba videtur ;
 82 intra se loquitur pectore clausus amor.
 83 Si volat aura levis, putat inde venire salutes ;
 84 hoc fragor aure refert quod homo mente gerit.
 85 Hinc tuus ergo cliens ego, care colende, requiro,
 86 absentem faciunt quem loca, non animus,
 87 qui semper nostro memorialis haberis in ore :
 88 scribimus et haec dum, non sine te loquimur.
 89 Affectu, studio, voto tua brachia cingo
 90 atque per amplexum pectora, colla ligo.
 91 Ingredieris mecum pariterque moveris amator
 92 et quasi blanda loquens oscula libo labris.
 93 Ante oculos habeo, sed cara refugit imago ;
 94 hic quoque quem habeo non retinere queo.
 95 Alternis vicibus modo vadis et inde recurris :
 96 vix fugis ex oculis, ecce figura redis
 97 et cum terga dabis, facies mihi cernitur insons :

98 si pede conversus, fronte regressus ades.
 99 Saepe etiam videor dare te pia dicta relatu :
 100 illic forte taces, hic mihi verba refers.
 101 Hoc de te minus est, quia prendi non potes absens ;
 102 nam velut illic es totus et hic meus es.
 103 Qualiter ambo simul paucis habitavimus horis
 104 non fugit ex oculis, dum manet ista dies.
 105 Misimus o quotiens timidis epigrammata chartis
 106 et tua, ne recreer, pagina muta silet.
 107 Quis, rogo, reddat eas taciti quas perdimus horas ?
 108 Tempora non revocat lux levis atque fugax.
 109 Dic homo note meus : quid agis ? Quid, amice, recurris ?
 110 Si tua rura colis, cur mea vota neges ?
 111 Scribe vacans animo, refer alta poemata versu
 112 et quasi ruris agrum me cole voce, melo.
 113 Per thoraca meum ducas, precor, oris aratrum,
 114 ut linguae sulcus sint sata nostra tuus,
 115 pectoris unde seges gravidis animetur aristis
 116 pullulet et nostrum farra novale ferax.
 117 Nam mihi si loqueris, bone vir, pietatis opimae
 118 exsuperas labiis dulcia mella favis
 119 plusque liquore placet quem fert oleagina suco
 120 suavius et recreat quam quod aroma reflat.
 121 Cum Aspasio pariter caris patre, fratre Leone
 122 longa stante die, dulcis amice, vale.

AD FELICEM SOCIUM

F7_13 v.1 Ardua Pierio cui constant culmina fastu ;
 2 vix humili valeo tangere claustra manu.
 3 Sed quoniam patriae fuit aula sodalibus una,
 4 adfectu fidens pulso, benigne, fores.

DE MUMMOLENO

F7_14 v.1 Dum mihi fessus iter gradior prope noctis in umbra,
 2 solis in occasu jam fugiente die,
 3 cum super undarum viridantes gramine ripas
 4 pascua conspexi, pastus et ipse fui.
 5 Huc oculis captus voto ducente trahebar
 6 deflectensque viam prosperiora peto.
 7 Mummolenus enim, qui celsa palatia regis
 8 altis consiliis crescere rite facit,
 9 inter concives merito qui clarior extat
 10 quemque super proceres unica palma levat,
 11 nobilitate potens, animo bonus, ore serenus,
 12 ingenio sollers et probitate sagax,
 13 cui genus a proavis radianti luce coruscat
 14 - moribus ipse tamen vicit honore patres -
 15 huc ergo adveniens epulis expletus opimis :
 16 quem vidisse mihi constitit esse cibum.
 17 Fercula magna quidem dapibus cumulata benignis
 18 ac si colle tumens discus onustus erat :
 19 undique montis opus, medium quasi vallis habebat,
 20 quò meliore via piscis agebat iter.
 21 Ille natans, oleum pro undis, pro caespate discum
 22 incoluit, cui pro gurgite mensa fuit.
 23 Attamen ante aliud data sunt mihi mitia poma
 24 persica quae vulgi nomine dicta sonant.
 25 Lassavit dando, - sed non ego lassor edendo -

26 vocibus hinc cogens, hinc tribuendo dapes.
 27 Mox quasi parturiens subito me ventre tetendi
 28 admirans uterum sic tumuisse meum.
 29 Intus enim tonitrus vario rumore fremebat :
 30 viscera conturbans Eurus et Auster erat.
 31 Non sic Aeoliis turbatur harena procellis
 32 nec vaga per pelagus puppis adacta tremit
 33 nec sic inflantur ventorum turbine folles
 34 malleolis famulos quos faber ustus habet.
 35 Alter in alterius ructabat mole susurros
 36 et sine me mecum pugna superba fuit.
 37 Sit tibi longa salus celsa cum conjuge, rector,
 38 et de natorum prole voceris avus.
 39 Laudis honore potens felicia tempora cernas
 40 et valeas dulces concelebrare jocos.

DE BERULFO COMITE

F7_15 v.1 Delicias, Berulfe, tuas spectando libenter
 2 me fateor duplicem sustinuisse famem.
 3 Sic ego credebam quarta satiarer ut hora :
 4 me nec ad octavam mensa benigna vocat.
 5 Per vestras epulas didici jejunia gestans ;
 6 litaniam fuit prandia vestra magis.
 7 Det tibi vota Deus, per quem - modo laeta notamus -
 8 haec quoque dum scribo, plus satiatus agor.

DE CONDANE DOMESTICO

F7_16 v.1 Temporibus longis regali dives in aula
 2 enituit meritis gloria, Conda, tuis.
 3 Nam semel ut juvenem vigili te pectore vidit,
 4 elegit secum semper habere senem.
 5 Quis fuit ille animus vel quae moderatio sensus,
 6 cum fueris tantis regibus unus amor ?
 7 Mens generosa tibi pretioso lumine fulget,
 8 quae meritis propriis amplificavit avos.
 9 Floret posteritas per quam sua crescit origo
 10 et facit antiquos surgere laude patres.
 11 Nam si praefertur generis qui servat honorem,
 12 quanta magis laus est nobilitare genus ?
 13 Qui cupit ergo suum gestis adtollere nomen,
 14 ille tuum velox praemeditetur opus.
 15 A parvo incipiens existi semper in altum
 16 perque gradus omnes culmina celsa tenes.
 17 Theudericus ovans ornavit honore tribunalum ;
 18 surgendi auspiciam jam fuit inde tuum.
 19 Theudoberthus enim comitivae praemia cessit
 20 auxit et obsequiis cingula digna tuis.
 21 Vidit ut egregios animos meliora mereri
 22 mox voluit meritos amplificare gradus.
 23 Instituit cupiens ut deinde domesticus esses :
 24 crevistis subito, crevit et aula simul.
 25 Florebant pariter veneranda palatia tecum,
 26 plaudebant vigili dispositore domus.
 27 Theudebaldi etiam cum parva infantia vixit
 28 hujus in auxilium maxima cura fuit.
 29 Actibus eximiis sic publica jura fovebas
 30 ut juvenem regem redderes esse senem.
 31 Ipse gubernabas veluti si tutor adesses

32 commissumque tibi proficiebat opus.
 33 Chlotharii rursus magna dominatus in aula
 34 quique domum simili jussit amore regi.
 35 Mutati reges, vos non mutastis honores
 36 successorque tuus tu tibi dignus eras.
 37 Tantus amor populi, sollertia tanta regendi,
 38 ut hoc nemo volens subripuisset onus.
 39 Nunc etiam placidi Sigiberthi regis amore
 40 sunt data servitiis libera dona tuis.
 41 Jussit et egregios inter residere potentes,
 42 conuivam reddens proficiente gradu.
 43 Rex potior reliquis merito meliora paravit
 44 et quod majus habet hoc tua causa docet.
 45 Sic tuus ordo fuit semper majora mereri
 46 vitaeque quam senior tam tibi crevit honor.
 47 Quae fuerit virtus, tristis Saxonia cantat :
 48 laus est arma truci non timuisse seni
 49 pro patriae votis et magno regis amore
 50 quo duo natorum funera cara jacent.
 51 Nec graviter doleas cecidisse viriliter ambos :
 52 nam pro laude mori vivere semper erit.
 53 Laetitiam vultus hilari diffundit ab ore
 54 et sine nube animi gaudia fida gerit.
 55 Munificus cunctis largiris multa benignus
 56 et facis adstrictos per tua dona viros.
 57 Sit tibi longa salus placidis felicibus annis
 58 atque suum repararet proles opima patrem.

AD GUNDUARIUM

F7_17 v.1 Si prodi verbis affectus posset amantis,
 2 carmina plura tibi pagina nostra daret.
 3 Sed quod ab ore loqui nequeo quod pectore gesto,
 4 sit satis ex multis vel modo pauca dari.
 5 Nam si respicias votum per verba canentis,
 6 malueram majus qui tibi parva fero.
 7 Aspicimus sensum totum in dulcedine fusum
 8 quo sine nube doli corda serena micant.
 9 Puro fonte rigans nectar de fauce redundat
 10 cujus verba libens pectore corde bibo
 11 Providus, exertus, vigilans, moderatus, honestus,
 12 condimentum animae mens tua semper habet.
 13 Reginae egregiae patrimonia celsa gubernas :
 14 quae tibi conmisit sensit ubique fidem.
 15 Nemo piaae poterat reginae carior esse
 16 quam qui pro meritis talis et ipse foret.
 17 Gunduari, longo vigeas placiturus in aevo,
 18 conjuge cum propria luce perenne manens.

AD FLAVUM

F7_18 v.1 Ad carum totiens mea pergat epistula Flavum :
 2 sic monet officii sedula cura loqui.
 3 Nunc quoque prosaico, modo mittens carmina versu
 4 blandior affatu debita solvit amor.
 5 Quin tibi pauca ferat qui vult iter ire viator
 6 nemo mihi tacite praetereundus abit,
 7 fatus amicitiae te ut pagina saepe requirat
 8 et si vir desit, portitor aura placet.
 9 Attonitis animis ego per vaga nubila pendo

10 nullaque suscipio signa relata manu.
 11 An tibi charta parum peregrina merce rotatur ?
 12 non amor extorquet quod neque tempus habet ?
 13 Scribere quo possis, discingat fascia fagum :
 14 cortice dicta legi fit mihi dulce tui.
 15 An tua romuleum fastidit lingua susurrum ?
 16 Quaeso vel hebraicis reddito verba notis.
 17 Doctus Achaemeniis quae vis perscribito signis,
 18 aut magis Argolico pange canora sopho.
 19 Barbara fraxineis pingatur rhuna tabellis
 20 quodque papyrus agit virgula plana valet.
 21 Pagina vel redeat perscripta dolatile charta :
 22 quod relegi poterit fructus amantis erit.

ITEM AD FLAVUM ET EVODIUM

F7_19 v.1 Quam bene conveniunt genitor quos sustulit unus,
 2 si simul hos unum pectus utrosque tenet !
 3 Visceribus hisdem genitos Flavum Evodiumque
 4 prorsus amore uno viscera nostra tegunt.
 5 Alter in alterius mihi visu visus habetur
 6 et fratris speciem fratris imago dedit.
 7 Unius ex facie facies mihi nota secundi :
 8 sic speculo similem forma repressa refert.
 9 Ergo pari voto paribus dans vota salutis
 10 ambos inter ego tertius alter ero,
 11 hoc cupiens ut quos caris amplexibus idem
 12 tres amor unus habet, nos quoque charta liget.

AD SIGIMUNDIMI

F7_20 v.1 Fixus amore tuo votis inhiantibus adstans
 2 quae tibi, care, salus, saepe requiro viros.
 3 Quisque viator adest properans aquilonis ab axe,
 4 quamvis festinum sollicitando moror.
 5 Seu privata virum seu publica cura citabit,
 6 hinc, nisi percuncter, nullus abibit iter.
 7 Quam vegetus membris ? Quae te loca, care, cohercent ?
 8 Ordine disposito cuncta requirit amor.
 9 Si gravis arma tenens italas terit hospes harenas
 10 aut quae francus habet pagina pandat age.
 11 Quid geris, oro, refer ; tamen ut queo longius opto
 12 vivas pars animae dimidiata meae.

ITEM AD SIGIMUNDUM ET ALAGISILUM

F7_21 v.1 Nomina amicorum mihi dulcis epistula pandit :
 2 hinc Sigimunde nitens, hinc Alagisle decens.
 3 Prosperitas felix ventorum flamina fudit
 4 quando mihi caros nuntiat aura viros.
 5 Testor utrumque caput, tantum mea vota jvantur
 6 quantum fit florens laeta sub imbre seges.
 7 Ne sitiam rapidis aestivo tempore flammis,
 8 nectarei fontis me recreastis aquis.
 9 Post italas terras mittis mihi, Rhene, parentes :
 10 adventu fratrum non peregrinus ero.
 11 Tempore belligero pacis nova gaudia surgunt,
 12 hi quia venerunt quos meus optat amor.
 13 Qui mihi festivae diei duplicastis honorem,
 14 sic vester crescat munere regis honor.

AD BOSONEM REFERENDARIUM

F7_22 v.1 Sic tegat Omnipotens radiantia culmina regis
 2 atque ejus causas arma superna regant,
 3 sic dominum ac servos divina potentia servet
 4 et patriae maneat hoc dominante salus,
 5 sic placido regi summus pius auctor ab alto
 6 qui dedit ante Petro porrigat ipse manum,
 7 sic te longaevi comitetur gratia regis
 8 et florente illo gaudia fixa metas.
 9 Hoc rogo quam citius veniat quicumque jubetur,
 10 ne gravet ultra animos hic mora tarda meos.
 11 Nam qui festinat, statuit quod certa voluntas,
 12 si votum adceleret, dulcius esse solet.
 13 Illud enim nimium per verba precantia posco
 14 commender domino te memorante meo.
 15 Actibus excellens maneat per saecula felix
 16 et memor ipse mei, dulcis amice, vale.

AD PATERNUM

F7_23 v.1 Nominis auspicio fulgent tua facta, Paterne,
 2 munere qui proprio te facis esse patrem.
 3 Servitii nostri non inmemor omnia praestas
 4 et tibi devotis das pia vota libens.
 5 Ut bona distribuas modo qui tam promptus haberis,
 6 unde magis praestes amplificentur opes.

VERSUS IN GAUATIS

F7_24 v.1 Qui legis in pulchro circumdata verba metallo,
 2 si venias purus, hoc imitaris opus.
 3 Nam velut argentum calida fornace probatur,
 4 sic se purgato pectore prodit homo.
 5 Qui venis ad caros conviva fidelis amicos
 6 quod minus est epulis plus in amore capis.
 7 Non haec per pelagus peregrinus detulit hospes
 8 sume libens patrii quod genuere lares.
 9 Quamvis doctiloquax te seria cura fatiget,
 10 hac veniens festos misce poeta jocos.
 11 Sic tamen, ut propriam rationem servet honestus,
 12 nam solet incautus sermo movere manus.
 13 Vita brevis hominum, fugiunt praesentia rerum :
 14 tu cole quae potius non moritura manent.
 15 Erige justitiam, sere pacem, dilige Christum,
 16 expete delicias quas sine fine geras.
 17 Pelle palatinas post multa negotia rixas :
 18 vivere jucunde mensa benigna monet.
 19 Causae irae strepitus sileant, fora jurgia leges
 20 hic placeat requies quam dat amica dies.
 21 Quem rogo, pacificos animos ad prandia defer
 22 hostem quaere alibi, si tibi pugna placet.
 23 Deliciis mediis lites agitare recuses :
 24 arma tibi campus, mensa ministret olus.
 25 Si tibi magnanimus rigida virtute videris,
 26 secure ad calices fortia bella refers.
 27 Qui venit huc nostrae dapes cognoscere mensae,
 28 commendet positos gratia sola cibos.

VERSUS AD GALACTORIUM COMITEM

F7_25 v.1 Saepius optaram fieri me remige nautam,

2 cursibus undifragis ut rates iret aquis
 3 flatibus aut rapidis per dorsa garonnica ferrer,
 4 burdigalense petens ut celer actus iter
 5 velaque fluctivagum traherent Aquilone secundo,
 6 me quoque litoreo redderet aura sinu
 7 qua pius antistes sacra Gundegiselus offert
 8 culmine pro populi, quo micat ara Dei.
 9 Tu quoque quo resides meritis, comes, ample serenis,
 10 care Galactori, sedula cura mihi,
 11 cui rite excellens rex Guntheramnus honores
 12 majus adhuc debet, qui tibi magna dedit.
 13 Cum tamen hoc vellem, timor obstitit et Himus ille
 14 qui cumulo rapidae mons fremit albus aquae.
 15 Dulcedo invitat civilis et unda repugnat :
 16 sic vocat atque vetat hinc amor, inde pavor.
 17 Plane hoc quod superest solvat vel epistula currens :
 18 littera, quod facerem, reddat amore vicem.
 19 Maxime nunc igitur te, dulcis amice, saluto,
 20 sperans a Domino te superesse diu.
 21 Cumque domo sociis antistite conjuge natis
 22 vive, comes, cui sint jura regenda ducis.
 23 Pontifici summo commender, opime, precatu,
 24 sic tua pars meritis sit data dextra polis.
 25 Si superest aliquid quod forte tributa redundant :
 26 qui modo mitto apices, te rogo mitte pices.

LIBER OCTAVVS

EX NOMINE SUO AD DIVERSOS

F8_1 v.1 Aonias avido qui lambitis ore Camenas
 2 Castaliusque quibus sumitur aure liquor,
 3 quos bene fruge sua Demosthenis horrea ditant
 4 largus et inriguis implet Homerus aquis,
 5 fercula sive quibus fert dives uterque minister,
 6 Tullius ore cibum, pocula fonte Maro ;
 7 vos quoque qui numquam morituras carpitis escas,
 8 quos paradisiaco germine Christus alit,
 9 facundo tonitru penetrati qui retinentur
 10 nunc monitis Pauli, postea clave Petri,
 11 Fortunatus ego hinc humili prece voce saluto,
 12 - Italiae genitum gallica rura tenent, -
 13 Pictavis residens qua sanctus Hilarius olim
 14 natus in urbe fuit, notus in orbe pater.
 15 Eloquii currente rota penetravit ad Indos
 16 ingeniumque potens ultima Thyle colit.
 17 Perfundens cunctas vice solis nomine terras
 18 cujus dona favens Persa, Britannus habet.
 19 Christicolo scythicas laxavit amore pruinas :
 20 dogmate ferventi frigida corda calent.
 21 Martinum cupiens voto Radegundis adhaesi
 22 quam genuit caelo terra thoringa sacro,
 23 germine regali pia neptis Herminefredi
 24 cui de fratre patris Hamalafredus adest.
 25 Mens ornata bonis fugituos spremit honores,
 26 sciens in solo firma manere Deo.
 27 Regia lactineo conmutans pallia cultu,

28 vilior ancillae vestis amata tegit.
 29 Splendida serraco quondam subvecta superbo
 30 nunc terit obsequio planta modesta lutum.
 31 Quae prius insertis onerata est dextra zmaragdis
 32 servit inops famulis sedulitate suis.
 33 Aulae celsa regens quondam modo jussa ministrat,
 34 quae dominando prius, nunc famulando placet.
 35 Paupertate potens et solo libera voto
 36 clarius abjecto stat radiata loco.
 37 Aurea fulcra tenens, jam tum sibi vilis honore,
 38 effugit exstructum pulvere fusa torum.
 39 Si contemnatur, tunc nobilis esse fatetur
 40 et putat esse minor, si datur ullus honor.
 41 Parca cibo Eustochium superans, abstemia Paulam,
 42 vulnera quo curet dux Faviola monet,
 43 Melaniam studio reparans, pietate Blesillam,
 44 Marcellam votis aequiperare valens,
 45 obsequio Martham renovat lacrimisque Mariam,
 46 pervigil Eugeniam, vult patiando Theclam.
 47 Sensibus ista gerit quicquid laudatur in illis :
 48 signa recognosco quae prius acta lego.
 49 Omnia despiciens et adhuc in corpore constans
 50 spiritus hic vivit, sed caro functa jacet.
 51 Terram habitans caelos intrat bene libera sensu,
 52 atque homines inter jam super astra petit.
 53 Cujus sunt epulae quicquid pia regula pangit,
 54 quicquid Gregorius Basiliusque docent,
 55 acer Athanasius, quod lenis Hilarius edunt,
 56 quos causae socios lux tenet una duos,
 57 quod tonat Ambrosius, Hieronimus atque coruscat,
 58 sive Augustinus fonte fluente rigat,
 59 Sedulius dulcis, quod Orosius edit acutus.
 60 Regula Caesarii linea nata sibi est.
 61 His alitur jejuna cibus, palpata nec umquam
 62 fit caro, sit nisi jam spiritus ante satur.
 63 Cetera nunc taceam, melius quia teste Tonante
 64 iudicioque Dei glorificanda manent.
 65 Cui sua quisque potest sanctorum carmina vatium
 66 mittat in exiguis munera larga libris.
 67 Se putet inde Dei dotare manentia templa
 68 quisquis ei votis scripta beata ferat.
 69 Haec quoque qui legitis, rogo, reddite verba salutis ;
 70 nam mihi charta levis pondus amoris erit.

DE ITINERE SUO CUM AD DOMNUM GERMANUM IRE DEBERET ET A DOMNA RADEGUNDE...
 F8_2 v.1 Emicat ecce dies, nobis iter instat agendum,
 2 debita persolvens emicat ecce dies.
 3 Me vocat inde pater radians Germanus in orbe,
 4 hinc retinet mater, me vocat inde pater.
 5 Dulcis uterque mihi voto amplectente cohaesit,
 6 plenus amore Dei, dulcis uterque mihi.
 7 Carior haec animo, quamquam sit et ille beato,
 8 clarior ille gradu, carior haec animo.
 9 Mens tenet una duos aequali calce viantes,
 10 ad pia tendentes mens tenet una duos.
 11 Proficit alterutro quicquid bene gesserit alter,
 12 unius omne bonum proficit alterutro.
 13 Sunt quia corde pares, jussus non ire recuso :

14 obsequar ambobus, sunt quia corde pares,
 15 nec tamen hinc abeo, quamvis nova tecta videbo
 16 corpore discedo nec tamen hinc abeo.
 17 Hic ego totus ero nec corde ac mente revellor ;
 18 sic quoque dum redeo, hic ego totus ero.
 19 Porrigat arma mihi caelestia mater eunti,
 20 ut sibi plus habeat, porrigat arma mihi.

IN NOMINE DOMINI NOSTRI IESU CHRISTI ET DOMNAE MARIAE MATRIS EIUS DE VIRGINITATE

F8_3 v.1 Culmina multa polos radianti lumine complent
 2 laetanturque piis agmina sancta choris.
 3 Carmine davitico plaudentia brachia texunt
 4 creditur et sacro tripudiare gradu.
 5 Coetibus angelicis hominum sociata propago
 6 reddit honorificum laudis amore sonum.
 7 Alternis vicibus divina poemata psallunt
 8 atque Creatori mystica verba canunt.
 9 Lucida sidereo caeli strepit aula tumultu
 10 laudibus et Domini concutit astra fragor.
 11 Hinc patriarcharum resonant modulamina vocum
 12 inter quos Abrahae est maxima palma fide.
 13 A quo acceperunt, reddunt dehinc verba prophetae,
 14 Moyses ante alios dux mare teste viros.
 15 Inde favent fratres et celsa caterva piorum,
 16 lumen apostolicum praemeditante Petro
 17 qui valet ex meritis cineres animare sepultos
 18 et revocare diem voce jubente potest.
 19 Hinc mercede pari sequitur pius ordo senatum
 20 in quibus est Stephanus victor honore prior,
 21 quos saxis gladiisque, fame, site, frigore, flammis
 22 ereptos terris jungit in astra fides.
 23 Casibus heu variis quos sic tulit ira furentis,
 24 etsi mors dispar, lux tamen una tenet.
 25 Inde Dei genetrix pia virgo Maria coruscat
 26 virgineoque agni de grege ducit oves.
 27 Ipsa puellari medio circumdata coetu
 28 luce pudicitiae splendida castra trahit.
 29 Per paradisiacas epulas sua vota canentes
 30 ista legit violas carpit et illa rosas.
 31 Pratorum gemmas ac lilia pollice rumpunt
 32 et quod odoratum est flore comante metunt.
 33 Eufemia illic pariter quoque plaudit Agathe
 34 et Justina simul consociante Thecla.
 35 Hic Paulina, Agnes, Basilissa, Eugenia regnant
 36 et quascumque sacer vexit ad astra pudor.
 37 Felices quarum Christi contingit amore
 38 vivere perpetuo nomina fixa libro !
 39 Has inter comites conjuncta Casaria fulget,
 40 temporibus nostris arelatense decus,
 41 Caesarii monitis luci sociata perenni
 42 si non martyrii, virginitatis ope.
 43 Quos Liliola refert aequatis moribus ambos
 44 et claram heredem proxima palma manet
 45 et quaecumque suos vigilans meditabitur actus,
 46 his erit egregio participanda gradu.
 47 Concipiente fide Christi Radegundis amore
 48 Caesarii lambit regula quicquid habet,
 49 cujus pontificis refluentia pectore mella

50 colligit et rivos insatiata bibit.
 51 Quantum fonte trahit, tantum sitis addita crescit
 52 et de rore Dei plus madefacta calet.
 53 Nec sibi, sed cunctis generaliter unica vivens
 54 felix angustam pandit ad astra viam.
 55 Sed tibi prae reliquis, mater pia, carior instat,
 56 eligit excelso consociare choro.
 57 Res probat ipsa tamen quoniam quae filia constas
 58 te matrem votis optat habere suam
 59 quamque suis genibus caram nutritivum alumnam
 60 praeficit ecce suo constituendo loco
 61 et quae te semper baculi moderamine rexit
 62 prompta sub imperio vult magis esse tuo.
 63 Proficit illa sibi, cum tu praeponeris illi,
 64 illa subit voto te potiente gradu.
 65 Ecce diem festum tandem pietate Tonantis,
 66 quam precibus genetrix saepe rogabat, habet.
 67 Cujus respirant tacito praecordia pulsu
 68 angustosque animos gaudia larga replent.
 69 Expectata nimis oculos ad tempora tendens
 70 semine laetitiae dona superna metit.
 71 Optat adhuc supplex unum quod restat honoris
 72 ut placeas Christo consocianda polo.
 73 Qualiter haec capias labor esse videtur agentis,
 74 sed labor iste brevis fruge replendus erit.
 75 Servitio Domini subdenda est ad juga cervix
 76 nec grave sed leve fit quicquid amore ferens.
 77 Non aliunde petas, in matre exempla require,
 78 aspicias ante oculos quod mediteris opus,
 79 cum qua festinas simul esse in luce perenni
 80 condecet hic simili currere lege viam.
 81 Sit tibi dulce decus veneranda Casaria praesens,
 82 praesule Caesario non caritura tuo.
 83 Illos corde sequens mandataque corpore complens,
 84 ut teneas flores, has imiteris apes.
 85 Respice qui voluit nasci se ventre puellae
 86 et Domini Summi qua caro carne venit.
 87 Spiritus intactum venerabilis adtigit alvum,
 88 virgineam cupiens inhabitare domum,
 89 hanc Deus ingrediens hominis quae nesciit usum,
 90 sola suo nato conscia virgo viro.
 91 Concipiente fide nullo se semine lusit
 92 et quo factus homo est non fuit alter homo.
 93 Virginitas felix quae partu est digna Tonantis,
 94 quae meruit Dominum progenerare suum !
 95 Tempa Creatoris sunt membra pudica puellae
 96 et habitat proprius tale cubile Deus.
 97 Quantum sponsa potest de virginitate placere
 98 ipsa cui genetrix non nisi virgo placet !
 99 Sarra, Rebecca, Rachel, Ster, Judith, Anna, Noemi
 100 quamvis praecipue culmen ad astra levant,
 101 nulla tamen meruit mundi generare parentem :
 102 quae Dominum peperit, clausa Maria manet.
 103 Intemerata Deum suspendit ad ubera natum
 104 et panem caeli munere lactis alit.
 105 Hoc ergo in sponsae nunc viscera diligit ipse
 106 quod prius in matrem legit honore sacer.
 107 Pectora liberius penetrat sibi cognita soli

108 et quo nemo fuit laetior intrat iter,
 109 haec sua membra putans quae nulla injuria fuscet,
 110 quae neque sunt alio participata viro.
 111 Mitis in affectu pectus complectitur illud
 112 promptus amore colens quo alter amator abest.
 113 Cum sua regna Deus pariter velit omnibus esse,
 114 hoc commune tamen Christus habere fugit.
 115 Per paradisiacas epulas cupit esse coheres,
 116 virgineam solus vult habitare domum.
 117 Castra pudicitiae melius rex ipse tuetur ;
 118 si sibi non violet turba dicata fidem,
 119 ipse voluntatem si viderit esse fidelem,
 120 proque suis famulis et Deus arma tenet :
 121 lorica clipeo galea praemunit amantem
 122 et stabilit solidum montis in arce gradum.
 123 Ballista jaculans pro te mox exit in hostem ,
 124 perdat ut adversos qui tibi bella movent.
 125 Currit ad amplexus post proelia gesta triumphans,
 126 infigans labiis oscula casta sacris.
 127 Blanditur refovet veneratur honorat obumbrat
 128 et locat in thalamo membra pudica suo.
 129 Siderei proceres ad regia vota frequentes
 130 certatim veniunt adglomerando chorum.
 131 Quo praeter Cherubin, Seraphin reliquosque beatos
 132 aligeros comites quos tegit umbra Dei,
 133 bis duodena senum concursat gloria vatium,
 134 attonito sensu plaudere voce, manu.
 135 His venit Helias, illis in curribus Enoch
 136 et nati dono virgo Maria prior.
 137 Jurisconsulti Pauli comitante volatu
 138 princeps romana currit ab arce Petrus.
 139 Conveniunt ad festa simul sua dona ferentes
 140 hi quorum cineres urbs caput orbis habet.
 141 Culmen apostolicum radianti luce coruscum
 142 nobilis Andream mittit Achaia suum.
 143 Praecipuum meritis Ephesus veneranda Johannem
 144 dirigit et Jacobos terra beata sacros,
 145 laeta suis votis Hierapolis alma Philippum,
 146 producens Thomam munus Edessa pium.
 147 Inde triumphantem fert India Bartholomeum,
 148 Matheum eximium Naddaver alta virum.
 149 Hinc Simonem ac Judam lumen Persida gemellum
 150 laeta relaxato mittit ad astra sinu,
 151 et sine rore ferax Aegyptus torrida Marcum,
 152 Lucae evangelica participante tuba.
 153 Africa Cyprianum, dat Siscia clara Quirinum ;
 154 Vincenti Hispana surgit ab arce decus.
 155 Egregium Albanum fecunda Britannia profert,
 156 Massilia Victor martyr ab urbe venit.
 157 Porrigit ipsa decens Arelas pia dona Genesi
 158 astris, Caesario concomitante suo.
 159 Ipse Parisiaca properat Dionisius urbe,
 160 Augustiduno Symphoriane venis.
 161 Privatum Gabalus, Julianum Arvernus abundans,
 162 Ferreolum pariter pulchra Vienna gerit.
 163 Hinc simul Hilarium, Martinum Gallia mittit,
 164 te quoque, Laurenti, Roma, beate mihi.
 165 Felicem meritis Vicetia laeta refundit

166 et Fortunatum fert Aquileia suum ;
 167 Vitalem ac reliquos quos cara Ravenna sepultat,
 168 Gervasium, Ambrosium, Mediolane, meum ;
 169 Justinam Patavi, Eufemiam huc Calchedon offert,
 170 Eulalia Emerita tollit ab urbe caput.
 171 Caeciliam Sicula profert, Seleucia Theclam
 172 et legio felix Agaunensis adest.
 173 Europae atque Asiae quis lumina tanta recurrat ?
 174 vel tua quis possit pignora, Roma, loqui ?
 175 Undique collectos diversis partibus orbis
 176 agminibus junctis regia pompa trahit.
 177 Intranat sidereo vernantes lumine portas,
 178 excipit hos proceres urbs patefacta poli.
 179 Incedit sensim tum praetextata potestas
 180 ordine, patricio sic potitura loco.
 181 Nobilitas caeli dives cruce, sanguine Christi
 182 festinat festos concelebrare toros.
 183 Paupertas terrae censu caeleste redundans
 184 consulibus tantis regia vota colit.
 185 Undique distincte numerosa sedilia complent
 186 attonitique silent rege loquente patres.
 187 Majestas arcana Dei tum pondere fixo
 188 alloquitur proceres quos sua dextra regit :
 189 "Haec mihi pollicitum servavit virgo pudorem
 190 nec voluit placitam dilacerare fidem :
 191 sollicitis animis sponsi vestigia sectans
 192 et mea vota petens inviolata venit.
 193 Per tribulos gradiens spinae cavefecit acumen,
 194 sentibus in mediis nescia ferre vepres.
 195 Vipera seps jaculus basiliscus emorrois aspis
 196 faucibus horrificis sibila torsit iners.
 197 Inde sagitta volans, hinc terruit arcus euntem :
 198 docta sed insidiis cautius ire suis.
 199 Inter tot hostes nulli se subdidit insons ;
 200 vulnera suscepit, sed tolerando fugit.
 201 Per tela et gladios tenuit mora nulla sequentem :
 202 sed tam dura nimis non nisi ferret amor.
 203 Ad me aures oculos animos suspensa tetendit ;
 204 cum terris jacuit, jam super astra fuit.
 205 Singultus gemitus curas suspiria fletus
 206 saepius audivi non abolenda mihi.
 207 Abscondens aliis, nulli confessa dolores
 208 intellecta mihi murmura clausa dedit.
 209 Vidit forte meum quotiens in imagine vultum,
 210 oscula dans labiis lumine fudit aquas ;
 211 pervigil incubuit, si forte alicunde venirem,
 212 marmore jam tepido frigida membra premens.
 213 Haec gelifacta meum servavit in ossibus ignem :
 214 visceribus rigidis pectus amore calet.
 215 Corpore despecto recubabat in aggere nudo
 216 seque oblita jacens me memor ipsa fuit.
 217 Fletibus adsiduis exhausto humore genarum
 218 siccatis oculis terra natabat aquis.
 219 Et quia me vivens carnali lumine quondam
 220 cernere non potuit, misit amata precem.
 221 Nam mihi sollicito nocturnis saepius horis
 222 scripta suis lacrimis pagina lecta fuit,
 223 plena quidem variis tremulo sermone querellis,

224 quod sine me solo maesta jaceret humo.
 225 Cujus ab ore fluens nativo gutta liquore
 226 haec dedit in tremulis signa relata notis :
 227 "Strata solo recubo lacrimans neque cerno quod opto,
 228 tristis in amplexu pectore saxa premo.
 229 Sponso absente manens tam dura cubilia servo
 230 nec mea quem cupiunt membra tenere queunt.
 231 Dic ubi sis quem exspecto gemens, qua te urbe requiram
 232 quave sequar, nullis femina nota locis.
 233 Ipsa venire velim, properans si possit in astris
 234 pendula sideream planta tenere viam.
 235 Nunc sine te fuscis graviter nox occupat alis
 236 ipsaque sole micans est mihi caeca dies.
 237 Lilia narcissus violae rosa nardus amomum,
 238 oblectant animos germina nulla meos.
 239 Ut te conspiciam per singula nubila pendo
 240 et vaga per nebulas lumina ducit amor.
 241 Ecce procellosos suspecta interrogo ventos
 242 quid mihi de Domino nuntiet aura meo.
 243 Proque tuis pedibus cupio caementa lavare
 244 et tua templa mihi tergere crine libet.
 245 Quicquid erit tolerem, sunt omnia dulcia dura :
 246 donec te videam, haec mihi poena placet.
 247 Tu tamen esto memor quoniam tua vota requiro ;
 248 est mihi cura tui, sit tibi cura mei ".
 249 Haec referens avidis jactabat brachia palmis,
 250 si posset plantas forte tenere meas ;
 251 cum decepta sibi sine me sua dextra rediret,
 252 luminis instillans ora lavabat aquis.
 253 Cum recubaret humo neque victa sopore quievit,
 254 consuliturus ei saepe simul jacui,
 255 condolui pariter, lacrimarum flumina tersi,
 256 oscula dans rutilis mellificata favis.
 257 Nunc igitur regnet placitoque fruatur amore
 258 quae mihi jam pridem pectore juncta fuit."
 259 Adsensu fremit aula poli residente senatu.
 260 Nomen perpetuo scribitur inde libro.
 261 Traditur aeternum mansura in saecula censum,
 262 virginis in thalamos fundit Olympus opes.
 263 Inseritur capiti radians diadema berillis,
 264 ordinibus variis alba zmaragdus inest.
 265 Alligat et nitidos ametistena vitta capillos,
 266 margaritato flexilis arte sinu.
 267 Sardonyche impressum per colla monile coruscat,
 268 Sardia purpurea luce metalla micant.
 269 Dextrae armilla datur carcedone, iaspide mixta,
 270 aut jachinteo sudat honore manus.
 271 Brattea gemmatam cycladem fila catenant,
 272 sidereis donis arte sigilla tument.
 273 Pulchra topaziacis oneratur zona lapillis,
 274 chrysolita aurata fibula claudit acu,
 275 veste superposita : bis cocto purpura bysso,
 276 qualem nupta Deo ferre puella potest.
 277 His cumulata bonis thalamo regina sedebit
 278 atque poli solem sub pede virgo premet.
 279 Cui tamen hoc opus est, cum virginitatis honore
 280 ut placeat sponso mens moderata suo,
 281 inconcussa gravem teneat patientia vultum,

282 viribus ira suis ne labefacta ruat,
 283 neu faciles animos ventosa procella fatiget,
 284 fluctibus in mediis anchora cordis agat.
 285 Virtutum speciale decus patientia fulget ;
 286 qua gradiaris iter Job tibi signa dabit.
 287 Quidve loquar humilem quem gratia celsa decorat ?
 288 Et quantum ima petit, surgit ad alta magis.
 289 Quo diversa nimis divisa est causa duobus :
 290 qui jacet ille subit, qui tumet ipse cadit.
 291 Haec exempla quidem Joseph Pharaoque dederunt ;
 292 tollitur ille lacu, mergitur iste freto.
 293 Est etiam laudis stipendia poscere, tantum
 294 ne premat ipsa suum pestis avara sinum.
 295 Contentus minimis, si non majora requirat,
 296 pauper in angusto regnat habendo Deum.
 297 Sapphyra vel mulier geminos largita minutos,
 298 illa tenendo perit, haec sua dando manet.
 299 Nimium felix quem non modo mollia frangunt,
 300 iudice qui sese membra labore terit !
 301 Spernit opum laqueos, unguenta toreumata fluxus,
 302 ut custos animae sit rigor ipse suae,
 303 hoc etiam recolens quid possit parcior usus :
 304 sobrietas Judith vincere sola facit.
 305 Quidve animum dulcem memorem quem gratia pascit,
 306 cum intra se populos viscera cara ferant ?
 307 Pacificus, gaudens unus complectitur omnes,
 308 stringit in affectu pectora cuncta suo.
 309 O nimium felix, florens bonitate voluntas,
 310 qua sine nil populo nec placet ara Deo !
 311 Hoc opus, ut quotiens aliquo mens fertur amaro,
 312 firmet in adversis spes comitata fidem.
 313 Aspera non frangant, tumidos neque prospera reddant :
 314 sic mediocre tenens cautius itur iter.
 315 Haec bona sumit homo, tribuat si gratia Christi,
 316 inspirante illo vel moderante gradum.
 317 His ornata bonis radiantia lumina fundis,
 318 has retinens gemmas tu quoque gemma micas.
 319 Virginitas felix nullis aequanda loquellis,
 320 nec si centenus suppleat ora sonus !
 321 Quod prius est, sine sorde nitet venerabilis orbi,
 322 naturae proprium non vitiando bonum,
 323 corporis inlaesum servans pretiosa talentum,
 324 perpetuas retinens nescia furis opes.
 325 Non premit incluso torpentia viscera fetu
 326 aut gravefacta jacet pignore maesta suo.
 327 Inter anhelantes animae seu corporis aestus
 328 in dubio pendens stamine fessa salus,
 329 quando suis jaculis uteri laesura tumescit
 330 atque voluptatis morbida crescit hydrus.
 331 Ultra hominis habitum tantum cutis efferat turgit,
 332 ut pudeat matrem hoc quod amore gerit.
 333 Se fugit et propriis verecunda parentibus aufert,
 334 donec depositum sarcina solvat onus.
 335 Quis gemitum partus verbis aequare valebit
 336 aut cui tot lacrimas carmine flere vacet,
 337 cum sua secretum compago relaxat onustum
 338 atque dolore gravi viscera fascis agit
 339 Victa puerperio membrorum porta fatiscit

340 exit et ad lucem fors sine luce puer.
 341 Sin vivat genitus genetrix se oblita requirit
 342 tristis et ad natum lumina lassa trahit.
 343 Respicit expositum, nec jam sua mater, alumnum :
 344 quae vix dum peperit, haec modo funus habet.
 345 Nec mater fructu meruit nec virgo vocari :
 346 haec duo damna dolens se male nupta gemit.
 347 Non validus [lacune] spes rapta dolores,
 348 nec fletu nati se fovet illa sui.
 349 Non caras lacrimas infantis ab ore resorbet
 350 aut teneras voces lacte fluente rapit.
 351 Tristis decrepito damnat sua viscera luctu :
 352 quo jacuit natus, heu, dolet ille sinus.
 353 Quid si vita manet pueri nec semper habenda ?
 354 Incipiat teneros ut dare voce sonos,
 355 imperfecta rudis conlidens murmura linguae,
 356 cum matrem dulci fauce susurrus alit :
 357 contingatque nefas, rapiatur pectore matris ?
 358 Aetas ad damnum crevit adulta suum.
 359 Triste flagellatis genetrix orbata capillis
 360 defuncti in labiis ubera sicca premit ;
 361 infundens lacrimas lamenta resuscitat ardens
 362 et gelidum corpus fonte tepente lavat.
 363 Dilacerat faciem, crinem aufert, pectora tundit ;
 364 heu dolor armatus sic sua membra ferit.
 365 Si videt alterius natum, sua pignora deflet
 366 aequalemque suum tristis obisse gemit.
 367 Alter si ploret, currat, stet, gaudeat infans,
 368 ante oculos nati ludit imago sui.
 369 Quem semel effudit, per cuncta momenta requirit
 370 nec miserae matris pendet ad ora puer.
 371 Quid si aliud gravius, moriatur ut ipse jugalis ?
 372 Quae nova nupta fuit jam viduata jacet.
 373 De thalamo ad tumulum, modo candida, tam cito nigra
 374 ante quibus caluit frigida membra tenet,
 375 construit exequias perversaque vota celebrans
 376 exornat tumulum, heu, spoliando torum.
 377 Saepe maritalem repetit miserando sepulchrum
 378 contemptaque domo funus amata colit.
 379 Incumbit tumulo solacia cassa requirens ;
 380 cujus membra prius, nunc super ossa premit.
 381 Fletibus inriguis, perituro carmine, luget :
 382 funeris obsequio lumina perdit amor.
 383 Quot mala plebeiae veniant quis pandere possit ?
 384 Vix bene reginae quae viduata manet.
 385 "Non veto conjugium, sed praefero virginis alvum"
 386 quod dat apostolica Paulus ab ore tuba.
 387 Inclita virginitas, caelos quae dote mereris,
 388 cum thalamis Christi consocianda places,
 389 funera nulla gemis, sine limite gaudia sumis,
 390 vivit amor semper nec tibi Christus obit.
 391 Illic regna tenes, hic vincis et integra fulges
 392 omni tuta loco, sanctificata Deo.
 393 Haec tibi, cara Deo, meritis venerabilis Agnes,
 394 offero : quo placeas, tu faciendo colas,
 395 iudicis ut jussu munus tribuatur utrisque :
 396 quando corona tibi, tunc mihi vel venia.
 397 Opto per hos fluctus, animas tu, Christe, gubernes

398 arbore et antemna velificante crucis,
399 ut post emensos mundani gurgitis aestus
400 in portum vitae nos tua dextra locet.

AD VIRGINES

F8_4 v.1 Inter apostolicas acies sacrosque prophetas
 2 proxima martyribus praemia virgo tenet.
 3 Splendida sidereo circumdata lumine pergens
 4 jungitur angelicis casta puella choris.
 5 Frugae pudicitiae caeli dotanda talento
 6 aeterni regis ducitur in thalamis.
 7 Pulchra corona caput triplici diademate cingit
 8 et gemmae exornant pectora colla comam.
 9 Induitur teneris superaddita purpura membris
 10 et candore nivis fulgida palla tegit.
 11 Floribus aeternis oculos rosa lilia pascunt
 12 et paradisiacus naribus intrat odor.
 13 Unde magis, dulcis, hortamur ut ista requiras
 14 quae dedit Eugeniae Christus et alma Theclae.
 15 Virgo Dei, fructus caeli, victoria mundi,
 16 ut semper regnes, has pete regis opes.
 17 Sunt ubi crysolitis fabricata palatia gemmis
 18 atque zmaragdineo janua poste viret.
 19 Limina sardonichum variato lumine florent
 20 et hyacinteus circuit ordo domum.
 21 Aurea tecta micant, plebs aurea fulget in aula
 22 et cum rege pio turba corusca nitet.
 23 Ille puellarum locus est, quae lucis amore
 24 hic servant Domino corpore mente fidem.
 25 Despice quod terrae est, et clara sedebis in astris
 26 Christi ut sponsa placens regna superna colas.
 27 Praesens vita nimis fugitivo tempore transit :
 28 virginis integritas glorificanda manet.
 29 Paupertas te parva rogat cum divite Christo,
 30 ut venias nostro dulcis alumna sinu,
 31 quo patris auxilium Domino obtentura preceris
 32 atque tibi caelis regna beata pares,
 33 ut pariter sanctae merearis juncta Mariae
 34 gaudia perpetuo concelebrare choro.
 35 Has quaecumque piis manibus suscepis arras
 36 non nuptura homini, sed sis amata Dei.

AD DOMNAM RADEGUNDEM

F8_5 v.1 Regali de stirpe potens Radegundis in orbe,
 2 altera cui caelis regna tenenda manent,
 3 despiciens mundum meruisti adquirere Christum,
 4 et dum in claustra lates, hinc super astra vides.
 5 Gaudia terreni conculcas noxia regni,
 6 ut placeas regi laeta favente polo.
 7 Nunc angusta tenes, quo caelos largior intres :
 8 diffundens lacrimas gaudia vera metes.
 9 Et corpus crucias, animam jejunia pascunt,
 10 salve quam Dominus servat amore suos.

AD EANDEM DE UIOLIS

F8_6 v.1 Tempora si solito mihi candida lilia ferrent
 2 aut speciosa foret suave rubore rosa,
 3 haec ego rure legens aut caespite pauperis horti

4 misissem magnis munera parva libens.
 5 Sed quia prima mihi desunt, vel solvo secunda :
 6 profert qui violas, fert et amore rosas.
 7 Inter odoriferas tamen has quas misimus herbas
 8 purpureae violae nobile germen habent.
 9 Respirant pariter regali murice tinctae
 10 et saturat foliis hinc odor inde decor.
 11 Haec quod utrumque gerit pariter habeatis utraque
 12 et sit mercis odor flore perenne decus.

 AD EANDEM DE FLORIBUS SUPER ALTARE
 F8_7 v.1 Frigoris hiberni glacie constringitur orbis
 2 totaque lux agri flore carente perit.
 3 Tempore vernali Dominus quo Tartara vicit,
 4 surgit aperta suis laetior herba comis.
 5 Inde viri postes et pulpita floribus ornant,
 6 hinc mulier roseo complet odore sinum.
 7 At vos non vobis, sed Christo fertis odores,
 8 has quoque primitias ad pia templa datis.
 9 Texistis variis altaria festa coronis,
 10 pingitur ut filis floribus ara novis.
 11 Aureus ordo crocis, violis hinc blatteus exit,
 12 coccinus hinc rubricat, lacteus inde nivet.
 13 Stat prasino venetus : pugnant et flore colores,
 14 inque loco pacis herbida bella putas.
 15 Haec candore placet, rutilo micat illa decore ;
 16 suavius haec redolet, pulchrius illa rubet.
 17 Sic specie varia florum sibi germina certant,
 18 ut color hic gemmas, tura revincat odor.
 19 Vos quoque quae struitis haec, Agnes cum Radegunde,
 20 floribus aeternis vester anhelet odor.

 ITEM AD EANDEM PRO FLORIBUS TRANSMISSIS
 F8_8 v.1 O regina potens aurum cui et purpura vile est,
 2 floribus ex parvis te veneratur amans.
 3 Et si non res est, color est tamen ipse per herbas :
 4 purpura per violas, aurea forma crocis.
 5 Dives amore Dei vitasti praemia mundi :
 6 illas contemnens has retinebis opes.
 7 Suscipe missa tibi variorum munera florum
 8 ad quos te potius vita beata vocat.
 9 Quae modo te crucias, recreanda in luce futura,
 10 aspicis hinc qualis te retinebit ager.
 11 Per ramos fragiles quos nunc praebemus olentes
 12 perpende hinc quantus te refovebit odor.
 13 Haec cui debentur precor ut, cum veneris illuc,
 14 meque tuis meritis dextera blanda trahat.
 15 Quamvis te expectet paradisi gratia florum,
 16 isti vos cupiunt jam revidere foris.
 17 Et licet egregio videantur odore placere,
 18 plus ornant proprias te redeunte comas.

 AD EANDEM CUM SE RECLAUDERET
 F8_9 v.1 Mens fecunda Deo, Radegundis, vita sororum,
 2 quae ut foveas animam membra domando cremas ;
 3 annua vota colens hodie claudenda recurris :
 4 errabunt animi te repetendo mei.
 5 Lumina quam citius nostris abscondis ocellis !

6 Nam sine te nimium nocte premente gravor.
 7 Omnibus exclusis uno retineberis antro :
 8 nos magis includis quos facis esse foris.
 9 Et licet huc lateas brevibus fugitiva diebus,
 10 longior hic mensis quam celer annus erit.
 11 Tempora subducis, ceu non videaris amanti,
 12 cum vos dum cerno hoc mihi credo parum.
 13 Sed tamen ex voto tecum veniemus in unum
 14 et sequor huc animo quo vetat ire locus.
 15 Hoc precor, incolumem referant te gaudia paschae,
 16 et nobis pariter lux geminata redit.

AD EANDEM CUM REDIIIT

F8_10 v.1 Unde mihi rediit radianti lumine vultus ?
 2 Quae nimis absentem te tenere morae ?
 3 Abstuleras tecum, revocas mea gaudia tecum,
 4 paschalemque facis bis celebrare diem.
 5 Quamvis incipiant modo surgere semina sulcis,
 6 hic egomet hodie te revidendo meto.
 7 Colligo jam fruges, placidos conpono maniplos :
 8 quod solet Augustus mensis Aprilis agit ;
 9 et licet in primis modo gemma et pampinus exit,
 10 jam meus autumnus venit et uva simul.
 11 Malus et alta pirus gratos modo fundit odores,
 12 sed cum flore novo jam mihi poma ferunt.
 13 Quamvis nudus ager nullis ornetur aristis,
 14 omnia plena tamen te redeunte nitent.

AD GREGORIUM EPISCOPUM PRO INFIRMITATE SUA

F8_11 v.1 Venit ad aegrotum medici vox alma Gregori
 2 urbe ex Toronica, dum cubo rure toro,
 3 concite presbytero recitante Leone sereno,
 4 irem ut Martini sunt ubi festa pii.
 5 Tum, fateor, morbi grave debilitate laborans
 6 febre calens summa jam rigor imus eram.
 7 Hinc fragili nimium forti languore redacto
 8 ilia lassa levans halitus aeger erat.
 9 Ibat anhelanti vapor aridus ora perurens,
 10 ibat ab arcanis flatilis aura coquens.
 11 Fervor eram totus, tristis rogos, igne caminus,
 12 febris et in fibris stabat aperta patens,
 13 donec Christus opem sudore undante refudit,
 14 fervidus et gelidas ignis abegit aquas.
 15 Redditus ergo isti, pater alme, saluto saluti :
 16 auxilium exili sis, rogo, pastor ovi.

AD EUNDEM PRO CAUSA ABBATISSAE

F8_12a v.1 Repsit quale nefas intra pia saepta synaxi !
 2 Inconsulte dolor, rumpere verba vetas :
 3 quale nec ante oculos patulas neque polluit aures
 4 nec facerent, vitio qui sua fana colunt.
 5 Tu tamen, alme pater, pietatis amore labora
 6 ut sacer antistes, culmina cujus habes,
 7 unde repraesentes Martinum in tempore sacrum,
 8 cursibus atque fide dando salutis opem.

EPISTULA PRO EADEM RE

F8_12b [oratio soluta]

AD EUNDEM

F8_13 v.1 Antistes Domini, bone pastor et auctor honoris,
 2 rite decus generis quo est generosa fides :
 3 Justinam famulam pietate memento, beate ;
 4 per te et commender, stirpe vel arce pater,
 5 hinc referens grates, aviae quia reddita tandem
 6 ad vultus neptis dulcis imago venit.
 7 Ista diu nostris votis dans gaudia, rector,
 8 inter avam et neptem tu mediator agas.

AD EUNDEM SALUTATORIA

F8_14 v.1 Alme, beate pater, lumen generale, Gregori,
 2 jure sacerdotum culminis arce caput,
 3 reddo Deo grates de vobis prospera noscens,
 4 vestris nunc scriptis laetificatus agens.
 5 Me quoque commendans humili prece voce saluto,
 6 jugiter officio quem mea corda colunt.

AD EUNDEM SALUTATORIA

F8_15 v.1 Summe pater patriae, celsum et generale cacumen,
 2 forte decus generis, Toronicensis apex,
 3 lumen ab Arvernus veniens feliciter arvis,
 4 qui inlustrans populos spargeris ore pharus,
 5 Alpibus ex illis properans mons altior ipsis,
 6 vir per plana sedens qui pia castra tegis,
 7 neu noceant hostes qui sunt in ovile fideles,
 8 unicus in campis publica turris ades.
 9 Vir date dulce caput regioni, care Gregori,
 10 Martini retinet quem sacra sella patrem,
 11 me Fortunatum humilem commendo patrono ;
 12 sic tua vita diu hoc sit in orbe Deo.

AD EUNDEM SALUTATORIA

F8_16 v.1 Si qua mihi veniet quotiens occasio dulcis,
 2 opto, sacer, calamo solvere vota meo.
 3 Summe pater patriae, toto venerabilis orbe,
 4 undique care mihi, fulgida cura Dei :
 5 commendans humilem tibi me, sacer arce Gregori,
 6 pro famulo proprio, quaeso, precare Deum.

ITEM AD EUNDEM DE EA RE

F8_17 v.1 Si cessent homines velociter ire, per austros
 2 ad te, care pater, carmina missa velim.
 3 Nunc tamen est quoniam gerulus mihi, porrigo verbum,
 4 sed minus eloquio quam quod amore colo.
 5 Dulcis, opime, decus nostrum, pie papa Gregori,
 6 versiculis brevibus solvo salutis opus.
 7 Sed memor ipse mei commenda, quaeso, Tonanti :
 8 sic te consocium reddat honore throno.

AD EUNDEM DE EADEM RE

F8_18 v.1 Gurgitis in morem si lingua fluente rigaret,
 2 turbine torrentis vel raperetur aquis,
 3 ad tua praecipue praeconia summa, Gregori,
 4 dum non explerem flumine, gutta forem.
 5 Munificumque patrem aequaret nec musa Maronis :
 6 fers, bone, quanta mihi quis valet ore loqui ?

7 Hac brevitate, sacer, famulum commendo subactum
8 me Fortunatum : sit veniale, precor.

AD EUNDEM PRO UILLA PRAESTITA

F8_19 v.1 Tramite munifico celebravit pagina cursum,
2 carmine dulcifluo quam tuus edit amor,
3 in qua forte loci facta est conlatio doni,
4 qua Vigenna procax litore frangit aquas,
5 lapsibus et tumidis dum fertur nauta carinis,
6 jugera culta videt quando celeuma canit.
7 Grates, care, gero, pietatis fruge repleto,
8 qui facis unde decens multiplicetur apex.
9 Et sine his mea sunt a te quaecumque tenentur :
10 grex habet omnis agris quod bone pastor habes.

AD EUNDEM PRECATORIA PRO IPSO AGRO

F8_20 v.1 Munifici reparans Martini gesta, Gregori,
2 textit ut ille habitu nos alis ipse cibo.
3 Discipulus placidum sapiens imitando magistrum
4 ille ubi dux residet miles habebis opem.
5 Ut chlamydem ille prius, sic tu partiris agellum,
6 ille tegendo potens tuque fovendo decens,
7 ille inopem antiquum relevans, tu, care, novellum :
8 fit dives merito paupere quisque suo.
9 Quando reposcetur, vestris redit usibus arvom
10 et domino proprio restituemus agrum.
11 Unde amplas refero grates, dulcissime rector,
12 et repeto pangens haec, tua, pastor, ovis.
13 Nec tantum reddo quantum tibi debeo, praesul :
14 pro Fortunato sed, rogo, flecte Deum.

AD EUNDEM PRO PELLIBUS TRANSMISSIS

F8_21 v.1 Egregio compacta situ, falerata rotatu
2 atque Sophocleo pagina fulta sopho
3 me arentem vestro madefecit opima rigatu,
4 fecit et eloquio quod loquor esse tuo.
5 Dulcis care decens facunde benigne Gregori
6 atque pater patriae, hinc sacer, inde cate,
7 muneribus, meritis, animis et moribus aequis,
8 omnibus officiis unde colaris habens :
9 me Fortunatum tibi celso sterno pusillum,
10 commendo et voto supplice rite tuum ;
11 cui das unde sibi talaria missa ligentur
12 pellibus et niveis sint sola tecta pedis.
13 Pro quibus a Domino detur stola candida vobis
14 qui datis hoc minimis, unde feratis opes.

LIBER NONVS

AD CHILPERICUM REGEM QUANDO SYNODUS BRINNACO HABITA EST

F9_1 v.1 Ordo sacerdotum venerandaque culmina Christi,
2 quos dedit alma fides religione patres,
3 parvolus opto loqui regis praeconia celsi :
4 sublevet exigui carmina vester amor.
5 Inclite rex armis et regibus edite celsis,
6 primus ab antiquis culmina prima regens,

7 rector habens nascendo decus, moderando sed auge,
8 de radice patris flos generate potens,
9 aequali serie vos nobilitando vicissim
10 tu genus ornasti, te genus ornat avi.
11 Excepisti etenim fulgorem ab origine gentis,
12 sed per te proavis splendor honore redit.
13 Te nascente patri lux altera nascitur orbi,
14 nominis et radios spargis ubique novos.
15 Quem praefert Oriens, Lybies, Occasus et Arctus :
16 quo pede non graderis, notus honore venis.
17 Quicquid habet mundus peragrasti nomine, princeps,
18 curris et illud iter quod rota solis agit.
19 Cognite jam Ponto et rubro pelagoque sub Indo,
20 transit et Oceanum fulgida fama sopho.
21 Nomen ut hoc resonet non impedit aura nec unda :
22 sic tibi cuncta simul, terra vel astra, favent.
23 Rex bonitate placens, decus altum et nobile germen,
24 in quo tot procerum culmina culmen habent,
25 auxilium patriae, spes et tutamen in armis,
26 fida tuis virtus, inclitus atque vigor,
27 Chilperice potens : si interpret barbarus extet,
28 " adjutor fortis " hoc quoque nomen habes.
29 Non fuit in vacuum sic te vocitare parentes :
30 praesagum hoc totum laudis et omen erat.
31 Jam tunc indicium praebabant tempora nato,
32 dicta priora tamen dona secuta probant.
33 In te, dulce caput, patris omnis cura pependit
34 inter tot fratres sic amor unus eras.
35 Agnoscebat enim te jam meliora mereri :
36 unde magis coluit, praetulit inde pater ;
37 praeosuit genitor cum plus dilexit alumnum :
38 iudicium regis frangere nemo potest.
39 Auspiciis magnis crevisti, maxime princeps,
40 hinc in amore manens plebis et inde patris.
41 Sed meritis tantis subito sors invida rerum,
42 perturbare parans regna quietata tibi,
43 concutiens animos populorum et foedera fratrum,
44 laedere dum voluit, prosperitate favet.
45 Denique jam capiti valido pendente periculo,
46 quando ferire habuit, reppulit hora necem.
47 Cum retinereris mortis circumdatus armis,
48 eripuit gladio sors operante Deo.
49 Ductus ad extremum remeas de funere vitae,
50 ultima quae fuerat fit tibi prima dies.
51 Noxia dum cuperent hostes tibi bella parare,
52 pro te pugnavit fortis in arma fides.
53 Prospera iudicium sine te tua causa peregit,
54 et rediit proprio celsa cathedra loco.
55 Rex bone, ne doleas, nam te fortuna querellis
56 unde fatigavit, hinc meliora dedit.
57 Aspera tot tolerando diu modo laeta secuntur
58 et per maerore gaudia nata metis.
59 Multimodas perpesse minas tua regna resumis,
60 namque labore gravi crescere magna solent.
61 Aspera non nocuit, sed te sors dura probavit :
62 unde gravabaris, celsior inde redis.
63 Altior adsiduis crescis, non frangeris armis,
64 et belli artificem te labor ipse facit.

65 Fortior efficeris per multa pericula, princeps,
66 ac per sudores dona quietis habes.
67 Nil dolet amissum te rege superstite mundus,
68 cui se servarunt debita regna gradu.
69 Consuluit domui, patriae populoque Creator,
70 quem gentes metuunt, te superesse virum.
71 Ne ruat armatus per gallica rura rebellis,
72 nomine victoris hic es et ampla tegis :
73 quem Geta, Vasco tremunt, Danus, Euthio, Saxo, Britannus,
74 cum patre quos acie te domitasse patet.
75 Terror es extremis Fresonibus atque Suebis,
76 qui neque bella parant, sed tua frena rogant.
77 Omnibus his datus es timor illo iudice campo,
78 et terrore novo factus es altus amor.
79 In te, rector, habet regio circumdata murum
80 ac levat excelsum ferrea porta caput.
81 Tu patriae radias adamantina turris ab austro
82 et scuto stabili publica vota tegis.
83 Neu gravet haec aliquis, pia propugnacula tendis
84 ac regionis opes limite forte foves.
85 Quid de justitiae referam moderamine, princeps ?
86 Quo male nemo redit, si bene justa petit,
87 cujus in ore probo mensurae libra tenetur
88 rectaque causarum linea currit iter.
89 Nec mora fit vero, falsus nihil explicat error
90 iudiciisque tuis fraus fugit, ordo redit.
91 Quid ? Quoscumque etiam regni dicione gubernas,
92 doctior ingenio vincis et ore loquax,
93 discernens varias sub nullo interprete voces,
94 et generum linguas unica lingua refert.
95 Erigit exiguos tua munificentia cunctos
96 et quod das famulo credis id esse tuum.
97 Qualiter hinc itidem tua se praeconia tendunt
98 laudis et hoc cumulo concutit astra fragor.
99 Cui simul arma favent et littera constat amore :
100 hinc virtute potens, doctus et inde places.
101 Inter utrumque sagax, armis et jure probatus
102 belliger hinc radias, legifer inde micas.
103 De virtute pater, reparatur avunculus ore,
104 doctrinae studio vincis et omne genus.
105 Regibus aequalis de carmine major haberis,
106 dogmate vel qualis non fuit ante parens.
107 Te arma ferunt generi similem, sed littera praefert :
108 sic veterum regum par simul atque prior.
109 Admirande mihi nimium rex, cujus opime
110 proelia robor agit, carmina lima polit.
111 Legibus arma regis et leges dirigis armis :
112 artis diversae sic simul itur iter.
113 Discere si possit, rector, tua singula quisquis,
114 ornarent plures quae bona solus agis.
115 Sed tamen haec maneant et crescant prospera vobis
116 et liceat solio multiplicante frui
117 conjuge cum propria quae regnum moribus ornat
118 principis et culmen participata regit,
119 provida consiliis, sollers, cauta, utilis aulae,
120 ingenio pollens, munere larga placens,
121 omnibus excellens meritis Fredegundis opima,
122 atque serena suo fulget ab ore dies,

123 regia magna nimis curarum pondera portans,
 124 te bonitate colens, utilitate juvans.
 125 Qua pariter tecum moderante palatia crescunt,
 126 cujus et auxilio floret honore domus.
 127 Quaerens unde viro duplicentur vota salutis
 128 et tibi mercedem de Radegunde facit.
 129 Quae meritis propriis effulget, gloria regis
 130 et regina suo facta corona viro.
 131 Tempore sub longo haec te fructu prolis honoret
 132 surgat et inde nepos, ut renoveris avus.
 133 Ergo Creatori referatur gratia digne,
 134 et cole, rex, regem qui tibi praebet opem,
 135 ut servet cumuletque bonum : nam rector ab alto
 136 omnia solus habet qui tibi multa dedit.
 137 Da veniam, victor, tua me praeconia vincunt :
 138 hoc quoque quod superior, fit tibi major honor.
 139 Parvulus opto tamen, sic prospera vota secudent,
 140 ut veniant terris haec pia dona polis.
 141 Aera temperie faveant tibi, tempora pace,
 142 frugibus arva micent, foedera regna ligent.
 143 Edomites saevos, tuearis amore fideles,
 144 sis quoque catholicis religionis apex ;
 145 summus honor regis, per quem donantur honores,
 146 cui longaeva dies constet et alma fides.
 147 Regibus aurum alii aut gemmarum munera solvant :
 148 de Fortunato paupere verba cape.

ITEM AD CHILPERICUM ET FREDEGUNDEM REGINAM

F9_2 v.1 Aspera condicio et sors inrevocabilis horae !
 2 Quod generi humano tristis origo dedit,
 3 cum suadens coluber projecit ab ore venenum,
 4 morsu et serpentis mors fuit Eva nocens.
 5 Sumpsit ab ipso ex tunc Adam patre terra dolorem,
 6 et de matre gemens mundus amara capit.
 7 Praevaricando duo probro damnantur acerbo :
 8 ille labore dolet, haec generando gemit.
 9 Mors venit inde vorax, transmissa nepotibus ipsis,
 10 heredesque suos tollit origo nocens.
 11 Ecce hoc triste nefas nobis genuere parentes :
 12 coeperat unde prius, hinc ruit omne genus.
 13 Primus Abel cecidit miserando vulnere caesus,
 14 ac fraterna sibi sarcula membra fodent.
 15 Post quoque Seth obiit, sub Abel vice redditus isdem,
 16 et quamvis rediit non sine fine fuit.
 17 Quid Noe memorem, laudatum voce Tonantis ?
 18 Quem levis arca tulit, nunc gravis arva premit.
 19 Sic quoque Sem, Jafeth et justissima denique proles
 20 sancta et progenies tale cucurrit iter.
 21 Quid patriarcha Abraham vel Isac, Jacob quoque dignus,
 22 cum de lege necis nemo solutus adest ?
 23 Melchisedech etiam, Domini sacer ore sacerdos,
 24 Job quoque seu geniti sic abiere sui.
 25 Legifer ipse jacet Moyses Aaronque sacerdos,
 26 alloquiisque Dei dignus amicus obit.
 27 Successorque suus, populi dux inclitus Iesus,
 28 quos legitis libris occubuere patres.
 29 Quid Gedeon, Samson vel quisquis in ordine iudex ?
 30 Morti sub Domino iudice nemo fugit.

31 Israhelita potens David rex atque propheta
32 est situs in tumultu cum Salomone suo.
33 Esaias, Danihel, Samuel, Jonasque beatus,
34 vivens sub pelago, stat modo pressus humo.
35 Princeps clave Petrus, primus quoque dogmate Paulus,
36 quamvis celsae animae, corpora terra tegit.
37 Semine ab humano cui nullus major habetur,
38 vir baptista potens ipse Johannes obit.
39 Enoch Heliasque hoc adhuc spectat uterque :
40 qui satus ex homine est et moriturus erit.
41 Ipse Creator ovans surgens cito Christus ab umbris,
42 hic quia natus homo est, carne sepultus humo.
43 Quis, rogo, non moritur, mortem gustante salute ?
44 Dum pro me voluit hic mea vita mori ?
45 Dic mihi, quid poterunt Augusti aut culmina regum,
46 membra Creatoris cum jacuere petris ?
47 Brachia non retrahunt fortes neque purpura reges,
48 vir quicumque venit pulvere pulvis erit.
49 Nascimur aequales morimurque aequaliter omnes :
50 una ex Adam est mors, Christus et una salus.
51 Diversa est merces, funus tamen omnibus unum :
52 infantes, juvenes, sic moriere senes.
53 Ergo quid hinc facimus nunc te rogo, celsa potestas,
54 cum nihil auxilii possumus esse rei ?
55 Ploramus, gemimus, sed nec prodesse valemus :
56 luctus adest oculis, est neque fructus opis.
57 Viscera torquentur, lacerantur corda tumultu ;
58 sunt cari extincti, flendo cadunt oculi.
59 Ecce vocatur amor neque jam revocatur amator,
60 nos neque jam repetit quem petra mersa tegit.
61 Quamvis clamantem refugit mors surda nec audit,
62 nec scit in affectum dura redire pium.
63 Sed, nolo atque volo, migrabo cum omnibus illuc ;
64 ibimus hinc omnes, nemo nec inde redit,
65 donec in adventu Domini caro mortua vivat,
66 surgat et ex proprio pulvere rursus homo,
67 coeperit ut tegere arentes cutis uda favillas
68 et vivi cineres de tumulis salient.
69 Ibimus ergo omnes alia regione locandi,
70 ibimus ad patriam quos peregrina tenent.
71 Ne cruciari igitur, pie rex, fortissime princeps,
72 quod geniti pergunt quo petit omnis homo.
73 Quale placet figulo vas fictile, tale paratur ;
74 quando placet figulo, vasa soluta ruunt.
75 Quod jubet Omnipotens, non possumus esse rebelles,
76 cujus ad intuitum sidera terra tremunt.
77 Ipse creat hominem : quid dicere possumus ? Idem
78 qui dedit et recipit : crimina nulla gerit.
79 Illius ecce sumus figmentum et spiritus inde est :
80 cum jubet, hinc imus qui sumus ejus opus.
81 Si libet, in hora montes freta sidera mutat
82 cui sua facta favent : quid homo fumus agit ?
83 Rex precor ergo potens, age quod tibi maxime prosit,
84 quod prodest animae cum deitatis ope :
85 esto virile decus, patienter vince dolores :
86 quod non vitatur, vel toleretur onus.
87 Quod trahimus nascendo, sine hoc non transigit ullus :
88 quod nemo inmutat, vel ratione ferat.

89 Consuleas dominae reginae et amantis amatae,
 90 quae bona cuncta capit te sociante sibi ;
 91 materno affectu placare jubeto dolentem,
 92 nec simul ipse fleas nec lacrimare sinas.
 93 Te regnante viro tristem illam non decet esse,
 94 sed magis ex vestro gaudeat alta toro.
 95 Deprecor hoc etiam, vitam amplam conjugis optans,
 96 consuleas genitae, consuleas patriae.
 97 Talis erit populus qualem te viderit omnis,
 98 deque tua facie plebs sua vota metit.
 99 Denique Job natos septem uno triste sub ictu
 100 amittens laudes rettulit ore Deo.
 101 David psalmographus genitum cum amisit amatum,
 102 mox tumulo posuit, prandia festa dedit.
 103 Femina bis felix pia mater Machabeorum
 104 natos septem uno funere laeta tulit,
 105 prompta addens Domino : "Semper tibi gloria, rector,
 106 cum vis, Summe Pater, pignora mater habet".
 107 Unde Deo potius referatur gratia nostro,
 108 germine de vestro qui facit ire polo,
 109 eligit et gemmas de mundi stercore pulchras
 110 de medioque luto ducit ad astra throno.
 111 Massis vestra Deo placuit, quam in horrea condit
 112 dum spicis teneris dulcia grana metit.
 113 Non paleas generas, frumenta sed integra gignis,
 114 nec recremanda focis, sed recreanda polis ;
 115 praesertim qui sic sancto baptismate puri
 116 hinc meruere rapi, fonte lavante novi.
 117 Stantes ante Deum velut aurea vasa decoris
 118 aut quasi candelabris pulchra lucerna nitens,
 119 immaculatae animae, radiantes semper honore,
 120 vivorum retinent in regione locum
 121 inque domo Domini plantati lumine vernant,
 122 candida ceu rubeis lilia mixta rosis.
 123 Jusserit et Dominus cum membra redire sepulta,
 124 vestibit genitos tunc stola pulchra tuos
 125 aut palmata clamys rutilo contexta sub auro,
 126 et variis gemmis frons diadema gerit ;
 127 utentes niveam per candida pectora pallam,
 128 purpureamque togam fulgida zona ligat.
 129 Tunc pater et genetrix mediis gaudebitis illis,
 130 cum inter sidereos cernitis esse viros.
 131 Est tamen Omnipotens, Abrahae qui semen adauxit,
 132 vobis atque dabit Job quod amore dedit,
 133 restituens numerum natorum germine digno,
 134 progeniemque refert nobilitante fide.
 135 Qui in solium David Salomonis contulit ortum,
 136 pro vice germani cum redit ipse patri,
 137 ille tibi poterit de conjugate reddere natum,
 138 cui pater adludat, ubere mater alat,
 139 qui medius vestri reptans per colla parentum
 140 regibus et patriae gaudia longa paret.

ITEM AD CHILPERICUM ET FREDEGUNDAM

F9_3 v.1 Post tempestates et turbida nubila caeli,
 2 quo solet infesto terra rigere gelu,
 3 post validas hiemes ac tristia frigora brumae,
 4 flamine seu rapidi rura gravante noti,

5 succedunt iterum vernalia tempora mundo
 6 grataque post glaciem provocat aura diem.
 7 Rursus odoriferis renovantur floribus arva,
 8 frondibus arboreis et viret omne nemus ;
 9 dulce saporatis curvantur robora pomis,
 10 et redeunte sibi gramine ridet ager.
 11 Sic quoque jam, domini, post tristia damna dolentes
 12 vos meliore animo laetificate, precor.
 13 Ecce dies placidi revocant paschalia Christi,
 14 orbs quoque totus item per nova vota fremit.
 15 Gaudia plus faveant per celsa palatia regum
 16 et per vos famuli festa beata colant.
 17 Omnipotens nobis vestram addat in orbe salutem
 18 atque diu patriam culmina vestra regant.

EPITAPHIUM SUPER SEPULCHRUM DOMNI CHLODOBERTHI

F9_4 v.1 Flere monent populum crudelia funera regum,
 2 cum caput orbis humo maesta sepulchra tegunt.
 3 Hoc igitur tumulo recubans Chlodobertus habetur,
 4 qui tria lustra gerens raptus ab orbe fuit,
 5 de proavo veniens Chlodovecho celsa propago,
 6 Chlodacharique nepos Chilpericique genus ;
 7 quem de regina sumpsit Fredegunde jugali,
 8 auxerat et nascens francica vota puer.
 9 Quo patris et patriae dum spes adolesceret ampla,
 10 accelerante die sors inimica tulit.
 11 Sed cui nulla nocent queruli contagia mundi,
 12 non fleat ullus amor quem modo cingit honor.
 13 Nam puer innocuus vivens sine crimine lapsus
 14 perpetui regni se favet arce frui.

EPITAPHIUM DAGOBERTI

F9_5 v.1 Dulce caput, populi, Dagoberte, perennis amore,
 2 auxilium patriae, spes puerilis obis,
 3 germine regali nascens generosus, et infans
 4 ostensus terris, mox quoque rapte polis,
 5 belligeri veniens Chlodovechi gente potenti,
 6 egregii proavi germen honore pari,
 7 Regibus antiquis respondens nobilis infans,
 8 Chilpericique patris vel Fredegunde genus.
 9 Te veneranda tamen mox abluit unda lavacri :
 10 hinc licet abreptum lux tenet alma throno.
 11 Vivis honore ergo et, cum iudex venerit orbis,
 12 surrecturus eris fulgidus ore nitens.

AD GREGORIUM EPISCOPUM PRO METRIS SAPPHICIS

F9_6 v.1 Pollente eloquio pervenit epistula cursu,
 2 sed voluit voto tarda venire meo.
 3 Nec tamen offendit, quamvis remorata requirit,
 4 quem tenet adstrictum mente ligante virum,
 5 cum cupiam talem qualis fuit ille Nazanzo
 6 Gregorium ut repares dogmate, sede parens.
 7 Quaeque injunxisti, pater, ecce poemata misi,
 8 et mihi proficient si tibi, care, placent.
 9 Hoc mandas etiam quo Sapphica metra remittam :
 10 da veniam, modici dum seges urguet agri.
 11 Dum meto, da spatium : tibi mox parere parabo ;
 12 si saturer fructu, fors meliora cano.

13 Condere si valeo, cum metro mitto libellum ;
14 quae cape tu voto quo tibi dictat amor.

ITEM AD GREGORIUM EPISCOPUM

F9_7 v.1 Corde jucundo, calamo venusto
2 litteras mittis cupiente voto,
3 blanda conscribens serie salutis,
4 care Gregori :
5 exigens nuper nova me movere
6 metra quae Sappho cecinit decenter,
7 sic Dioneos memorans amores,
8 docta puella.
9 Pindarus Graius, meus inde Flaccus
10 Sapphico metro modulante plectro
11 molliter pangens citharista, blando
12 carmine lusit.
13 Cur mihi injungis lyricos melodes,
14 voce qui rauca modo vix susurro ?
15 Eloqui chordis mea dextra nescit
16 pollice dulci.
17 Qui vel haec olim mihi si fuissent
18 nota prudentum docili Camena,
19 per tot oblitus fueram benignam
20 tempora Musam :
21 Cum labor doctis sit, ut ista pangant
22 dogma nec quisquam rapienter intrat
23 et satis constant resonare paucis
24 metra poetis.
25 Non leve est nautae rate transfretare
26 vincere aut vastum pelagus natatu ;
27 vix procelloso repetunt sub austro
28 carbasa portum.
29 Arduum nobis iter et profundum,
30 quo jubes pergi : tamen ibo votis ;
31 si minus possum pedibus viare,
32 ducor amore.
33 Praestitit, pastor, tua mi voluntas
34 codicem farsum tumido coturno
35 quemque paupertas mea vix valebat
36 tangere sensu.
37 Regiis verbis humili repugnat
38 divites versus inopi recusans
39 et mihi Mopso reserare nolens
40 docta sophistis,
41 disputans multum variante miltho
42 quaeque sunt rythmis vel amica metris,
43 Sapphicum quantum trimetrumve adornet
44 dulcis epodus.
45 Multus auctorum numerus habetur
46 plura dicentum modulo canoro
47 quae volens isto memorare metro
48 nomina frango.
49 Maxime qui nunc resolutus arte
50 postque bis denos loquor istud annos,
51 clara quod scripsit citharam terendo
52 Lesbia virgo.
53 Scire qui vult haec, Libycas harenas
54 ante per litus numerare tendat

55 cuncta quam metris ratione cauta
 56 carmine cingat.
 57 Nam moras feci, remoratus ipse,
 58 pluribus causis modo hinc et inde,
 59 nec vacans legi placida quiete
 60 dulce sophistae.
 61 Scito nam, pastor, nec adhuc cucurri
 62 ordinem totum religens libelli ;
 63 sed satis, crede, est, satis est amanti
 64 sola voluntas.
 65 Ergo laxatus celeri volatu
 66 ad patrem sacrum comitante voto
 67 et sibi nostrum renovans amorem
 68 perge, libelle.
 69 Forte non possum piger ire gressu
 70 quo vocat blandus meus ille vultus :
 71 in vicem nostram, rogo te, libelle,
 72 redde salutem.
 73 Sit memor filii pater, ore dulci
 74 hunc precans qui nos, mare et astra fecit,
 75 ac piis votis bene se colentem
 76 pectore servet ;
 77 feminae carae, sibi mente nexae
 78 quem colunt, Agnes, Radegundes idem ;
 79 sicut exposcunt vice filiarum,
 80 solve salutem.
 81 Adde Justinam pariter precantem,
 82 nempe commendans famulam propinquam,
 83 et refer quantum sibi cara profert
 84 neptis honorem.
 85 Haec tibi promptus prece voce mente
 86 solvo, vix implens, ego pauper arte,
 87 sed tamen largo refluens amore,
 88 care Gregori.

AD BAUDOALDUM EPISCOPUM

F9_8 v.1 Summe sacerdotum, bonitatis opima facultas,
 2 culmen honore tuo, lumen amore meo,
 3 officiis venerande sacris, pietatis alumne,
 4 pignore amicitiae corde tenende meae,
 5 florens in studiis et sacra in lege fidelis,
 6 semper agens animae dona futura tuae :
 7 te, pater, ergo precans terram freta sidera testor,
 8 ut velis ore sacro me memor esse tuum.

AD SIDONIUM EPISCOPUM

F9_9 v.1 Reddita ne doleas, felix Magantia, casus :
 2 antistes rediit qui tibi ferret opem.
 3 Ne maerore gravi lacrimans orbata jaceres,
 4 te meruisse fame [lacune]
 5 porrigit ecce manum genitor Sidonius urbi,
 6 quo renovante loco prisca ruina perit ;
 7 jura sacerdoti sacro moderamine servans,
 8 per cuius studium crevit et ipse gradus.
 9 Parturis assidue gravidos, ecclesia, fructus,
 10 quam vir apostolico junctus amore regit :
 11 suscipit heredes caelesti germine natos,
 12 tali nupta viro quando marita placet.

13 Te vigili custode lupus non diripit agnos,
 14 te pascente gregem non ovis ulla perit :
 15 cautius in tuto per mitia pascua ducis,
 16 toxica ne noceant, florea rura paras.
 17 Sis cibus ut populi, placide jejunia servas
 18 et satias alios subtrahis unde tibi.
 19 Nudos veste tegis captivo vincula solvens,
 20 deposito reddens libera colla jugo.
 21 Exulibus domus es, set et esurientibus esca :
 22 felix cui Christus debitor inde manet !
 23 Te doctrina probum, prudentia sacra modestum
 24 fecit et eloquio vincere mella tuo.
 25 Templata vetusta novans specioso fulta decore
 26 inseris hinc populis plus in amore Deum.
 27 Ut plebem foveas et Rheni congruis amnes :
 28 quid referat terris qui bona praebet aquis ?
 29 Hic quod fana micant, a te instaurata quod extant,
 30 vivis in aeterno laude fluente tibi.
 31 Haec habeas longos meritorum fruge per annos
 32 et crescente diu de grege vota feras.

AD RAGNEMODUM EPISCOPUM

F9_10 v.1 Summe pater patriae, dulci mihi nomine Rucco,
 2 interiora mei cordis amore tenens :
 3 quicquid amicitiae veteris collegimus ambo
 4 crescit in affectum semper, opime, meum.
 5 Nam mihi nulla meos oblivio tollit amantes :
 6 ante sit extremum, quam mihi desit amor.
 7 Unde, beate pater, properans dependo salutem,
 8 optans longinquo te superesse gradu.
 9 Hinc etiam genitae reddunt tibi pectore grates
 10 munere pro niveo marmore de Pario :
 11 quae, quotiens epulae disco tribuuntur in illo,
 12 in doni specie te pietate vident.
 13 Nam pro gemmarum serie tibi reddat honorem
 14 cui data proficiunt crux veneranda throno.

AD DROCTOUEUM ABBATEM

F9_11 v.1 Vir venerande, sacer meritis et honore colende,
 2 Droctovee, mihi semper amore pater,
 3 qui de discipulis Germani jure beati
 4 norma magisterii factus es ipse sui ;
 5 cujus pontificis sacra per vestigia currens
 6 despicias hic mundum, dum cupis ire polo :
 7 perge libenter iter caeli mansurus in orbe,
 8 et pro me famulo, quaeso, precato deum.

AD FARAMODUM REFERENDARIUM

F9_12 v.1 Dulcis amice mihi, memorabile nomen amantis,
 2 promptus in officiis vir, Faramode, bonis,
 3 si non ipse adii, te pagina missa salutet
 4 solvat et obsequium quod minus ipse gero.
 5 Commendesque libens domnis me regibus oro
 6 et referas grates pro pietatis ope.
 7 Inpenso affectu me pagina vestra requirat,
 8 hoc remeante tamen, redde, benigne, vicem.

AD LUPUM ET VUALDONEM DIACONOS

F9_13 v.1 Corde parentali, jugi pietate colendi,
 2 hinc Lupe blande mihi, Vualdo vel inde sacer,
 3 ut bonitate pari simul estis honore ministri,
 4 sic mihi consimili semper amore rati.
 5 Quod valeo facio : absens vel dependo salutem :
 6 si non possum oculis, vos peto litterulis.
 7 Pontifici summo nos commendate, precamur,
 8 regibus et domnis ferte salutis opus.
 9 Droctoveo dulci, clero et concivibus, oro,
 10 quod praesens facerem, vos adhibete vicem.
 11 Mummolus egregius veneretur Caesariusque
 12 et Constantino me memorate meo.

DE BASILICAE SANCTI LAURENTI TRABE

F9_14 v.1 Laurenti, merito flammis vitalibus uste,
 2 qui fervente fide victor ab igne redis,
 3 vir dilecte Deo terreno in corpore quondam
 4 tunc quoque sidereus jam tibi sensus erat.
 5 Qui potuisti oculos tactu revocare sepultos,
 6 rursus et in vacua fronte referre diem,
 7 luminis extinctas iterum accendisse lucernas
 8 credimus haec signo te faciente crucis :
 9 addita nunc etiam populis miracula praestas,
 10 ut fidei tribuas indubitanter opem.
 11 Dum tua templa novant breviori robore plebes,
 12 creveruntque trabes crevit et alma fides :
 13 stipite contracto tua se mercede tetendit.
 14 Quantum parva prius, postea caesa fuit,
 15 crescere plus meruit succisa securibus arbor
 16 et didicit sicca longior esse coma.
 17 Unde recisa fuit, populis fert inde salutem :
 18 si venit intrepidus, lumina caecus habet.
 19 Tu levita sacer, poena purgate fideli,
 20 unde prius flammas, hinc modo lumen habes.
 21 Visa his temporibus venerandi antistitis acta,
 22 sed tamen aeterno sunt memoranda die.

DE DOMO LIGNEA

F9_15 v.1 Cede parum, paries lapidoso structe metallo :
 2 artificis merito praefero ligna tibi.
 3 Aethera mole sua tabulata palatia pulsant,
 4 quo neque rima patet consolidante manu.
 5 Quicquid saxa, sablo, calces, argila tuentur,
 6 singula silva favens aedificavit opus,
 7 altior inmitior quadrataque porticus ambit
 8 et sculpturata lusit in arte faber.

AD CHRODINUM DUCEM

F9_16 v.1 Inclite dux, meritis totum vulgate per orbem,
 2 quem nimis egregium splendida fama refert,
 3 non ego praeteream praeconia celsa, Chrodine,
 4 ne videar solus magna silere bonis.
 5 Itala terra tibi, pariter Germania plaudunt,
 6 laus tua cunctorum semper in ore sonat.
 7 Clarus ab antiquis, digno generosior ortu,
 8 regibus et patriae qui placiturus eras.
 9 Te tutorem alii nutritoremque fatentur

10 et fit certamen de pietate tua.
 11 Ut habeant alii, nulli tua dona recusas :
 12 tu tibi plus auges quas bene fundis opes.
 13 Cui possis praestare, libens exquiris, et optas,
 14 ut sis apud cunctos, hos facis esse tuos.
 15 Es generale bonum, nulli gravis, omnibus aequus,
 16 justitiae socium nulla rapina tenet.
 17 Mitis in alloquio, placidus gratusque, modestus,
 18 omnia cui data sunt, ut decus omne geras.
 19 Gentibus adstrictus, Romanis carus haberis,
 20 felix qui populis semper in ore manes.

LIBER DECIMVS

EXPOSITIO ORATIONIS DOMINICAE

F10_1 [oratio soluta]

AD VIRUM INLUSTREM SALUTAREM

F10_2 [oratio soluta]

ITEM ALIA

F10_3 [oratio soluta]

ITEM ALIA

IN NOMINE DOMINI NOSTRI IESU CHRISTI INCIPIUNT UERSUS DE ORATORIO ARTANNENSI
 F10_5 v.1 Quisquis ad haec properas venerandi limina templi
 2 dona precaturus quae dat amore Deus :
 3 haec in honore sacri Gabrielis culta coruscant,
 4 qui pia iussa Dei rite minister agit,
 5 Zachariae veniens qui nuntia detulit astris,
 6 Elisabeth datus est quando propheta potens,
 7 quique Redemptorem e caelo regem omnipotentem
 8 post ait ut terris ventre Maria daret.
 9 Quae sacer antistes nova tecta Gregorius effert,
 10 ut sibi caelestes restituantur opes.

IN NOMINE DOMINI NOSTRI IESU CHRISTI UERSUS AD ECCLESIAM TORONICAM

F10_6 v.1 Emicat altithroni cultu venerabile templum
 2 egregium meritis, nobilis arcis apex,
 3 quo propria tunica dum operit Martinus egentem,
 4 gestorum serie fulgida signa dedit.
 5 Namque idem antistes, sacra dum mysteria tractat,
 6 lumina gemmarum est visus habere manu,
 7 ac de veste fuit quantum sua dextera nuda
 8 tantum membra sibi gemma corusca tegit.
 9 Sanctus item Domini almum dum benediceret altar,
 10 de capite est visus flammeus ire globus.
 11 Quae modo templa sacer renovata Gregorius effert
 12 et rediit priscus cultus honorque suus.
 13 Fulgida praecipui nituerunt culmina templi
 14 postque usus veteres praemicat aula rudis,
 15 in senium vergens, melius revirescere discens,
 16 deruta, post casum firmitus acta situ.
 17 Martini auxiliis operando Gregorius aedem
 18 reddidit iste novus quod fuit ille vetus.
 19 Clara supercilio Domini delubra nitescunt ;

20 alma licet merito, sunt quoque celsa jugo ;
21 invida subruerat quam funditus ipsa vetustas,
22 ut paries liquidis forte solutus aquis,
23 quam pastor studuit renovare Gregorius aedem
24 nec cecidisse dolet quae magis aucta favet.
25 Ambianis tremulum cernens Martinus egenum
26 dimidiae clamidis mox ope membra tegit.
27 Sed coram angelicis turmis se hanc nocte silenti
28 pauperis in specie Christus habere refert.
29 O sacer antistes, meritis referende sub astris !
30 Unde tegis nudum, hinc tua palla Deum.
31 Inter opima Deus flgulus quae vascula fecit
32 Martinus meritis vas in honore nitet.
33 Leprosi maculas pretiosa per oscula purgans,
34 cui quod ab ore dedit pax medicina fuit.
35 Ulcera morborum curans sic fauce beatus,
36 quod Jordanis agit tacta saliva facit.
37 Quam generosa fides Martini in saecula civis !
38 Qui quocumque fuit, mors ibi perdit iter.
39 Denique cum extincto caticuminus ore jaceret,
40 se superextendens effugit arma necis.
41 Sic viduae genito laqueato, deinde reducto ;
42 est vir ubi iste Dei, non licet ire mori.
43 Fanaticam pinum sanctus succidere cogens,
44 justum ibi subposuit rustica turba premi.
45 Caesa secure arbor cum jam daret alta ruinam,
46 ad crucis imperium est ire coacta retro.
47 Quis vigor hic fidei, validae dum pondera pini
48 quo natura negat crux facit ire viam !
49 Serpentis morsu tumido suprema regenti
50 hic digitum ut posuit, pestis iniqua fluit
51 collecto morbo huc et ab ulcere pollice tracto,
52 dumque venena cadunt erigit ille caput.
53 Unguentumque novum, digitis traxisse venenum
54 et tactu artificis sic superasse neces !
55 Dum latro extinctus falso coleretur honore,
56 voce huc Martini cogitur umbra loqui,
57 publice se referens scelerum pro mole peremptum
58 se quoque nec justum, sed magis esse reum.
59 O vox sancta, loqui defuncta cadavera cogens,
60 cui post fata jacens dat sua verba cinis !
61 Pergeret in fluvium dum vipera lapsa natatu
62 et prope litorei tangeret ora soli,
63 Martini imperio liquidas revocatur ad undas
64 transactumque viae lassa recurrit iter.
65 Quantus amor Domini tali sub corde calebat,
66 quando venena potens ipsa retorquet aquis !
67 Martini meritis aliis quoque febre crematis
68 sudores refluos pagina sicca dabat ;
69 unde salutifero medicamine charta fovebat
70 atque graves ignes littera tinguunt aquis.
71 Gratia quanta Dei hujus sermone rigabat,
72 febre ubi succensis fons suus ibat apex !
73 Alme, decus rerum, pie, summe, Gregorius, arcis
74 tu cui das sedem dat tibi templa sacer.
75 Nam veteri fuerant haec funditus eruta lapsu
76 tecta, labore novo quae modo culta cluunt.
77 Jure potestatis cui Tu, bone conditor orbis,

78 haec danti in terris culmina redde polis.
 79 Victa vetustatis per tempora culminis arca
 80 diruit, ut melior surgeret aula solo,
 81 quo sacra Martinus Domini mysteria tractans
 82 a capite igniferum misit in astra globum.
 83 Ne tamen ipsa ruens miserando fine jaceret,
 84 pontificem meruit qui sibi ferret opem.
 85 Quae rediviva micans instante labore Gregori,
 86 decidua in senio, floret honore novo.
 87 Fundamenta igitur reparans haec prisca sacerdos
 88 extulit egregius quam nituere prius.
 89 Nunc placet aula decens, patulis oculata fenestris,
 90 quo noctis tenebris clauditur arce dies.
 91 Lucidius fabricam picturae pompa perornat,
 92 ductaque qua fucis vivere membra putes.
 LEPROSUM PURGAUIT
 93 Pannoniae satio misit tibi, Gallia, fructum
 94 gignens caelestem terra maligna dapem,
 95 Martinum inlustrem meritis, qui munere divo
 96 culmen in aethera sede senator habet.
 97 Qui leprae maculas medicata per oscula purgat,
 98 curat et infectum pura saliva virum.
 99 Ad fluvium Domini cui non fuit ire labore :
 100 quod Jordanis habet, sanctus ab ore dedit.
 101 Qui sacer ipse mihi te, pastor, agente, Gregori,
 102 Fortunato adimat tot maculosa reo.
 CLAMES DIUISA
 103 Dum clamidem Martinus inops divisit egeno,
 104 Christus ea memorat se bene veste tegi.
 105 Dives paupertas, Dominum quae texit amictu,
 106 cui Deus occurrit qui dedit astra faber !
 TUNICAM DEDIT
 107 Noscere qui mavis Martini gesta beati,
 108 hic poteris breviter discere mira viri.
 109 Denique cum tunicam sacer ipse dedisset egenti
 110 ac sibi pars tunicae reddita parva foret,
 111 quod non texerunt manicae per brachia curtae
 112 visa tegi gemmis est manus illa viri.
 113 O nimium felix cui contigit in vice lanae
 114 nobilium lapidum lumine membra tegi,
 115 ut, cum adhuc cinere adpersus foret atque favillis,
 116 artifice angelico gemmeus iret homo !
 MORTUOS SUSCITAVIT
 117 Quid Deus in famulis operetur opimus amator,
 118 Martini gestis magna probare potes :
 119 ducere qui meruit de morte cadavera vitae
 120 rettulit atque diem reppulit unde necem.
 PINUS EXCISA
 121 Dum caderet Martinum arbor pressura beatum,
 122 mox facit ipse crucem, pinus abacta redit.
 123 Quis non virtuti divinae commodet aurem,
 124 dum trabe conversa dant quoque ligna fugam ?
 IDOLA PROSTRATA
 125 Idola dum cuperet Martinus sternere fulta,
 126 conterit haec caelis magna columna ruens.
 127 Auxilium ad justis dignando militat aether :
 128 quanta fides cujus currit ad arma polus !
 FALSUS MARTYR

129 Forte colebatur dum quis pro martyre latro,
 130 Martini adventu se probat esse reum.
 131 Virtutis merito fidei radiante corusco
 132 nec tacet extincti nec latet umbra rei.

AD CHILDEBERTUM REGEM ET BRUNICHILDEM REGINAM, DE NATALI SANCTI MARTINI
 F10_7 v.1 Praecelsis dominis famulor dum corde pusillus
 2 fluminibusque vagis per vada pergo rate :
 3 ecce supervenit venerandi in saecula civis
 4 Martini meritis luce perenne dies.
 5 Qui modo de Gallis totum mire occupat orbem,
 6 et virtus pergit quo pede nemo valet.
 7 Qui velut alta pharus lumen pertendit ad Indos,
 8 quem Hispanus Maurus Persa Britannus amat.
 9 Hunc Oriens, Occasus habet, hunc Africa et Arctus :
 10 Martini decus est quo loca mundus habet ;
 11 quique per Oceani discurrit marginis undas :
 12 omnibus ut praestet, circuit orbis iter.
 13 Per cinerem ascendens, per dura cilicia caelos
 14 stat modo gemmatus, pauper in orbe prius,
 15 quo patriarcharum decus est radiantque prophetae,
 16 quo est sacra turba senum bis duodena patrum,
 17 inter apostolicum numerum rutilante senatu
 18 quo sedet ipse throno, rex sibi Christus amor,
 19 quo excellit cum clave Petrus, cum dogmate Paulus,
 20 fulget et in reliquis palma corona fides,
 21 quo loca martyribus vernanti lumine florent
 22 atque libro vitae est scriptus honore cruor,
 23 quo confessores gemmata palatia complent
 24 aeternumque tenent aurea tecta diem,
 25 stat quoque post lacrimas ubi nunc Radegundis opima,
 26 forsitan et Eugeniam nunc tenet illa manu.
 27 Hos inter Martinus habet diademata pulcher
 28 atque sacris lumbis fulgida zona viret,
 29 cantat et egregios Christi de morte triumphos
 30 atque resurgenti plaudit amore Deo.
 31 Hunc quoque Martinum colitis quem, regna, patronum,
 32 vos hunc in terris, vos memor ille polis :
 33 vos intra angelicas turmas canat ille sub astris,
 34 cui vos ante homines fertis honore diem.
 35 Nomina vestra legat patriarchis atque prophetis :
 36 cui hodie in templo diptichus edit ebur.
 37 Reddat apostolicos proceres reliquosque patronos
 38 quem vos hic colitis vel pia festa datis.
 39 Pergat et ad Christum pro vobis ille precator
 40 cui vos in templis vota precando datis.
 41 Ante poli referat sua haec sollemnia regem,
 42 dentur ut hinc vobis, regna, salutis opes.
 43 Deputet et Dominus vestrum hunc esse patronum,
 44 ut modo qui colitur vos colat hujus amor.
 45 Qui dedit hic habitans miracula plurima terris,
 46 distribuatur vobis hic quoque mira potens.
 47 Cujus gemmata est tunc dextera visa beati,
 48 vos simul et vestros protegat illa manus.
 49 Qui tunc promeruit revocare cadavera vitae,
 50 hic quoque pro vestra dona salute ferat.
 51 Qui percusso homini abstraxit de carne venenum,
 52 noxia de vobis ipse venena vetet.

53 Qui serpentis iter fecit revocare retrorsum,
 54 ipse graves casus hinc fuget ire retro.
 55 Qui de peste domum salvam dedit esse Lyconti,
 56 haec domus incolomis floreat hujus ope.
 57 Cujus opima chlamys tremebundum texit egenum,
 58 ejus apostolici vos tegat ala viri.
 59 Qui viduae matri revocavit ad ubera natum,
 60 ipse tibi haec tribuat pignora, mater, ava,
 61 ut Childebertus maneat cum prole novella,
 62 rex sua regna tenens et nova regna trahens,
 63 de genita ut videas genetrix, ut dulcius optas,
 64 deque nuru cara quod tua vota rogant.
 65 Unde hic felices habeant sua festa fideles
 66 et Domini famulis sitis honoris apex,
 67 quo tibi plus libeat, Brunichildis, habere patronum,
 68 quando domum dominus servat in orbe pius.
 69 Sic quoque te erudiat, regat et sic tramite ducat,
 70 actibus ipsa piis ut sibi juncta mices.

AD EOSDEM IN LAUDE

F10_8 v.1 Si praestaretur praeconia pandere regum,
 2 non mihi sufficeret nocte dieque loqui,
 3 qualiter hic populus dominorum pendit amore
 4 et vestris oculis lumina fixa tenet.
 5 Vos quibus et speculum et lux et dulcedo manetis,
 6 carum ornamentum his simul estis, honos.
 7 Praecipuum donum placidum et placabile regnum,
 8 ac vestro in statu est culmen in orbe pium.
 9 Hicque parentela et patria et tutela coruscat,
 10 hic decus atque gradus, hic pietatis opus,
 11 hic tranquilla dies, hic spes jucunda fideli,
 12 postque Deum in vobis dona salutis habent.
 13 Hic ego cum populo mea vota et gaudia jungo,
 14 quae pius amplificans crescere Christus agat.
 15 Praestet cura Dei vos longa in sede tueri,
 16 caelesti ac dono regna tenere diu.
 17 Adquiratis adhuc nova vel possessa regatis
 18 ac pie participes has foveatis opes,
 19 ut tibi quae floret de nato et germine, messem
 20 maturam videas, mater honore micans ;
 21 sic ut et ex genito genitisque nepotibus amplis
 22 altera progenies inclita detur avae.
 23 De Childeberto dulcedine flore salute
 24 fructum habeas genetrix, plebs sua vota videns.
 25 De nata atque nuru cumulet tibi dona Creator
 26 cumque pio merito stes placitura Deo.
 27 Hic ego promerear rediens dare verba salutis,
 28 congaudens dominis pamulus ipse piis :
 29 prospera sint regum, populorum gaudia crescant ;
 30 exultet regio, stet honor iste diu.

DE NAVIGIO SUO

F10_9 v.1 Regibus occurrens ubi Mettica moenia pollent,
 2 visus et a dominis ipse retentor equo.
 3 Musellam hinc jubeor percurrere navita remo,
 4 accelerans tremulis pergere lapsus aquis.
 5 Ascendensque ratem gracili trabe nauta cucurrit,
 6 nec compulsa notis prora volabat aquis.

7 Interea locus est per saxa latentia ripis :
8 litore constricto plus levat unda caput ;
9 huc proram implicitam rapuit celer impetus actam,
10 nam prope jam tumidas ventre bibebat aquas.
11 Ereptum libuit patulos me cernere campos
12 et fugiens pelagus ruris amoena peto.
13 Gurgite suscipior subter quoque fluminis Ornae,
14 quo duplicata fluens unda secundat iter.
15 Inde per exclusas cauta rate pergimus undas,
16 ne veluti pisces me quoque nassa levet.
17 Inter villarum fumantia culmina ripis
18 pervenio qua se volvere Sura valet.
19 Inde per extantes colles et concava vallis
20 ad Saram pronis labimur amnis aquis.
21 Perducor Triverum qua moenia celsa patescunt,
22 urbs quoque nobilium nobilis aequae caput.
23 Ducimur hinc fluvio per culmina prisca senatus,
24 quo patet indiciis ipsa ruina potens.
25 Undique prospicimus minitantes vertice montes,
26 nubila quo penetrans surgit acuta silex,
27 qua celsos scopulos praerupta cacumina tendunt
28 hispidus et tumulis crescit ad astra lapis.
29 Nec vacat huc rigidis sine fructibus esse lapillis :
30 denique parturiunt saxaque vina fluunt.
31 Palmite vestitos hic respicis undique colles
32 et vaga pampineas ventilat aura comas ;
33 cautibus insertis densantur in ordine vites
34 atque supercilium regula picta petit ;
35 culta nitent inter horrentia saxa colonis ;
36 in pallore petrae vitis amoena rubet,
37 aspera mellitos pariunt ubi saxa racemos,
38 et cote in sterili fertilis uva placet
39 quo vineta jugo calvo sub monte comantur,
40 et tegit umbrosus sicca metalla viror ;
41 inde coloratas decerpit vinitor uvas,
42 rupibus adpensis pendit et ipse legens.
43 Delicias oculis habui dapibusque cibatus,
44 haec jucunda tenens, navita regna sequens.
45 Hinc quoque ducor aquis qua se rate Contraua complet,
46 quo fuit antiquum nobilitate caput.
47 Tum venio qua se duo flumina conflua jungunt,
48 hinc Rhenus spumans, inde Musella ferax.
49 Omne per illud iter servibant piscibus undae
50 regibus, et dominis copia fervet aquis.
51 Ne tamen ulla mihi dulcedo deesset eunti,
52 pascebar Mysis, aure bibente melos :
53 vocibus excussis pulsabant organa montes
54 reddebantque suos pendula saxa tropos.
55 Laxabat placidos mox aerea tela susurros,
56 respondit cannis rursus ab alpe frutex.
57 Nunc tremulo fremitu, modo plano musica cantu
58 talis rupe sonat qualis ab aere meat.
59 Carmina divisas jungunt dulcedine ripas,
60 collibus et fluviis vox erat una tropos.
61 Quo recreet populum, hoc exquirat gratia regum,
62 invenit et semper quo sua cura juvet.
63 Antonnacensis castelli promptus ad arces
64 inde peraccedens sarcina pergo ratis.

65 Sint licet hic spatiis vineta in collibus amplis,
 66 altera pars plani fertilis extat agri :
 67 plus tamen illa loci speciosi copia pollet,
 68 alter quod populis fructus habetur aquis.
 69 Denique dum praesunt reges in sedibus aulae
 70 ac mensae officio prandia festa colunt,
 71 retibus inspicitur quo salmo fasce levatur,
 72 et numerat pisces, cum sit in arce sedens ;
 73 rex favet in mensa, resilit dum piscis ab unda,
 74 atque animos reficit quod sua praeda venit.
 75 Illuc fausta videns, huc laeta palatia reddens,
 76 pascens ante oculis post fovet ipse cibus.
 77 Praesentatur item mensae Rheni advena civis,
 78 turbaque quo residens gratificatur edens.
 79 Ista diu Dominus dominis spectacula praestet,
 80 et populis dulces detis habere dies :
 81 vultibus ex placidis tribuatis gaudia cunctis,
 82 vester et ex vestris laetificetur apex.

VERSUS DE ORATORIO ARTANNENSI

F10_10 v.1 Magna beatorum retinet haec terra talenta,
 2 divinis opibus dives habetur humus.
 3 Pars dextra angelico Gabrielis honore coruscat,
 4 gaudia qui mundo detulit ore sacro ;
 5 quando aeternalem concepit Virgo salutem,
 6 dona Redemptoris nuntius iste ferens.
 7 Laeva est parte lapis tumuli, quem corpore Christus
 8 pressit morte brevi, victor eundo Patri.
 9 Hic quoque reliquiis micat ille Gregorius almis,
 10 qui probus igne redit nec pice mersus obit.
 11 Sunt etiam Cosmas, Damianus et ipse, salubres
 12 non ferro artifices, sed medicante fide.
 13 Est Julianus item, gladio jugulatus amico,
 14 plebs quem Arverna colens arma salutis habet ;
 15 Martinusque sacer, retinet quem Gallicus orbis,
 16 cujus Christum operit dimidiata clamis,
 17 se tunica spolians nudum qui vestit egenum,
 18 unde datae sibi sunt alba topazus onyx,
 19 quae meruere aliqui hoc in corpore cernere sancti,
 20 gemmarumque sonus quod patefecit opus.
 21 Additur hic meritis cum nomine Victor opimis,
 22 munere martyrii qui tenet alta poli ;
 23 hic veteris virtute viri nova palma Niceti,
 24 urbem Lugdunum qui fovet ore, sinu.
 25 Horum pastor opem corde, ore Gregorius orat,
 26 vivat ut altithrono vir sine fine Deo.

IN NOMINE DOMINI NOSTRI IESU CHRISTI VERSUS FACTI IN MENSA IN UILLA SANCTI MARTINI

F10_11 v.1 Cum videam citharae cantare loquacia ligna
 2 dulcibus et chordis admodulare lyram
 3 (quo placido cantu resonare videntur et aera)
 4 mulceat atque aures fistula blanda tropis,
 5 quamvis hic stupidus habear conviva receptus,
 6 et mea vult aliquid fistula muta loqui.
 7 Ecce dies, in quo Christus surrexit ab imo,
 8 infernae legis rumpere vincla potens,
 9 quando et vincitorum lacrimantia milia solvit
 10 et revomunt multos Tartara fracta viros.

11 Additur hic aliud, quod Martini aula beati
 12 emicat haec ubi nunc prandia festa fluunt,
 13 qui valuit gestis aures pulsare Tonantis,
 14 obtinet et meritis quod petit alta fides,
 15 qui pie restituit defuncta cadavera vitae
 16 atque Dei prompte praebet amicus opem ;
 17 cui successor ovans modo rite Gregorius extans,
 18 ille quod acquirit, hic regit ore, fide.
 19 Qui rogat hic praesens, alibi licet insidet absens,
 20 exhibet atque cibos pastor in urbe bonus.
 21 Nunc igitur celebrate diem sollemniter omnes
 22 quos Deus omnipotens hic dedit esse pares,
 23 quos sibi Martinus collegit amore benignus
 24 et facit ecce escas hic epulare suas.
 25 Ergo sub incolomi Childebertho ac Brunichilde,
 26 quos tribuit celsos regna fovere Deus,
 27 vos quos miserunt populum moderare fidelem
 28 et relevare inopes, si quis et extat egens ;
 29 ac bona de dominis noscendo et agendo benigna
 30 sint quoque laetitiae pabula vestra fide,
 31 quos invitavit Martini mensa beati,
 32 sumite gaudentes quod dat amore dies.
 33 Quae bonus antistes noscendo Gregorius expers
 34 plaudat et haec populus gaudia vestra canat.
 35 Cujus et haec domus est a Christo exoret amator,
 36 reges, vos, populos ut tegat arce Deus.

PRO PUELLA A IUDICIBUS CAPTA

a) *AD GREGORIUM EPISCOPUM*

F10_12 v.1 Exemplo Domini mihi vel venerabilis orbi,
 2 qui minimas non vis perdere, pastor, oves,
 3 sollicitis animis curam per pascua tendens,
 4 ne desint caulis, circuis ore greges.
 5 Hic igitur gerulus genitam flens impie demptam,
 6 captivam subolem tempore pacis habens,
 7 Martinique pii successor honore, Gregori,
 8 qui pater es populi, hanc, rogo, redde patri.
 9 Jugiter ille sacris meritis inluminat orbos :
 10 orbato hanc patri redde videndo diem.

b) *ITEM PRO EADEM RE AD ROMULFUM*

11 Si rapidis oculis te semper, amice, viderem,
 12 sic quoque vix avidum me satiaret amor ;
 13 qui, si praesentis non possum cernere vultum,
 14 te mihi vel scriptis care, saluto libens.
 15 Hunc etiam famulum commendo, benigne, verenter,
 16 et si justa petit, hunc tua lingua juvet,
 17 qui tortus graviter genitam sibi luget abactam,
 18 per vos ut redeat filia clausa, rogat,
 19 paupere ut audito, dum estis medicina dolenti,
 20 et vestris curis sit pia cura Deus.

c) *ITEM PRO EADEM RE AD GALLIENUM*

21 Officiis exerte tuis, moderamine sollers,
 22 sollicitus studiis, utilitate, comes :
 23 more mihi solito, dulcis, tibi debita solvo ;
 24 qui colo devinctus, reddo salutis opus.
 25 Sit commendatus homo quem male torsit iniquus,
 26 perdidit et genitam, heu, miser iste suam.
 27 Huic da justitiam de vulnere corporis emptam

28 et pie captivam fac remeare suam.
 29 Inter utramque necem cui lex et filia deficit,
 30 unus in ambabus rebus adesto salus.
 d) *ITEM PRO EADEM RE AD FLORENTINUM*
 31 Dum pergit hinc quisque viam, mea pagina currat,
 32 prodat ut eloquio quod sibi debet amor.
 33 Nunc quoque care mihi, bone semper, amice fidelis,
 34 pectore devotus reddo salutis opus.
 35 Commendo hunc etiam famulum, dure ante redactum,
 36 tortus qui legem nec meruisse gemit,
 37 illa dolens gravius quam vulnera corpore fixa,
 38 quod sibi subducta est filia parva, rudis,
 39 Audiat hanc vocem pietas miserando benigne ;
 40 quae sibi cum tribuis, hinc tibi magna dabis.

AD EPISCOPOS IN COMMENDATIONE PEREGRINI
 41 Pontifices summi, fidei via, semita vitae,
 42 quos dedit Omnipotens luminis esse duces
 43 custodesque gregi caelestis contulit Agnus,
 44 vos bene pastores, ut foveantur oves,
 45 ecce viator adest peragens iter inscius illud
 46 finibus italicis, heu peregrina gemens.
 47 Exulis auxilium, errantis via, norma salutis,
 48 ad reditum patriae sitis honore patres.
 49 Semina jactantes, mercedis ut ampla metatis
 50 et redeat vobis centuplicata seges.
 51 Fortunatus enim humilis commender opimis
 52 ac per vos Domino, culmina sancta, precor.

DE PLATONE EPISCOPO
 F10_14 v.1 Provida disponunt reges solacia plebi
 2 pontificem dantes quem probat alma fides,
 3 ut colat Hilarium, quem dat Martinus alumnum,
 4 et confessoris protegat ala potens,
 5 dirigat hic populum successor honore beato,
 6 et clerum ecclesiae qui moderetur ope.
 7 Floreat arce decens rex Childebertus in orbe
 8 cum genitis populo matre sorore jugo.
 9 Gaudia laeta paret praesentia sancta Gregori
 10 et geminas urbes adjuvet una fides.
 11 Qui modo discipulo Platone antistite summo
 12 sollemnem ecclesiae hic dedit esse diem.

AD ARMENTARIAM MATREM DOMNI GREGORII EPISCOPI
 F10_15 v.1 Felix bis meritis sibi Machabea vel orbi
 2 (nobilitas generis nobilior genitis),
 3 quae septem palmas caelo transmisit ab alvo,
 4 martyriique decus protulit ille uterus.
 5 Tu quoque prole potens, recte Armentaria felix,
 6 nec minor ex partu quam prior illa sinu.
 7 Illa vetus numero major, tu maxima solo :
 8 quod poterant plures, unicus hoc tuus est.
 9 Fetu clara tuo, geniti circumdata fructu,
 10 est tibi Gregorius palma corona decus.
 11 Me Fortunatum humilem commendo verenter
 12 ac mihi caelestem quaeso preceris opem.

PRO COMITATU EIUS SIGOALDO

F10_16 v.1 Finibus Italiae cum primum ad regna venirem,
 2 te mihi constituit rex Sigiberthus opem,
 3 tutior ut graderer tecum comitando viator
 4 atque pararetur hinc equus, inde cibus.
 5 Implesti officium custos, revocaris amico ;
 6 et mihi vel tandem jam mea cura redit.
 7 Dic, meus, unde venis post tempora plurima dulcis,
 8 magnus honore tuo, major amore meo,
 9 promptus in affectu, Sigoalde benigne, clientum
 10 et Fortunato nomen, amice, pium ?
 11 Rex Childeberthus crescens te crescere cogat :
 12 qui modo dat comitis, det tibi dona ducis.
 13 De domino tali videant sua vota fideles,
 14 cursibus et fiat prospera vita via.

AD SIGOALDUM COMITEM, QUOD PAUPERES PRO REGE PAUERIT

F10_17 v.1 Actibus egregiis praeconia fulgida fulgent :
 2 laus tua, Christe, sonet, dum bona quisque gerit.
 3 Unde genus hominum placeat tu, Summe, ministra,
 4 nam nisi Tu dederis, prospera nullus agit,
 5 divitibus largus forte hinc et parcus egenis,
 6 se ut redimat dives quando fovetur egens.
 7 Dulciter ista tui pia sunt commercia regni :
 8 dum escam sumit egens, divitis auget opes.
 9 Pauper ventre satur satiat mercede potentem :
 10 parva capit terris, praeparat ampla polis.
 11 Divitibus plus praestat egens quam dives egenti :
 12 dat moritura cibi, sumit opima Dei,
 13 dans terrae nummum missurus ad astra talentum,
 14 ex modicis granis surgat ut alta seges.
 15 Dent, jactent, spargant, commendent semina Christo,
 16 hic dare nec dubitent quae reditura manent.
 17 Da : sic Christus erit tibi thesaurarius inde ;
 18 praesta inopi quicquid reddere Christus habet,
 19 hac animatus ope exposcens meliora Tonantis
 20 nec dubitante fide quod Deus ista dabit.
 21 Pro Childeberti regis florente salute,
 22 surgat ut in solio qui fuit altus avo,
 23 fiat ut hinc juvenis validis robustior annis,
 24 ceu viguit proavos, sic sit in orbe nepos,
 25 ergo suus famulus Sigoaldus amore fidelis
 26 pauperibus tribuit, regis ut extet apex.
 27 Hinc ad Martini venerandi limina pergens
 28 auxilium domini dum rogat ipse sui
 29 et dum illuc moderans rex pro regione laborat,
 30 ut precibus sanctus hunc juvet, illud agit.
 31 Denique procedens [lacune] sacra festa tenere
 32 pauperibus Christi praebuit ipse dapem.
 33 Dispensata placent alimenta per agmina Christi,
 34 pascitur et populus quem fovet arce Deus.
 35 Plurima caecorum refovetur turba virorum,
 36 est quibus in tenebra lux Deus atque via.
 37 Hinc alitur clodus quem dirigit ordine Christus
 38 quique sui Domini pendulus implet opus.
 39 Quis referat tantos memorare sub ordine morbos,
 40 occurrens pariter quos sua cura fovet ?
 41 Unde catervatim coeuntia milia pascens
 42 erogat ut habeat, rex quoque cuncta regat.

43 Te Fortunatus, comes, hinc, Sigoalde, salutans
44 regis ut auxilio des meliora precor.

DE PRANDIO DEFENSORIS

F10_18 v.1 Paschale hic hodie donum memorabile floret ;
2 defensor pascit, quo comes ipse favet.
3 Deliciae Domini quas tempora vota ministrant
4 undique conveniunt flumine fruge polo.
5 Childeberthi etiam dominatio longa refulgens
6 te, Sigoalde, diu sublevet arce, gradu.
7 Sit regio felix felicis regis amore
8 atque boni comitis crescat honore fides.

AD GALACTORIUM COMITEM

F10_19 v.1 Venisti tandem ad quod debebaris, amice,
2 ante comes merito quam datus esset honor.
3 Burdegalensis eras et, cum defensor, amator :
4 dignus habebaris haec duo digna regens.
5 Iudicio regis valuisti crescere iudex,
6 famaue quod meruit regia lingua dedit.
7 Debet et ipse potens, ut adhuc bene crescere possis,
8 praestet ut arma ducis, qui tibi restat apex,
9 ut patriae fines sapiens tuearis et urbes,
10 adquiras ut ei qui dat opima tibi,
11 Cantaber ut timeat, Vasco vagus arma pavescat
12 atque Pyrenaeae deserat Alpibus opem.
13 Aut - quasi grande loquor - facit hoc sacer unicus auctor :
14 a Domino erigitur parvus et altus homo.
15 De tirone ducis venit, et de milite princeps,
16 ut reliquos taceam, Justinianus erat.
17 Hoc et in ecclesia Christo tribuente refertur :
18 de exorcista aliquo pontificalis honor.
19 Egregius merito Martinus testis habetur,
20 qui fuit ante sacer quam sacra jura daret.
21 Hoc agit Omnipotens, totum qui condidit orbem,
22 magnaue sola putes quae facit ipse potens.
23 Laetior ergo, precor, maneat in culmine rector,
24 majora sperans, vir ratione sagax,
25 rege sub hoc florens aeternaue regna requirens
26 [lacune]
27 Justitia ac pietas tecum comitata coruscet :
28 illa tuum pectus protegat, ista latus.
29 Alta fides etiam, dilectio fida nitescat,
30 et Fortunato sis, comes, amplius amor.

LIBER VNDECIMVS

EXPOSITIO SYMBOLI

F11_1 [oratio soluta]

ITEM ALIUD AD DOMNAM RADEGUNDEM

F11_2 v.1 Quo sine me mea lux oculis se errantibus abdit
2 nec patitur visu se reserare meo ?
3 Omnia conspicio simul : aethera flumina terram ;
4 cum te non video, sunt mihi cuncta parum.
5 Quamvis sit caelum nebula fugiente serenum,

6 te celante mihi stat sine sole dies.
 7 Sed precor horarum ducat rota concita cursus
 8 et brevitare velint se celerare dies.
 9 Consultum nobis sanctisque sororibus hoc sit,
 10 ut vultu releves quos in amore tenes.

ITEM ALIUD AD EANDEM DE NATALICIO ABBATISSAE

F11_3 v.1 Mater opima, decens, voto laetare beato,
 2 gaude : natalem filia dulcis habet.
 3 Hanc tibi non uterus natam, sed gratia fecit ;
 4 non caro, sed Christus hanc in amore dedit.
 5 Quae sit in aeternum tecum, tibi contulit auctor,
 6 perpetuam prolem dat sine fine Pater.
 7 Felix posteritas quae nullo deficit aevo,
 8 quae cum matre simul non moritura manet !
 9 Sit modo festa dies, sancto Radegundis honore :
 10 Agnen hanc vobis Agnus in orbe dedit.
 11 Gaudia distensos pariter celebretis in annos
 12 et per vos populus vota superna colat,
 13 virgineosque choros moderamina sancta docentes
 14 perpetuae vitae distribuatis opes.
 15 Hinc longinqua salus teneat vos corpore junctas,
 16 rursus in aeterno lumine jungat amor.

ITEM ALIUD AD EANDEM, UT VINUM BIBAT

F11_4 v.1 Si pietas et sanctus amor dat vota petenti,
 2 exaudi famulos munere larga tuos.
 3 Fortunatus agens, Agnes quoque versibus orant,
 4 ut lassata nimis vina benigna bibas.
 5 Sic tibi det Dominus quaecumque poposceris ipsum
 6 et tibi, sicut amas, vivat uterque rogans :
 7 suppliciter petimus, si non offendimus, ambo,
 8 ut releves natos, mater opima, duos.
 9 Non gula vos, sed causa trahat modo sumere vina,
 10 talis enim potus viscera lassa juvat.
 11 Sic quoque Timotheum Paulus, tuba gentibus una,
 12 ne stomachum infirmet, sumere vina jubet.

ITEM ALIUD AD ABBATISSAM DE NATALI SUO

F11_5 v.1 Dulce decus nostrum, Christi sanctissima virgo,
 2 Agnes quae meritis immaculata manes,
 3 sic tibi conplacuit hodiernum ducere tempus,
 4 ut mihi inxpletam distribuisses opem
 5 nec dare nunc dominae modulamina dulcia linguae,
 6 cui dum verba refers pascitur ore tuo.
 7 Abstinnisse cibis etiam vos ipse probavi
 8 et quasi pro vobis est mihi facta fames.
 9 Audio, somnus iners radiantes pressit ocellos.
 10 An nimias noctes anticipare volis
 11 cui non sufficiant haec tempora longa quietis,
 12 cum prope nox teneat quod duplicata dies ?
 13 Nubila cuncta tegunt, nec luna nec astra videntur ;
 14 si sis laeta animo, me nebulae fugiunt.
 15 Gaudia vera colat quae nos haec scribere jussit
 16 et tecum faveat ducta sub arce poli.

ITEM ALIUD AD EANDEM

F11_6 v.1 Mater honore mihi, soror autem dulcis amore,

2 quam pietate, fide, pectore, corde colo,
 3 caelesti affectu, non crimine corporis ullo,
 4 non caro, sed hoc quod spiritus optat amo.
 5 Testis adest Christus, Petro Pauloque ministris,
 6 cumque piis sociis sancta Maria videt,
 7 te mihi non aliis oculis animoque fuisse,
 8 quam soror ex utero tu Titiana fores,
 9 ac si uno partu mater Radegundis utrosque,
 10 visceribus castis progenuisset, eram,
 11 et tamquam pariter nos ubera cara beatæ
 12 pavissent uno lacte fluente duos.
 13 Heu mea damna gemo, tenui ne forte susurro
 14 impediant sensum noxia verba meum ;
 15 sed tamen est animus simili me vivere voto,
 16 si vos me dulci vultis amore coli.

ITEM ALIUD AD EANDEM

F11_7 v.1 Quae carae matri, quae dulci verba sorori
 2 solus in absentis cordis amore loquar ?
 3 Quas locus excludit mens anxia voce requirit
 4 et simul ut videat per pia vota rogat.
 5 Te peto, cara soror, matri pietate benigna
 6 quod minus inpendi tu famulare velis.
 7 Illa decens tecum longo mihi vivat in aevo
 8 et tribus in Christo sit precor una salus.
 9 Nos neque nunc praesens nec vita futura sequestret,
 10 sed tegat una salus et ferat una dies.
 11 Hic tamen, ut cupio, vos tempora longa reservent,
 12 ut soror et mater sit mihi certa quies.

ITEM ALIUD AD EANDEM

F11_8 v.1 Accessit votis sors jucundissima nostris,
 2 dum meruere meae sumere dona preces.
 3 Profecit mihimet potius cibus ille sororum :
 4 has satias epulis, me pietate foves.
 5 Qua probitate micans partes componis utrasque !
 6 Me recreas animo has saturando cibo.
 7 Pascunt membra dapes, animam dilectio nutrit :
 8 quae, cui plus opus es, dulcior esca venis.
 9 Audiatur Omnipotens et te pia vota petentem,
 10 ut tibi perpetuos fundat in ore cibos.
 11 Saecula longa simul cum matre superstite vernes
 12 et vestro freno stet chorus ille Deo.

ITEM AD EANDEM PRO EULOGIIS TRANSMISSIS

F11_9 v.1 Sollicita pietate jubes cognoscere semper
 2 qualiter hic epulis te tribuente fover.
 3 Haec quoque prima fuit hodiernae copia cenae :
 4 quod mihi perfuso melle dedistis holus ;
 5 nec semel aut itemm, sed terque quaterque cucurrit,
 6 cujus me poterat pascere solus odor.
 7 Portitor ad tantos missus non sufficit unus ;
 8 lassarunt totiens qui rediere pedes.
 9 Praeterea venit missus cum collibus altis :
 10 undique carnali monte superbus apex,
 11 deliciis cinctus quas terra vel unda ministrat ;
 12 conpositus epulis hortulus intus erat.
 13 Haec ego nunc avidus superavi cuncta gulosus :

14 et mons et hortus ventre tenetur iners.
 15 Singula nec refero, quia me tua munera vincunt :
 16 ad caelos victrix et super astra voles.

ITEM ALIUD DE EADEM RE

F11_10 v.1 Multiplices epulae concurrunt undique fusae ;
 2 quid prius excipiam, me bonus error habet.
 3 Carne dona tumens argentea gavata perfert,
 4 quo nimium pingui jure natabat holus.
 5 Marmoreus defert discus quod gignitur hortis,
 6 quo mihi mellitus fluxit in ore sapor.
 7 Intumuit pullis vitreo scutella rotatu,
 8 subductis pinnis quam grave pondus habens !
 9 Plurima de pictis concurrunt poma canistris,
 10 quorum blandifluus me saturavit odor.
 11 Olla nigella nimis dat candida pocula lactis
 12 atque superba venit quae placitura fuit.
 13 Haec dominae matri famulans, haec munera natae
 14 vinctus amore pio tertius ipse loquar.

ITEM ALIUD DE FLORIBUS

F11_11 v.1 Respice delicias, felix conviva, beatas,
 2 quas prius ornat odor quam probet ipse sapor.
 3 Molliter adridet rutilantum copia florum ;
 4 vix tot campus habet quot modo mensa rosas,
 5 albert purpureis ubi lactea lilia blattis
 6 certatimque novo flagrat odore locus.
 7 Insultant epulae stillanti germine fultae ;
 8 quod mantile solet, cur rosa pulchra tegit ?
 9 Conplacuit melius sine textile tegmine mensa,
 10 munere quam vario suavis obumbrat odor ;
 11 enituit paries viridi pendente corymbo ;
 12 quae loca calcis habet, huc rosa pressa rubet.
 13 Ubertas rerum tanta est, ut flore sereno
 14 mollia sub tectis prata virere putes.
 15 Si fugitiva placent, quae tam cito lapsa recedunt,
 16 invitent epulae nos, paradise, tuae.
 17 Daedalicis manibus nituit textura sororis ;
 18 tantum digna fuit mater habere decus.

ITEM ALIUD PRO EULOGIIS

F11_12 v.1 Munera direxi, sed non mea, crede fatenti :
 2 ad te quae veniunt sunt tua dona magis.
 3 Melle superfusas cunctorum porrigis escas,
 4 cujus ab ore pio dulcia mella fluunt.
 5 Copia quanta mihi maneant de munere vestro
 6 credite, dum spargit jam gula victa cibos.
 7 Sed mihi da veniam, venerando corde benigna :
 8 quod praesumpsit amor sit veniale mihi.
 9 Nunc Christum pro me chorus ille verendus adoret,
 10 ne peccatorem me mea culpa gravet.

ITEM ALIUD PRO CASTANEIS

F11_13 v.1 Ista meis manibus fiscella est vimine texta :
 2 credite mi, carae, mater et alma soror ;
 3 et quae rura ferunt, hic rustica dona ministro,
 4 castaneas molles, quas dedit arbor agris.

ITEM ALIUD PRO LACTE

F11_14 v.1 Aspexi digitos per lactea munera fixos,
 2 et stat picta manus hic ubi crama rapis.
 3 Dic, rogo, quis teneros sic sculperere conpulit ungues ?
 4 Daedalus an vobis doctor in arte fuit ?
 5 O venerandus amor cujus faciente rapina
 6 subtracta specie venit imago mihi !
 7 Spes fuit, haec quoniam tenui se tegmine rupit :
 8 nam neque sic habuit pars mihi parva dari.
 9 Haec facias longos Domino tribuente per annos,
 10 in hac luce simul matre manente diu.

ITEM ALIUD PRO LACTE

F11_15 v.1 Quid tam dulce darent mihimet materque sororque,
 2 quam modo quod tribuunt congrue lactis opem,
 3 sicut apostolico praecepit dogmate Paulus,
 4 cum infirmis animis lac jubet ipse dari ?
 5 Sollicitam mentem geritis de nomine nostro :
 6 de vobis semper sit pia cura Deo.

ITEM ALIUD PRO PRANDIO

F11_16 v.1 Nescivi, fateor, mihi prandia lassa parari :
 2 sic animo merear posse placere tuo ;
 3 nec poterant aliqui vultu me avellere vestro,
 4 si non artificis fraus latuisset inops.
 5 Quis mihi det reliquas epulas, ubi voce fideli
 6 delicias animae te loquor esse meae ?
 7 A vobis absens colui jejunia prandens,
 8 nec sine te poterat me saturare cibus.
 9 Pro summis epulis avido tua lingua fuisset,
 10 repressent animum dulcia verba meum.
 11 Ordine sed verso medicus fera vulnera gignit
 12 et fallax artem decipiendo probat.
 13 Quem numquam saturat quicquid mare, terra ministrat,
 14 credebat solo me saturare meo.
 15 Sed modo da veniam, quaeso, pietate parata,
 16 alterius facinus ne mihi constet onus.

ITEM ALIUD PRO MUNERE SUO

F11_17 v.1 Conposui propriis manibus hoc munus amoris,
 2 sed tibi vel dominae sit rogo dulce meae,
 3 quamvis exiguo videantur inepta paratu :
 4 crescant affectu quae modo parva fero.
 5 Si bene perpendas, apud omnes semper amantes
 6 muneribus parvis gratia major inest.

ITEM ALIUD PRO PRUNELLIS

F11_18 v.1 Transmissas epulas, quae pruna nigella vocantur,
 2 ne rogo despicias, quae mihi silva dedit.
 3 Si modo dignaris silvestria sumere poma,
 4 unde placere queam dat meliora Deus.
 5 Hoc quoque non metuas quod ramo umbrante pependit
 6 non tellus fungos, sed dedit arbor opes.
 7 Non ego crudelis, qui matri incongrua praestem :
 8 ne dubites puros sumere fauce cibos.

ITEM PRO ALIIS DELICIIIS ET LACTE

F11_19 v.1 Inter multiplices epulas jejunia mittis
 2 atque meos animos plura videndo cremas.
 3 Respiciunt oculi medicus quod non jubet uti,
 4 et manus illa vetat quod gula nostra rogat.
 5 Attamen ante aliud cum lactis opima ministras,
 6 muneribus vincis regia dona tuis.
 7 Nunc cum matre pia gaudens soror esto, precamur
 8 nam nos laetitiae mensa benigna tenet.

ITEM PRO OUIS ET PRUNIS

F11_20 v.1 Hinc me deliciis, illinc me pascitis herbis,
 2 hinc ova occurrunt, hinc mihi pruna datur.
 3 Candida dona simul praebentur et inde nigella :
 4 ventre utinam pax sit sic variante cibo !
 5 Me geminis ovis jussistis sero cibari ;
 6 vobis vera loquor : quattuor ipse bibi.
 7 Atque utinam merear cunctis parere diebus
 8 sic animo, ceu nunc hoc gula jussa facit.

ITEM DE ABSENTIA SUA

F11_21 v.1 Si me non nimium pluviatilis aura vetaret,
 2 dum nesciretis, vos repetisset amans.
 3 Nec volo nunc absens una detenter ut hora,
 4 cum mea tunc lux est quando videtur amans.

DE CONVIVIO SUO

F11_22 v.1 Per pietatis opus, per qui pius imperat astris,
 2 per quod mater amat, frater et ipse cupit,
 3 ut, dum nos escam capimus, quodcumque loquaris
 4 quod si tu facias, bis satiabor ego.

ITEM DE EADEM RE

5 Delicis variis tumido me ventre tetendi,
 6 omnia sumendo : lac olus ova butur.
 7 Nunc instructa novis epulis mihi fercula dantur,
 8 et permixta simul dulcius esca placet.
 9 Nam cum lacte mihi posuerunt inde buturum :
 10 unde prius fuerat, huc revocatur adeps.

ITEM UERSUS IN CONVIVIO FACTOS

F11_23 v.1 Inter delicias varias mixtumque saporem
 2 dum dormitarem dumque cibarer ego
 3 (os aperiebam, claudebam rursus ocellos
 4 et manducabam somnia plura videns),
 5 confusos animos habui, mihi credite, carae,
 6 nec valui facile libera verba dare.
 7 Non digitis poteram, calamo neque pingere versus,
 8 fecerat incertas ebria Musa manus.
 9 Nam mihi vel reliquis sic vina bibentibus apta
 10 ipsa videbatur mensa natate mero.
 11 Nunc tamen, ut potui, matri pariterque sorori
 12 alloquio dulci carmina parva dedi.
 13 Etsi me somnus multis inpugnat habenis,
 14 haec dubitante manu scribere traxit amor.

ITEM DE EADEM RE

15 Blanda magistra suum verbis recreavit et escis
 16 et satiat vario deliciante joco.

ITEM DE MUNERE SUO

F11_24 v.1 Si non conplestis quod hic completa vocatur,
 2 haec, rogo suppliciter, suscipe, sume libens.
 3 Nec parva spernas : nam si mea vota requiras,
 4 munus in angusto cernitur amplus amor.

AD EASDEM DE ITINERE SUO

F11_25 v.1 Casibus innumeris hominum momenta rotantur
 2 instabilique gradu pendula vita meat.
 3 Ipsa futurarum titubans mens anxia rerum
 4 ventura ignorat quid sibi lux pariat.
 5 Nam me digressum a vobis Eomundus amator
 6 illa suscepit qua bonitate solet.
 7 Hinc citus excurrrens Cariacae devehor aulae ;
 8 Tincillacensi perferor inde loco.
 9 Hinc sacer antistes rapuit me Domitianus,
 10 ad sancti Albini gaudia festa trahens.
 11 Inde relaxatus, per plura pericula fessum
 12 puppe sub exigua fluctus et imber agit
 13 quo gravis incumbens Aquilo subverterat amnem
 14 et male curvatos extulit unda sinus ;
 15 nec sua commotos capiebant litora fluctus :
 16 invadunt terras aequora fusa novas.
 17 Pascua rura nemus segetes viburna salictum
 18 viribus iratis una rapina tenet.
 19 Huc mihi commisso per confraga murmura ponti
 20 flatibus horrificis laxa fremebat hiemps
 21 surgebatque cadens per aquosa cacumina puppis,
 22 ascendens liquidas monte vagante vias ;
 23 quo rate suspensa modo nubila nauta tenebat,
 24 gurgite subducto rursus ad arva redit.
 25 Fluctibus infestis pelagi spumante procella
 26 assidue rapidas prora bibebat aquas ;
 27 aequora lambebant inimica pace carinam,
 28 tristius amplexu nos nocitura suo.
 29 Sed mora nulla vetat varias memorare querellas
 30 post referenda simul murmura corde tego.
 31 Hoc mihi praecipue divina potentia praestet,
 32 ut cito felices vos revidere queam.

ITEM ALIUD

F11_26 v.1 Passim stricta riget glacies concreta pruina
 2 nec levat adflictas flexilis herba comas.
 3 Terra jacet crustata gelu sub cortice duro,
 4 mollis et arboreas nix tegit alta comas.
 5 Proflua crustatum struxerunt flumina murum
 6 et densata gravem vestiit unda cutem.
 7 Mole sua frenantur aquae, se lympha ligavit,
 8 obice sub proprio vix sibi praebet iter.
 9 Fluminibus mediis nata est cristallina ripa,
 10 nec cupimus subter, nec super itur iter.
 11 Asperius tumuit glacies Aquilone fremente :
 12 cui dabit illa viam quae sibi pugnat aqua ?
 13 Sed si concipitur nunc spiritus ille caloris,
 14 qui tum in principio perferebatur aquis,
 15 assiduis precibus si flectitis Omnipotentem,
 16 et mihi, ceu cupitis, prosperiora datis.

17 Nam vobis parere animo quodcumque jubetur
18 posse utinam sic sit quam mihi velle placet !